




爾雅疏上

802.11251
1760
:1



疋 瓜
疏 來
十 本
齋 介






光緒四年歲在著
雍攝提格吳興陸
氏十萬卷樓重雕

重刊北宋本爾雅疏序

羣經之疏北宋時本與注別行至南宋麻沙刊本始
合為一闕刻及明監本仍之自合刻本行而單行本
遂微今存者儀禮穀梁爾雅而已儀禮穀梁皆殘缺
惟爾雅獨完承平時吳中有二本一為士禮居黃氏
所藏一為五硯樓袁氏所藏余於亂後得之吳中故
家書中有何氏藏書印其即黃袁二家所藏或別為
一本無可攷也其紙乃至順中公牘紙背有蒙古文




官印金入汴京盡輦國子監秘書監書籍而北事見
北盟會編其板至元時尚存故有元時印本攷玉海
咸平三年二月命國子祭酒邢昺等重定爾雅義疏
四年九月表上十月命摹板印行書中凡遇宋太祖
太宗真宗廟諱皆缺末筆其為咸平初刻無疑問有
不避宋諱者當是入元以後所修補耳經注或載全
文或標起止皆空一格下僊釋曰與單行本儀禮疏
同例經文多與唐石經合疏文完全遠勝合刻本之

刪削叔明訓詁攷訂雖不及邵氏正義郝氏義疏之
精而疏爾雅者於今為最古邢疏刊本又以此本為
最古也叔明自序云為之疏釋凡一十卷合刻本皆
作十一卷若非此本僅存何從見邢氏真面目乎粵
逆之亂為古今圖書一大劫念世間未必有二校正
付梓以餉學者行歟悉仍宋刊舊式別為校勘記附
於後

光緒四年歲在著雍攝提格且月歸安陸心源撰

安吉吳俊書



每部紋銀壹兩

爾雅疏敘

翰林侍講學士朝請大夫守國子祭酒王桂國王紫魚袋臣邢王昺王等奉
勅校定

夫爾雅者先儒授教之術後進索隱之方誠傳注之濫觴為經籍之樞要者也
夫混元闢而三才肇位聖人作而六藝斯興本乎發德於衷將以納民於善洎
夫醇醜既異步驟不同一物多名繫方俗之語片言殊訓滯今古之情將使後生
若為鑽仰繇是聖賢閒出詁訓遞陳周公倡之於前子夏和之於後蟲魚草木
爰自爾以昭彰禮樂詩書盡由斯而紛郁然又時經戰國運歷挾書傳授之
徒滯微發揮之道斯寡諸篇所釋世罕得聞惟漢終軍獨深其道豹鼠既辨
斯文遂隆其後相傳乃可詳悉其為注者則有韃為文學劉歆樊光李巡孫炎
雖各名家猶未詳備惟東晉郭景純用心幾二十年注解方畢甚得六經之旨
頗詳百物之形學者祖焉最為稱首其為義疏者則俗閒有孫炎高瓊皆淺
近俗儒不經師匠今既奉
勅校定考案其事必以經籍為宗理義所詮則以景純為主雖復研精覃思尚
慮學淺意疏謹與尚書駕部員外郎直祕閣臣杜鎬尚書都官員外郎祕閣校

理臣舒雅太常博士直集賢院臣李維諸王府侍講太常博士兼國子監直講
臣孫奭殿中丞臣李慕清大理寺丞國子監直講臣王煥大理評事國子監直
講臣崔偓佺前知洛州永年縣事臣劉士玄等共相討論爲之疏釋凡一十卷
雖上遵

睿旨共竭於顛蒙而下示將來尚慙於踈略謹序

爾雅疏卷第一

爾雅序

釋曰爾雅者釋文云所以訓釋五經辨章同異實九經之通路百氏之指南多
識鳥獸草木之名博覽而不惑者也爾近也雅正也言可近而取正也釋詁一
篇蓋周公所作釋言以下或言仲尼所增子夏所足叔孫通所益梁文所補張
揖云昔在周公續述唐虞宗翼文武克定四海勤相成王踐阼理政日吳不食
坐而待旦德化宣流越裳來貢嘉禾貫桑六年制禮以導天下著爾雅一篇以
釋其義傳乎後享歷載五百墳典散落唯爾雅常存禮三朝記哀公曰寡人
欲學小辯以觀於政其可乎孔子曰爾雅以觀於古足以辯言矣春秋元命包
言子夏問夫子作春秋不以初哉首基爲始何是以知周公所造也率斯以降

超絕六國越踰秦楚爰暨帝劉魯人叔孫通撰置禮記文不違古今俗所傳三
篇爾雅或言仲尼所增或言子夏所益或言叔孫通所補或言沛郡梁文所著
皆解家所說先師口傳旣無正驗聖人所言是故疑不足能明也夫爾雅之爲
書也文約而義固其陳道也精研而無誤真九經之檢度學問之階路儒林之
楷素也序與緒音義同釋詁云敘緒也言已注述之由敘陳此經之旨若繭之
抽緒耳孔子作書序子夏作詩序故郭氏亦謂之序序之大指凡有五焉初自
夫爾雅者至辯同實而殊號者也明此書之用也二自誠九流之津涉至摛翰
者之華苑也言爲羣經之樞要也三自若乃至莫近於爾雅言其博物他書不
之過也四自爾雅者至其業亦顯明其興隆之時也五自英儒瞻聞之士至序
末愒序已所以作法之意也今各依文解之 夫爾雅者至同實而殊號者也
釋曰此明其用也夫者發語辭亦指示語指此爾雅者所以通詁訓之指歸也
詁古也通古今之言使人知也訓道也道物之貌以告人也指歸謂指意歸鄉
也言此書所以通暢古今之言訓道百物之貌使人知其指意歸鄉也若言初
哉首基者其指歸在始也若言番番矯矯者其指歸在勇也略舉一隅他皆
放此云敘詩人之興詠者敘次敘也鄭玄注周禮大司樂云興者以善物喻善

事又注大師云興者見今之美嫌於媚諛取善事以喻勸之鄭司農云興者託於事物詠者永言也故舜典云歌永言孔注云歌詠其義以長其言又詩序云言之不足故嗟嘆之嗟嘆之不足故永歌之斯皆詩人所爲此書能次序之故言敘詩人之興詠也若言唯唯喏喏以興民協服也其虛其徐以詠威儀容止也如此之類皆是案爾雅所釋徧解六經而獨云敘詩人之興詠者以爾雅之作多爲釋詩故毛公傳詩皆據爾雅謂之詰訓傳亦此意也云惣絕代之離詞者惣聚也絕代猶遠代也離詞猶異詞也郭璞序方言云標六代之絕語類離詞之指韻亦猶此也以其六代絕遠四方乖越故今古語異夷夏詞殊此書能惣聚而釋之使人知也若其釋又祭也周曰繹商曰彤夏曰復昨及注引方言之類是也云辯同實而殊號者也者辯謂辯別凡物雖殊其號而同一實者此書辯之若繁謂之量量數也疑謂之學學覆車也又釋草云唐蒙女蘿女蘿菟絲注云別四名如此之類是也 誠九至苑也 釋曰此明其樞要也云誠九派之津涉者誠實也九派者序六藝爲九種言於六經若水之下流也津涉者濟渡之處名言九派之多非此書無以通喻九河之廣非津涉無以渡案漢書藝文志云儒家者流五十三家八百三十五篇蓋出於司徒之官助人君順陰

陽明教化者也游文於六經之中留意於仁義之際祖述堯舜憲章文武宗師仲尼以重其言於道最爲高孔子曰如有所譽其有所試唐虞之隆殷周之盛仲尼之業已試之效者也然惑者旣失精微而僻者又隨時抑揚違離道本苟以譁衆取寵後進循之是以五經乖析儒學寤衰此僻儒之患也道家者流三十七家九百九十三篇蓋出於史官歷記成敗存亡禍福古今之道然後知秉要執本清虛以自守卑弱以自持此人君南面之術也合於堯舜之克讓易之謙謙一謙而四益此其所長也陰陽家者流二十一家三百六十九篇蓋出於羲和之官敬順昊天歷象日月星辰敬授民時此其所長也法家者流十家二百一十七篇蓋出於理官信賞必罰以輔禮制易曰先王以明罰飭法此其所長也名家者流十家三十六篇蓋出於禮官古者名位不同禮亦異數孔子曰必也正名乎名不正則言不順言不順則事不成此其所長也墨家者流六家八十六篇蓋出於清廟之官茅屋采椽是以貴儉養三老五更是以兼愛選士大射是以上賢宗祀嚴父是以右鬼順四時而行是以非命以孝視天下是以上同此其所長也縱橫家者流十二家百七篇蓋出於行人之官孔子曰誦詩三百使於四方不能專對雖多亦奚以爲又曰使乎使乎言其當權事

制宜受命而不受辭此其所長也雜家者派二十家四百三篇蓋出於議官兼
儒墨合名法知國體之有此見王治之無不貫此其所長也農家者流九家百
一十四篇蓋出於農稷之官播百穀勸耕桑以足衣食故八政一曰食二曰貨
孔子曰所重民食此其所長也此九流之大旨也云六藝之鈐鍵者案漢書藝
文志六藝謂易書詩禮樂春秋六經也凡六藝一百三家三千二百二十三篇說
文云鈐鑠也方言云戶鑰自關之東陳楚之間謂之鍵小爾雅云鍵謂之鑰言
此書爲六藝之鑰鑰必開通之然後得其微旨也故云六藝之鈐鍵也云學覽
者之譚輿者譚淵也室中西南隅謂之輿言隱輿也此書釋二儀之形象載八
表之昏荒雖博學廣覽之士莫能究淵深隱輿故云學覽者之譚輿也云摛翰
者之華苑也者言此書森羅萬有純粹六經摛文染翰之士足以掇其英華若
園苑然故云華苑也 若乃至爾雅 釋曰此言其博物也云若乃者因上起
下語上既言其功用此復美其博物故云若乃既可以博釋庶物又能多識辨
於鳥獸草木之名者莫近於爾雅言爾雅最近之又案公羊傳說春秋功德云
撥亂世反諸正莫近諸春秋何休云莫近猶莫過之也然則博物多識他書亦
莫過於爾雅也 爾雅至亦顯 釋曰此言興隆之時也云蓋興於中古者爾

雅之作經傳莫言其人及時世但相傳云周公作之以教成王無正文故云蓋
以疑之經典通以伏犧爲上古文王爲中古孔子爲下古周公文王子父統子
業周公亦可言中古故云蓋興於中古云隆於漢氏者以夫子沒後書紀散亡
戰國陵遲嬴秦燔滅則此書亦從而墜矣洎乎漢氏御宇旁求典籍除挾書
之律開獻書之路此書亦從而隆矣故曰隆於漢氏也云豹鼠旣辨其業亦顯
者謂漢武帝時孝廉郎終軍旣辨豹文之鼠人服其博物故爭相傳授爾雅之
業於是遂顯言不但興行兼亦廣顯故云亦也 英儒至序末 釋曰此言已
所以作注之意也云英儒瞻聞之士者案禮辭名記德過千人曰英儒者柔也
能以德柔服人也瞻多也士者有德之稱言英俊通儒多聞之士也云洪筆麗
藻之客者洪大也麗美也藻水草也有文以喻人之文章言大有詞筆美於文
章之客也云靡不欽玩耽味爲之義訓者靡無也欽玩猶敬愛也耽味猶樂嗜
也言英儒等無不敬愛此書如耽廣樂嗜嘉有然故曰耽味而爲之義理訓解
謂作注也云璞不揆擣昧少而習焉者此自謙也揆度也擣謂擣杓無知之貌
昧闇也郭氏言已不度其無知闇昧自少小而習此書焉云沈研鑽極二九載
矣者此言用功深不敢苟爲注解也謂深沈研覈鑽求窮極凡十八載故云二

九載矣云雖註者十餘然猶未詳備者言作註者雖十有餘家猶尙未能精詳
具備十餘家者陸德明敘錄健爲文學注二卷劉歆注三卷樊光注六卷李巡
注三卷孫炎注三卷惟此五家而已又五經正義援引有某氏謝氏顧氏今郭
氏言十餘者典籍散亡未知誰氏或云沈旋施乾謝嶠顧野王者非也此四家
存郭氏之後故知非也云並多紛謬有所漏略者言十家所註並多紛紜錯繆
若孫叔然覲髮莠離字別爲義是紛繆也其所難解則全不入根節是漏略也
云是以復綴集異聞會粹舊說者是以者因前起後語因前十家所注紛繆漏
略起已作注之意故言是以對前已有注故云復綴集謂聯綴聚集異聞者注
所引六經子史之類是也會粹者廣雅云會收也粹聚也舊說謂十家所說也
雖不能盡善亦時有可觀其所善者則收聚用之也云考方國之語者考成也
四方之國言語不同有可通釋者則援引考成之注引方言是也云采諺俗之
志者采取也徒歌謂之謠案漢書地理志云好惡取舍動靜亡常隨君上之情
欲故謂之俗但童謠嬉戲之言及俗間有所記志可以通此書者亦采用之若
檇榼注引齊人諺曰上山斫檀檇榼先殫蠅蝟注云俗呼爲喜子之類是也云
錯綜樊孫者謂交錯綜聚樊光孫炎一家之注取其理長者用之云博關羣言

者關通也羣言謂子史及小說也言非但援引六經亦博通此子史等以爲注
說也云剝其瑕礫舉其蕭稂者此喻已作注去惡取善也剝其瑕礫以玉石喻
也剝削也削去其疵瑕瓦礫以取瑾瑜也舉其蕭稂以禾莠喻也舉拔也蕭
蒿也稂童梁莠類也拔去其蕭蒿稂莠以存其嘉禾也云事有隱滯援據徵
之者援引也徵成也若事有隱奧滯泥者則援引經據以證成之也云其所易
了闕而不論者講通見詩書不難曉了者則不須援引故闕而不論也云別爲
音圖用祛未寤者謂注解之外別爲音十卷圖贊二卷字形難識者則審音以
知之物狀難辨者則披圖以別之用此音圖以祛除未曉寤者故云用祛未寤
也云輒復擁篲清道企望塵躅者此郭氏自問也擁手持也篲帚也清道謂清
潔道塗也企望者企踵而瞻望也塵躅者塵路躅跡也言已注此書若人持帚
以清道企踵而望其芳塵美跡所以然者何謂是自問也云以將來君子爲亦
有涉乎此也者此自答也言已注此書非他以為將來有德君子之爲必欲研
覈百氏探討九流非爾雅不可必涉歷此途若其注釋未備則恐迷誤後人作
注之由良爲此也 爾雅卷上 郭璞注 釋曰上者對中下生名直以簡編
重多分爲上中下三卷無義例也郭璞字景純河東人東晉弘農太守著作郎

注者著也解釋經指使義理著明也亦言已注意以釋此書也詩書謂之傳者
傳傳也博識經意傳示後人也此皆其人自題故或言傳或言注無義例也
釋詁第一 釋曰釋解也詁古也古今異言解之使人知也釋言則釋詁之別
故爾雅序篇云釋詁釋言通古今之字古與今異言也第次也一數之始也
以其作最在先故為第一此篇相承以為周公作但其文有周公後事故先儒
共疑焉或曰仲尼子夏所增足也或曰當周公時有之今無者或在散亡之中
然則詩書所有非周公所釋乃後人依放故言雅記而為之文故與之同郭氏
因即援據以成其義若言胡不承權輿及緇衣之篇今此秦康鄭武之詩在周
公之後明矣其義猶今為文採摭故事以為辭耳則此篇所載悉周公時所有
何足怪也其諸篇所次舊無明解或以為有親必須宮室宮室既備事資器用
今謂不然何則造物之始莫先兩儀而樂器居天地之先豈天地乃樂器所資
乎蓋以先作者居前增益者處後作非一時故題次無定例也其篇之名義逐
篇具釋此不繁言此書之作以釋六經之言而字別為義無復章句今而作疏
亦不分科段所解經文若其易了及郭氏未詳者則闕而不論其稍難解則援
引經據及諸家之說以證之郭氏之注多采經記若其通見可曉者則但指篇

目而已其或書名僻異義旨隱奧者則具載彼文以祛未寤者耳 初哉首基
肇祖元胎俶落權輿始也 釋曰皆初始之異名也初者說文云從衣從刀裁
衣之始也哉者古文作才說文云才草木之初也以聲近借為哉始之哉首者
頭也身之始也基者說文云牆始築也肇者說文作屮始開也祖者宗廟之始
也元者善之長也長即始義胎者人成形之始也俶者動作之始也落者木葉
隕墜之始也權輿者天地之始也天圓而地方因名云此皆造字之本意也及
乎詩書雅記所載之言則不必盡取此理但事之初始俱得言焉他皆倣此
注尚書至殊語 釋曰云尚書曰三月哉生魄者康誥文云詩曰令終有俶者
大雅既醉文又曰俶載南畝者周頌載芟文又曰訪子落止者周頌訪落文又
曰胡不承權輿者秦風權輿文云胚胎未成亦物之始也者說文云胚胎孕一
月也胎婦孕三月也然則尚未成形而為形之始故曰胚胎未成亦物之始物
則形也云其餘皆義之常行者耳者謂初首基肇祖元也通見詩書故曰義之
常行云此所以釋古今之異言通方俗之殊語者楊雄說方言云皆古今語也
初別國不相往來之言也今或同而舊書雅記故俗語不失其方而後人不知
故為之作釋也郭彼注云謂作釋詁釋言是也 林烝天帝皇王后辟公侯君

也釋曰皆天子諸侯南面之君異稱也白虎通云君羣也羣下之所歸心也
林者說文云平地有叢木曰林烝者左傳云天生烝民樹之以君而司牧之然
則人物之衆必立君長以司牧之故以林烝爲君也天者說卦云乾爲天爲君
以其俱尊極故也大雅皆謂君爲天是也帝皇者白虎通云德合天地者稱帝
帝者諦也象可承也皇美也大也天之摠美大稱也時質故摠稱之號之爲皇
煌煌人莫遠也王者往也天下所歸往說文云后者繼體君也象人之形施令
以告四方故后之從一曰發號者君后也辟者法也爲下所法則也公者通也
公正無私之意也侯者候也候逆順也天希皇王惟謂天子公侯惟謂諸侯餘
皆通稱注詩曰至詩書釋曰云詩曰有壬有林者小雅賓之初筵文又曰
文王烝哉者大雅文王有聲文云其餘義皆通見詩書者謂天帝皇王后辟公
侯皆義之常行故不備引弘廓宏溥介純夏撫厖墳嘏丕奔洪誕戎駿假京
碩濯訐字穹壬路淫甫景廢壯冢簡筇販旺將業席大也釋曰此皆廣大之
異言也弘者含容之大也周書洛誥云武王弘朕恭廓者方言云張小使大謂
之廓宏者書曰若保宏父介者方言云東齊海岱之間謂之介純者魯頌閟宮
公天錫公純嘏夏者方言云自關而西秦晉之間凡物之壯大而愛偉之謂之

亦宜缺未
非亦字
訐又亦作
同音于反

夏厖者深之大也墳嘏者方言云墳地大也青幽之間凡土而高且大者謂之
墳秦晉之間凡物壯大謂之嘏丕者書云嘉乃丕績奔者詩大雅韓奕云奔
奔梁山洪者書大誥云延洪惟我幼冲人誕者大雅生民云誕彌厥月戎者方
言云宋魯陳衛之間謂之嘏或曰戎京碩濯訐者秦晉之間凡人大謂之裝燕
之北鄙齊楚之郊或曰京齊宋之間曰碩荆吳楊甌之郊曰濯中齊西楚之間
曰訐此皆謂大方俗之殊語也甫者詩齊風云無田甫田景者周頌潛篇云以
介景福壯者秦晉之間凡人大謂之壯大或謂之壯冢者舍人曰冢封之大也大
雅縣篇云乃立冢土簡者周頌執競云降福簡簡劉者郭云義未聞顧氏云
都角切說文云草大也韓詩云劉彼圃田將者周頌云日就月將業者版之大
也大雅靈臺云虛業維樅餘皆見注注詩曰至一實釋曰云我受命溥將
者商頌烈祖文又曰亂如此撫者小雅巧言文云下國駿厖者商頌長發文云
湯孫奏嘏者商頌那篇文云王公伊濯者大雅文王有聲文云訐謨定命者大
雅抑篇文云有壬有林者小雅賓之初筵文云厥聲載路者大雅生民文云旣
有淫威者周頌有客文云廢爲殘賊者小雅四月文云爾土宇販章者大雅卷
阿文云緇衣之席兮者鄭風緇衣文云廓落宇宙穹隆至極亦爲大也者廓落

佳

中心貺之 儀若祥淑鮮省臧嘉令類緜穀攻穀介徽善也 釋曰皆謂美善也儀者形象之善也若者惠順之善也祥者李巡曰福之善也書秦誓云襲于休祥淑者有德之善也詩曹風鳴鳩云淑人君子鮮者清絜之善邶風新臺云籩條不鮮省緜穀郭氏未詳臧者功能之善也詩齊風云射則臧兮嘉者美之善也詩大雅抑篇云無不柔嘉令者大雅卷阿云令問令望類者昭二十八年左傳云勤施無私曰類攻者堅緻之善穀者養生之善詩小雅小明云式穀以女介者大善也徽者美善也 注詩曰至常語 釋曰云詩曰儀刑文王者大雅文王篇文云左傳曰禁禦不若者左傳無全文案文十八年說四凶云投諸四裔以禦魑魅宣三年傳言鑄鼎象物故民入山林不逢不若蓋採合傳文故云禁禦不若也云詩曰永錫爾類者大雅既醉文云我車既攻者小雅車攻文云介人維藩者大雅板篇文云大姒嗣徽音者思齊文云餘皆常語者謂祥淑鮮臧嘉令穀書傳多有之故云皆常語 舒業順敘也舒業順敘緒也 釋曰敘謂次敘舒者展舒徐緩有次也業者事有次敘也順者不逆有敘也舒業順敘四者又為端緒互相訓也 怡懌悅欣衍喜愉豫愷康妣般樂也 釋曰皆謂喜樂怡者和樂也小雅節南山云既夷既懌怡夷音義同懌者悅樂也商

頌那篇云亦不夷懌悅者心樂也小雅都人士云我心不說悅說音義同欣者笑喜之樂也大雅鳧鷖云旨酒欣欣毛傳云欣欣然樂也衍者飲食之樂也小雅南有嘉魚云嘉賓式燕以衍喜者說文云不言而悅也小雅彤弓云中心喜之愉者安閒之樂也唐風山有樞云他人是愉毛傳云愉樂也豫者逸樂也小雅白駒云逸豫無期愷者康樂也小雅魚藻云豈樂飲酒康者安樂也唐風蟋蟀云無以大康妣者樂之久也小雅鹿鳴云和樂且湛又衛風氓篇云無與士耽鄭箋云耽非禮之樂般者遊樂也周頌篇名也鄭箋云般樂也 注皆見詩 釋曰郭以爾雅之作多為釋詩且詩中備有此文故云皆見詩其實六經之中所訓亦爾但以詩書之作作非一人故有音義雖同而字形踳駁者詩文作湛耽而此作妣詩文作夷說豈槃 而此作怡悅愷般之類直以異人之作故不同爾無義例也他皆放此悅懌愉釋賓協服也 釋曰皆謂喜而服從也悅懌愉者皆喜樂而服也釋者釋去恨怨而服也質者懷德而服也旅葵云四夷咸賓協者和合而服也左傳曰謀其不協 適遵率循由從自也適遵率循也 釋曰自亦從也轉互相訓也適者大雅縣篇云聿來胥宇適聿音義同遵者周南汝墳云遵彼汝墳率者大雅縣篇云率西水滸循者顧命云率循大卜

由者曲禮大夫士出入君門由闈右從者小雅何人斯云伊誰云從適遵率三者又為循行靖惟漢圖詢度咨諏究如慮謨猷肇基訪謀也 釋曰皆謂謨議也靖者安謀也小雅小旻云靖共爾位惟者思謀也漢者舍人曰心之謀也小雅小弁云聖人莫之漠莫音義同圖者大雅崧高云我圖爾居詢度咨諏者小雅皇皇者華傳云訪問於善為咨咨事為諏咨事之難易為謀咨禮義所宜為度親戚之謀為詢究者小雅小弁云不舒究之慮者計謀也謨者大謀也大雅云訏謨定命猷者以道而謀也大雅文王云厥猶翼翼猷猶音義同肇者大雅江漢云肇敏戎公基者君子作事謀始也訪者謀政事也 注國語至見詩釋曰云國語曰詢於八虞咨于二虢度于閔天謀于南宮諏于蔡原訪于辛尹者是晉語胥臣對文公辭說文王之即位也韋氏解云八虞周八士皆在虞官二虢文王弟虢仲虢叔南宮南宮括也蔡蔡公原原公辛辛甲尹尹逸皆周大史也 典彝法則刑範矩庸恒律彙職秩常也 釋曰皆謂常禮法也典刑者詩大雅蕩篇云尚有典刑彝者洪範云彝倫攸敘法則者天官冢宰以八灋治官府以八則治都鄙鄭注云邦國官府謂之禮法常所守以為法式也則亦法也典法則所用異異其名也範者模法之常也矩者度方有常也庸者書臯

陶謨云自我五禮有庸哉恒久之常也湯誥云若有恒性律者常法也彙者康誥云不率大彙職者主之常也秩者商頌烈祖云有秩斯祐 柯憲刑範辟律矩則法也 釋曰此亦謂常法轉互相訓柯者執以取法也憲者大雅桑扈云百辟為憲辟罪法也刑範律矩則皆謂常法也 注詩曰至踰矩 釋曰云詩曰伐柯伐柯其則不遠者爾風伐柯文云論語曰不踰矩者為政文辜辟戾辜也 釋曰皆謂刑罪也辜者書仲虺之誥云罔不懼于非辜辟者呂刑云墨辟疑赦戾者大雅抑篇云亦維斯戾辜罪古今字也說文云辜犯法也從辛從自言辜人蹙鼻苦辛之憂秦以辜似皇改為罪取非人自投於网自古文以為鼻黃髮齟齬齟齬背者老壽也 釋曰皆壽考之通稱也黃髮者舍人曰黃髮老人髮白復黃也郭云黃髮髮落更生黃者齟齬者說文云齟老人兒齒也郭云齒墮更生細者魯頌閟宮云既多受祉黃髮兒齒鄭箋云兒齒亦壽徵齟齬背者今人曰老人氣衰皮膚消瘠背若齟齬郭云齟齬背皮如齟齬劉熙釋名云九十曰齟齬背有齟齬大雅行葦云黃者台背毛傳云台背大老也 鄭箋云台之言齟也大老則背有齟齬方言云秦晉之郊陳寃之會謂老曰耆齟者郭云耆也方言云燕代北鄙謂耆為黎郭彼注云黎面色似凍梨也舍人曰耆觀也

凍梨 色黑皮細出西域 非梨徑凍之謂

血氣精華觀竭言色赤黑如狗矣孫炎曰者面如凍梨色似浮垢老人壽徵也
老者說文云七十曰老從人毛匕言須髮變白也允字夏展謀誠亮詢信也
釋曰皆謂誠實不欺也注方言至見詩釋曰案方言云允訖音詢展諒
亮音穆信也齊魯之間曰允燕代東齊曰訖宋衛汝潁之間曰詢荆吳淮汭之間
曰展西甌毒屋黃石野之間曰穆衆信曰諒周南召南衛之語也云亦皆見詩
者鄙風定之方中云終然允臧大雅文王云萬邦作孚小雅祈父云豈不聰鄙
風君子偕老云展如之人兮大雅蕩篇云其命匪諶誠者復言之信也鄙柏舟
云不諒人只鄭風溱洧云洵訖且樂亮諒詢洵音義同展諶允慎實誠也
釋曰皆謂至誠轉相訓也注詩曰慎爾優遊釋曰小雅白駒文謔浪笑
敖戲謔也釋曰詩曰謔浪笑敖者不敬之戲謔也舍人曰謔戲謔也浪意明
也笑心樂也敖意舒也戲笑邪戲謔笑之貌郭云謂調戲也見詩者此邶風終
風文粵于爰曰也爰粵于也釋曰皆謂語辭發端轉互相訓也說文云曰
從開口象氣出於口也注書曰至出征釋曰云書曰土爰稼穡者周書洪
範文云詩曰對越在天者周頌清廟文云王于出征者小雅采芑文爰粵于
那都繇於也釋曰皆語之韻絕歎辭也爰粵于三者又爲於乎注左傳至

絕釋曰云左傳曰棄甲則那者宣二年華元荅謳者辭也云書曰臯陶曰
都者虞書臯陶謨文也云繇辭者繇卦兆之辭也云於乎者周頌維天之命云
於乎不顯是也欲卻盡翕仇偶妃匹會合也釋曰皆謂對合也欲者說文
云合會也卻者和合也盡者衆合也易豫卦九四云勿疑朋盍簪翕者斂合也
書臯陶謨云翕受敷施仇者左傳曰怨耦曰仇偶者相對合也左傳曰大都偶
國妃者嘉耦曰妃匹者配合也大雅文王有聲云作豐伊匹會者集合也周禮
曰時見曰會仇讎敵妃知儀匹也釋曰皆謂匹合也仇者孫炎云相求之
匹讎者儔侶輩類之匹也敵者相當之匹也妃合耦之匹也注詩云至輩也
釋曰云詩云君子好仇者周南關雎文云樂子之無知者檜風隰有萋楚文云
實維我儀者鄙柏舟文也云國語亦云丹朱馮身儀之者案周語惠王十五年
有神降於莘王問於內史過曰今是何神也對曰昔昭王娶於房曰房后實有
爽德協于丹朱丹朱馮身以儀之生穆王焉實臨昭周之子孫而禍福之夫神
一不遠徙遷若由是觀之其丹朱乎韋氏解云馮依也儀匹也言房后之行有
似丹朱丹朱馮依其身而匹偶之生穆王焉妃合會對也妃媿也釋曰此
三者又爲當對妃又爲媿謂相偶媿也紹胤嗣續纂綏績武係繼也釋曰

皆聯繼不絕也紹者大雅抑篇云弗念厥紹肩者大雅既醉云永錫祚肩嗣者周頌酌篇云載用有嗣續者小雅斯干云似續妣祖纂者魯頌閟宮云續禹之緒綏武見注績者陳風東門之枌云不績其麻係者繫屬之繼易曰係小子失丈夫注詩曰至常語釋曰云詩曰下武維周者大雅下武文云綏見釋水者彼云汎汎楊舟紉縹維之紉粹也縹綏也是矣氣溢溢蟄慎貉謚顛顛密寧靜也釋曰皆安靜也謚者人死將葬諱列其行而作之也溢者盈溢者宜靜周頌維天之命云假以溢我蟄者藏伏靜處也易曰龍蛇之蟄慎者謹靜也大雅云淑慎爾止貉者靜定也大雅皇矣云貊其德音鄭箋云德政應和曰貊謚者說文云靜語也密者周頌昊天有成命云夙夜基命宥密寧者周頌良耜云婦子寧止隕碩湮下降墜標落也釋曰皆謂墮落也隕者說文云從高墜也易曰有隕自天碩者石落也郭云碩猶隕也方俗語有輕重耳湮沈落也下者自上而落也降即下也曲禮謂羽鳥死曰降墜者說文曰從高墜也左傳曰弗敢失墜標者召南云標有梅壽者說文云草曰藹木曰落此對文爾散而言之他物之落亦言藹藹風定之方中云靈雨既零藹零音義同命令禧眡祈請謁訊誥告也釋曰皆謂告諭也命者使告也詩唐風揚之水云我

鯨即鯨字

聞有命令者發號以告也論語云其身正不令而行眡者致告也祈者求告也書召誥云祈天永命請者言告也婚禮五曰請期謁者告白也月令曰謁於天子訊者告問也詩云歌以訊之誥者布告也書大誥洛誥之類是也注禮記曰眡於鬼神釋曰下曲禮文永悠迥遠邊闊遠也永悠迥遠遐也釋曰皆謂遠遠也永者長遠也周南漢廣云江之永矣悠者小雅漸漸之石山川悠遠迥者大雅云洞酌彼行潦迥洞者義同遠者離遠也召南殷其雷云何斯違斯遐者大雅旱麓云遐不作人邊者古文述也闊者相疏遠也邶風擊鼓云于嗟闊兮永悠迥遠四者又為遐也遐亦遠也轉相訓爾注書曰邊矣西土之人釋曰周書牧誓文也虧壞圯堦毀也釋曰皆謂毀敗也虧者損毀祭義云不虧其體壞者人毀也怪音一云自毀也切圯者岸毀也書序曰祖乙圯于耿堦是毀垣也注書曰至語耳釋曰云書曰方命圯族者堯典文孔安國云圯毀族類也言鯨性很戾好此方名命而行事輒毀敗善類云詩曰乘彼坳垣者衛風氓篇文也矢雉引延順薦劉繹尸旅陳也釋曰皆謂敷陳也矢者書序云臯陶矢厥謨引者伸陳也延鋪陳也薦者饌陳也釋者復陳也周頌賚篇云時周之命於繹思尸者主陳也旅者謂布陳也大雅賓之初筵

方命言不用命

云殺核維旅

注禮記曰尸陳也

釋曰郊特牲文

尸職主也

釋曰皆謂

為之主宰也

注左傳至亂階

釋曰云左傳曰殺老牛莫之敢尸者成七

年傳云晉欒書中行偃遂執公焉召韓厥韓厥辭曰昔吾畜於趙氏孟姬之讒

吾能違兵古人有言曰殺老牛莫之敢尸而況君乎二三子不能事君焉用厥

也是其事云詩曰誰其尸之者召南采蘋文又曰職為亂階者小雅巧言文

尸采也采寮官也

釋曰采謂采地王事者必有采地采采也采取賦稅以供

已有采地及言同寮者皆謂居官者也

注官地至為寮 釋曰云官地為寮

者禮運云大夫有采以處其子孫是也云同官為寮者左傳文七年荀林父告

先蔑之辭也

績緒采業服宜貴公事也

釋曰皆事為也績者功事也商頌

云設都于禹之績緒者事業也魯頌閟宮云績大王之緒采者臯陶謨云亮采

有邦業者學人所有事書周官云業廣惟勤服者周南關雎云寤寐思服宜

者宜其事也大雅鳧鷖云公尸來燕來宜貫者魏風碩鼠云三歲貫汝公者周

頌酌篇云實維爾公允師

注論語曰仍舊貫

釋曰先進篇云魯人為長府

閔子騫曰仍舊貫如之何何必改作是也

永秉引延融駿長也

釋曰說文

云長久遠也方言云施於眾長謂之永引者

書律歷志云十史為引引者信

也

古曰信讀其長

延者方言云延季長也凡施於季者謂之延又曰宋衛荆吳

之間曰融駿者長大也

喬嵩崇高也崇充也

釋曰皆高大貌喬周頌般篇

云墮山喬嶽釋山云山大而高崧嵩音義同崇者高貴也亦為充盛樂記云

復綴以崇

注左傳曰師叔楚之崇也

釋曰宣十二年傳文也杜注云師叔

潘廋為楚人所崇貴

犯奢果毅剋捷功肩堪勝也

釋曰皆謂得勝也舍人

曰肩強之勝也孫炎曰戡勝之勝也陵犯誇奢殺敵為果致果為毅剋殺捷獲

有功肩剋堪任是皆得勝也

注左傳至堪黎

釋曰云左傳曰殺敵為果者

宣二年君子辭也

云書曰西伯堪黎者商書篇名也

勝肩戡劉殺剋也

釋曰克亦勝也詩周頌敬之云佛時仔肩毛傳云仔肩克也又為殺也皆謂得

勝而殺之轉互相訓耳

注公羊傳曰克之者何殺之也

曰夏五月鄭伯克段于鄆傳曰克之者何殺之也

劉獮斬刺殺也 釋曰說

文云殺戮也斬者文二年左傳曰狼曠取戈以斬囚餘皆具注

注書曰至之 也 釋曰云書曰成劉厥敵者周書君奭文云秋獵為獮者釋天文云應殺氣

者言秋氣肅殺故名秋獵為獮大司馬中秋教治兵遂以獮田是也云公羊

故傳云此也 躋躋沒孟敦勗劬勉也 釋曰皆謂勸勉也敦者厚相勉也勗者邶風燕燕云以勗寡人劬者勉力也餘見注 注詩曰至未聞釋曰云詩曰躋躋文王者大雅文王文也言勉勉乎不倦文王之勤用明德也云躋沒猶勉勉者以其聲相近方俗語有輕重耳邶風谷風云勉勉同心云書曰茂哉茂哉者臯陶謨文也書作懋懋古今字也云方言云以下者案彼云劬薄勉也秦晉曰劬或曰薄故其鄙語曰薄努猶勉努也南楚之外曰薄努自關而東周鄭之間曰勗劬齊魯曰勗茲是也 驚務昏昏強也 釋曰皆謂自勉強也驚謂馳驚務謂先務二者皆以力勉強孫炎曰昏夙夜之強也注書曰至畏死 釋曰云書曰不昏作勞者盤庚文云昏不畏死者康誥文

爾雅疏卷第一

光緒四年歲在著雍攝提格吳興陸氏十萬卷樓重雕

陸心源校

爾雅疏卷第二

翰林侍講學士朝請大夫守國子祭酒上柱國賜紫金魚袋臣邢昺等奉勅校定

釋詁下

叩吾台予朕身甫余言我也 釋曰我者施身自謂也此皆我之別稱也叩也郭云叩猶媿也語之轉耳說文云女人稱我曰媿由其語轉故曰叩邶風匏有苦葉云人涉叩否吾者孔子曰吾自衛反魯身者我之躬也余者邶谷風云伊余來暨餘皆見注 注書曰至見詩 釋曰云書曰非台小子者湯誓文云古者貴賤皆自稱朕者大禹謨云帝曰朕宅帝位禹曰朕德罔克屈原亦云朕皇考曰伯庸是貴賤皆自稱朕史記秦始皇二十六年定為至尊之稱漢因不改以迄於今云禮記云授政任功曰予一人眡於鬼神曰有某甫者皆下曲禮文云言見詩者周南葛覃云言告師氏言告言歸是也 朕余躬身也 釋曰身即我也郭云今人亦自呼為身舍人曰余謙卑之身也孫炎曰余舒遲之身也僖九年左傳云齊侯曰小白余杜注云小白齊侯名余身也邶谷風云我躬不閱 台朕資界十陽予也 釋曰予即與也皆謂賜與台者遺與也讀

與貽同朕者我與之也賚畀上皆賜與也說命云夢帝賚子良弼彫風于旄云何以畀之小雅天保云君曰卜爾萬壽無疆注與猶至阿陽釋曰云與猶予也因通其名耳者說文云與黨與也予推予前人也象兩手相與之形今經典多以與爲推予故云因通其名耳云魯詩云陽如之何者漢書藝文志云魯申公爲詩訓故是爲魯詩其經云陽如之何申公以陽爲予故引之云今巴濮之人自呼阿陽者以時驗而言也肅延誘薦餼晉寅蓋進也釋曰皆謂進道延者引而進之射義云子路出延射誘者道而進之也召南野有死麇云吉士誘之薦者進獻也月令云先薦寢廟餘皆見注注禮記至進也釋曰云禮記曰主人肅客者上曲禮文也鄭注云進客謂道之云詩曰亂是用餼者小雅巧言文云王之蓋臣者大雅王文云易曰晉進也者晉封豕辭也羞餼迪烝進也注皆見詩禮釋曰謂進與也羞者曲禮云聞子有客使某羞餼者進飲食之名也迪者以道而進也烝者周頌豐年云烝畀祖妣詔亮左右相導也詔相導左右助勸也亮介尚右也左右亮也釋曰詔者大宗伯云詔相王之大禮亮者大雅大明云涼彼武王左右者周南關雎云左右流之相者鄉飲酒云相者二人此皆謂教導之也教導卽贊勉也故又爲勸說文云勸

助也不以力助以心助也郭云紹介勸尙皆相佑助孫炎曰介者相助之義如人之左右手故以介爲左右也大雅生民云攸介攸止故轉爲右左右卽亮也亦皆謂佐助反覆相訓以盡其義亮涼音義同緝熙烈顯昭頌光也釋曰顯者光明也大雅假樂云顯顯令德說文云昭日明也大雅雲漢云昭回于天皓者亦日光也頌火光也小雅無將大車云不出于頌注詩曰至烈光釋曰云學有緝熙于光明者周頌敬之文又曰休有烈光周頌載見文劬鞏堅篤擊虔膠固也釋曰皆牢固也劬者確固也鞏者說文云以革有所束也堅者剛彊之固也論語曰不曰堅乎磨而不磷篤者厚也物厚者牢固擊者擊亦牢固之意虔者恭之固也膠著所以固物小雅隰桑云德音孔膠注劬虔至志也釋曰云劬虔皆見詩書者酒誥云劬毖殷獻臣大雅韓奕云虔共爾位云易曰鞏用黃牛之革固志也者案革卦云初九鞏用黃牛之革遯卦六二象曰執用黃牛固志也文與此異然則郭云固志者所以釋革卦之鞏非謂遯之固志疇孰誰也釋曰皆謂語辭不爲義也又猶言誰人也論語云君孰與不足陳風墓門云誰昔然矣注易曰疇離祉釋曰否卦九四爻辭也睢睢皇皇藐藐穆穆休嘉珍禕鏤美也釋曰皆謂美盛也少儀云祭祀之

美齊齊皇皇鄭玄云皇皇讀如歸往之往彼言皇皇則此咻咻也少儀又云言語之美穆穆皇皇曲禮云天子穆穆諸侯皇皇鄭注皆云形容止之貌然則皇皇穆穆者皆言語容止之美盛也大雅崧高云既成藐藐毛傳云藐藐美貌休者大禹謨云戒之用休又曰嘉乃丕績儒行云席上之珍以待聘禕者歎美也懿者周頌時邁云我求懿德鑠者周頌酌篇云於鑠王師是皆謂美之常語爾諧輯協和也關關雝雝音聲和也總變和也釋曰皆謂和同協者說文云衆之同和也關關雝雝者皆鳥鳴音聲相和也周南關雎云關關雎鳩邠風匏有苦葉云雝雝鳴鴈總即古文協字注書曰至柔克釋曰書曰八音克諧虞書舜典文云左傳曰百姓輯睦者案僖十五年及成十六年皆云羣臣輯睦其是乎云書曰變友柔克者周書洪範文從申神加弼崇重也釋曰隨從申重加增弼輔崇充皆所以爲重疊也大雅鳧鷖云福祿來崇穀悉卒泯忽滅罄空畢罄殲拔殄盡也注穀今至見詩釋曰此皆謂終盡穀今直語耳忽然盡貌左傳曰臯陶庭堅不祀忽諸云今江東呼厭極爲罄者以時驗而言也說文云器中盡也云餘皆見詩者悉者說文云詳盡也卒者終盡也衛風日月云畜我不卒泯者滅盡也大雅桑柔云靡國不泯滅絕盡也小雅正月云寧或

滅之罄者說文云器中空也小雅蓼莪云餅之罄矣空者小雅大東云杼柚其空畢者小雅無羊云畢來既升殲者舍人曰衆之盡也秦風黃鳥云殲我良人拔者牽除使盡也殄者詩云邦國殄瘁苞蕪茂豐也釋曰皆豐盛也苞者草木叢生也禹貢云草木漸苞蕪者繁蕪也洪範云庶草蕃蕪蕪音義同茂者茂盛也小雅天保云如松柏之茂擊斂屈收戢蒐哀鳩樓聚也釋曰皆會聚也斂者率聚也禮記大學曰百乘之家不畜聚斂之臣收者周頌維天之命云我其收之戢者藏聚也周頌時邁云載戢干戈餘皆見注注禮記至聚也釋曰云禮記曰秋之言擊斂也者鄉飲酒義文云春獵爲蒐蒐者以其聚人衆也者春獵爲蒐釋天文也云詩曰屈此羣醜者魯頌泮水文云原隰哀矣者小雅常棣文云左傳曰以鳩其民者隱八年文云樓猶今言拘樓聚也者以時驗而言也肅齊遄速亟屢數迅疾也釋曰皆謂急疾也肅者召南小星云肅肅宵征毛傳云肅肅疾貌齊者壯疾也遄者邶風泉水云遄臻于衛速者論語云無欲速亟者切論語曰好從事而亟失時云亟居力大雅靈臺云匪亟其欲屢者小雅巧言云君子屢盟數者祭義云祭不欲數迅者疾走也論語云迅雷風烈必變注詩曰仲山甫徂齊釋曰大雅烝民文建駿

肅亟遄速也 釋曰速亦疾也肅亟遄轉相訓耳駿者猶迅也禮記大傳云逡
奔走駿遠音義同鄭注云疾奔走言勸事也 注詩曰不逮故也 釋曰鄭風
遵大路文 壑阮阮滕微隍濂虛也 釋曰皆謂空虛也壑者豁壑也大雅韓
奕云實墉實壑阮阮者坎陷之虛也但重言耳隍者城池無水者易曰城復于
隍濂者注引方言云康之言空也彼注云濂窶空貌亦丘墟之空無小雅賓之
初筵云酌彼康爵鄭箋云康虛也濂康音義同黎庶烝多醜師旅衆也 釋
曰皆謂衆夥也注云皆見詩者大雅雲漢云周餘黎民靈臺云庶民子來烝
民云天生烝民周頌載見云思皇多祐大雅縣篇云戎醜猶行棫樸云六師及
之小雅采芑云振旅闐闐之類是也 洋觀哀衆那多也 釋曰皆謂重多也
洋者洋溢亦多貌魯頌闕宮云萬舞洋洋哀者聚之多也易曰君子以哀多益
寡衆者周頌臣工云命我衆人 注詩曰至不那 釋曰詩曰薄言觀者小雅
采芣文又曰受福不那者桑扈文 流差束擇也 釋曰皆選擇也周南關雎
云左右流之小雅吉日云既差我馬邶風云簡兮簡兮皆是也簡束音義同
戰慄震驚懃竦恐懼也 釋曰皆惶怖也論語曰使民戰栗詩秦風黃鳥云
惴惴其慄易曰震來虩虩又曰驚遠而懼邇也詩云不難不竦月令曰國時

有恐樂記曰柔氣不懾是皆懼也惴即懾也 注詩曰不懃不竦 釋曰商頌
長發文也 痛瘡虺積玄黃劬勞咎頽瘡痲戮癩癩痺痒疢疢閔逐疢疢
瘡非瘡瘵瘵病也 釋曰疾甚曰病此皆病之通名耳孫炎曰痛人疲不能
行之病瘡馬疲不能進之病虺積馬罷不能升高之病玄黃馬更黃色之病然
則虺積者病之狀玄黃者病之變色郭云皆人病之通名而說者便爲之馬病
失其義也蓋指孫炎不能弘通故云失其義也咎者罪病也頽者小雅雨無正
云維躬是瘁頽瘁音義同瘡者勞苦之病也瘡者小雅角弓云交相爲瘡戮者
相戮辱亦可恥病也瘵及痒者小雅正月云瘵憂以痒舍人云瘵癩痺痒皆心
憂憊之病也孫炎云瘵者畏之病也瘵者小雅十月云悠悠我里瘵里音義同
瘵者孫炎云滯之病也小雅白華云俾我瘵兮疵者瑕釁小病也閔者幽風鴟
鳴云鬻子之閔斯逐者衛風考槃云碩人之軸鄭箋云軸病也軸與逐蓋今古
字郭氏未詳瘵者小雅采芣云憂心孔疚瘵者小雅十月云亦孔之瘵瘵者節
南山云天方薦瘵瘵者四月云百卉具腓瘵音義同瘵者大雅板篇云下民
卒瘵瘵者大雅瞻卬云士民其瘵瘵者大雅桑柔云瘵此下民餘皆見注 注
詩曰至見詩 釋曰云生我劬勞者小雅蓼莪文云書曰智藏瘵在者周書召

誥文云今江東呼病曰瘵者以時驗而言云東齊曰瘵者方言文云禮記曰親
瘵色容不盛者玉藻文 恙寫惺肝繇慘恤罹憂也 釋曰皆謂憂愁也恙
者聘禮云公問君賓對公再拜鄭注云拜其無恙郭云今人云無恙謂無憂也
寫者有憂者思散寫也小雅車牽云我心寫兮繇者繇役亦為憂愁慘者心
憂也恤者小雅祈父云胡轉予于恤罹者王風兔爰云逢此百罹 注詩曰至
肝矣 釋曰云詩曰悠悠我惺者小雅十月文云何肝矣者卷耳及都人士文
也 倫勤叩敕勤愉瘳瘳勞也 釋曰皆謂勞苦也倫者理也理治事務者必
勞勤者廣雅云苦也孫炎曰習事之勞也敕者相約敕也亦為勞苦勤者勞力
也梓材云既勤垣墉愉者懶也郭云勞苦者多惰愉今字或作夙同庸者民功
曰庸輝者說文云勞病也 注詩曰至庸者 釋曰云詩曰莫知我勤者小雅
雨無正文云維王之邛者巧言文云哀我瘳人者大東文云國語曰無功庸者
案晉語韓獻子老使公族穆子受事於朝辭曰厲公之亂無忌備公族不能死
臣聞之曰無功庸者不敢居高位今無忌智不能匡君使至於難仁不能救勇
不能死敢辱君朝以忝韓宗請退也固辭不立悼公聞之曰難雖不能死而能
讓不可不賞使掌公族大夫是其事也 勞來強事謂翦篲勤也 釋曰皆謂

勤勞也勞來者以其有勤勞也自勉強者亦為勤由能事事有功者亦為勤
注詩曰職勞不來迨其謂之 釋曰云職勞不來者小雅大東文人以不被勞
來者為不見勤故采薇序曰杖杜以勤歸即是勞來也云迨其謂之者召南標
有梅文也 悠傷憂思也 釋曰皆感思也悠者秦風渭陽云悠悠我思傷者
周南卷耳云維以不永傷憂者愁思也 懷惟慮願念愁思也 釋曰皆思念
也方言云鬱悠懷愁惟慮願念靖慎思也音采衛魯之間謂之鬱悠惟凡思
也慮謀思也願欲思也念常思也東齊海岱之間曰靖秦晉或曰慎凡思之貌
亦曰慎或曰怒舍人曰怒志而不得之思也 注詩曰怒如調飢 釋曰周南
汝墳文 祿社履戩祿禡祜福也 釋曰皆福祜也福祿對文則小異散
則祿亦福也商頌玄鳥云百祿是何鄭箋謂當檐負天之多福祜者繁多之
福也周頌烈文云錫茲祉福祜者小雅信南山云受天之祜 注詩曰至康矣
釋曰云詩曰福履綏之者周南樛木文云俾爾戩穀者小雅天保文云祿祿康
矣者大雅卷阿文 禋祀祠蒸嘗禴祭也 釋曰皆祭之別名祭際也人神交
際說文云從示從又從肉又手也以手持肉示神所以祭也禋者說文云絜祀
也祀者說文云祭無已也餘者四時祭名疏具釋天 注書曰禋于六宗 釋

曰虞書舜典文孔安國云精意以享謂之禋宗尊也所尊祭者其祀有六謂四時也寒暑也日也月也星也水旱也 儼恪祇翼謹恭欽寅煇敬也 釋曰皆謂謹敬也儼者郭云儼然敬貌論語云儼然人望而畏之恪者心敬也周書微子之命云恪慎克孝祇者虞書大禹謨云祇承于帝翼者小心之敬也云恭者敬貌也大雅桑柔云温温恭人欽者堯典云欽若昊天 注書曰至煇矣 釋曰云書曰夙夜惟寅者虞書舜典文云詩曰我孔熯矣者小雅楚茨文 朝且夙晨峻早也 釋曰早者說文云晨也從日在甲上十古文甲字今即以不晚為早朝者鄘風蟋蟀云崇朝其雨毛傳云崇終也從旦至食時為終朝旦者說文云明也從日在一上一地也陳風東門之枌云穀旦于差夙者齊風東方未明云不夙則莫晨者說文云晨昧爽也東方未明云不能晨夜峻亦明之早也 頌族替戾辰止後待也 釋曰皆相待也頌者邶風匏有苦葉云卬須我友族者齊風著篇云俟我于著乎而頌須族俟音義同替戾辰者郭云皆止也止亦相待 注書曰後我后 釋曰商書大甲文 喙幾裁殆危也 釋曰皆危險也說文云危在高而懼幾者幾猶殆也周書顧命云無以釗冒貢于非幾殆者小雅節南山云無小人殆 譏汔也 釋曰說文云剗摩也郭讀譏為剗云謂

相摩近孫炎云汔近也大雅民勞云 汔可小康鄭箋云汔幾也反覆相訓故汔得為幾也昭二十年左傳亦引此詩杜預云汔期也然則期字雖別皆是近義言其近當如此史記稱漢高祖欲廢大子周昌曰臣口不能言然臣期知其不可陛下雖欲廢大子臣期不奉詔言期者意亦與此同也 治肆古故也 釋曰肆之為故語更端辭也商書湯誥曰肆台小子古之為故謂舊故也周頌良耜云續古之人 肆故今也 釋曰詩大雅縣篇云肆不殄厥愠毛傳云肆故今也即以肆之一字為故今因上起下之語郭氏字別為義云肆既為故又為今今亦為故故亦為今此義相反而兼通者事例在下在下者謂在下文徂在存也注 惇直祐篤擊仍毗埤竺腹厚也 釋曰皆重厚也惇者周書武成云惇信明義直者誠之厚也大雅桑柔云逢天憚怒小雅天保云俾爾單厚周頌昊天有成命云單厥心皆訓厚也直憚單音義同祐者福厚也篤者周頌維天之命云曾孫篤之擊然厚貌類仍埤益毗輔皆重厚釋天云仍飢為荐邶風北門云政事一埤益我小雅節南山云天子是毗又采菽云福祿膍之毗毗膍音義同竺與篤同腹者小雅蓼莪云出入腹我月令云水澤腹堅 載謨食詐偽也 釋曰皆虛偽也郭云載者言而不信謨者謀而不忠者以載詰為言謨

為謀今又為偽故以為言而不信謀而不忠不信不忠則是偽也食者孫炎曰
 食言之偽也哀二十五年左傳云孟武伯惡郭重曰何肥也公曰是食言多矣
 能無肥乎然則言而不行如食之消盡後終不行前言為偽故通謂偽言為食
 言故此訓食為偽也詐者方言云膠譎詐也涼州西南之間曰膠自關而東西
 或曰譎或曰膠詐通語也 注書曰朕不食言 釋曰商書湯誥文 話猷載
 行訛言也 釋曰皆謂言辭也話者善言也孫炎曰善人之言也猷者道也道
 亦言也載者載於簡策之言也郭云今江東通謂語為行世以妖言為訛 注
 詩曰至之載 釋曰云詩曰慎爾出話者大雅抑篇文云周禮曰作盟詛之載
 者春官詛祝職文也 邁逢遇也邁逢遇避也邁逢遇避見也 釋曰皆謂相
 遭遇觸避而相見也召南草蟲云亦既邁止周書洪範云子孫其逢吉鄭風野
 有蔓草云邂逅相遇轉復相訓三者又為相觸避邁逢遇避四者皆行而相值
 之名行而相值即見也故又為見 顯昭覲釗覲見也 釋曰顯昭皆明見也
 周頌敬之云天維顯思又時邁云明昭有周覲釗覲者皆下見上也曲禮云天
 子當依而立諸侯北面而見天子曰覲郊特牲云不敢私覲 注逸書曰釗我
 周王 釋曰不在今尚書之內故曰逸 監瞻臨泣規相視也 釋曰皆謂察

視也小雅節南山云何用不監又曰民具爾瞻大雅大明云上帝臨女文王世
 子云成王幼不能泣詐規者考工記云琢圭璋八寸璧琮八寸以規聘鄭注云
 規視也聘問也眾來曰規特來曰聘相者小雅小弁云相彼投兔 鞫誦溢盈
 也 釋曰皆謂盈多誦訟滿溢皆盈多也 注詩曰降此鞫誦 釋曰小雅節
 南山文毛傳云鞫盈誦訟也鄭箋云盈猶多也以盈者必多故鄭轉云盈猶多
 也 孔魄哉延虛無之言間也 釋曰間謂閒隙也孔者孔穴小雅角弓云如
 酌孔取魄者形也謂月之無光之處名魄也康誥云惟三月哉生魄延者今墓
 道也虛無者空無所有也是皆有閒隙也 瘞幽隱匿蔽竄微也 釋曰微
 謂逃藏也瘞者埋藏之微也幽者深微也隱者潛隱而微也匿者舍人曰藏之
 微也蔽者覆障使微也竄者行之微是皆微昧不顯揚也 注左傳曰其徒微
 之是也 釋曰案昭十七年傳云楚白公勝作亂殺子西子期葉公子高至遇
 箴尹固帥其屬將與白公子高曰微二子者楚不國矣棄德從賊其可保乎乃
 從葉公使與國人以攻白公白公奔山而縊其徒微之是也 訖徽安懷安按
 替戾底底尼定曷遏止也 釋曰皆謂止住也訖者終止也安者坐止也懷至
 止也安休止也抑按替廢皆止住也大雅云以按徂旅小雅云勿替引之定

者靜止也曷者俗以抑止爲曷今以逆相止爲過餘皆見注 注戾底至尼之
釋曰云戾底義見詩者小雅采芣云亦是戾矣底者在物之下是亦止也凡注
言見詩今毛詩無者蓋在齊魯韓詩也云國語曰戾久將底者案晉語云文
公在翟十二年狐偃曰日吾來此也非以翟爲榮可以成事也吾曰奔而易達
困而有資休以擇利可以戾也今戾久矣戾久將底底著滯淫誰能與之盡速
行乎是其事也云孟子曰行或尼之者案孟子魯平公將見孟子嬖人臧倉止
之樂正子見孟子曰克告於君君爲來見也嬖人有臧倉沮君君是以不來也
曰行或使之止或尼之行止非大所能也吾之不遇魯侯天也臧氏之子焉能
使予不遇哉是其事也此云行或尼之者所見本異或傳寫誤 豫射獸也
注詩曰服之無斃 釋曰謂獸倦也云詩曰者周南葛覃文也 烈績業也
釋曰謂功業也烈者周頌執競云無競維烈績者大雅文王有聲云維禹之績
績勲功也 釋曰謂功勞也績者虞書大禹謨云嘉乃丕績勲者案周禮司勲
職云王功曰勲鄭注云輔成王業若周公 功績質登平明考就成也 釋曰
皆謂成濟也勲功績業皆有成也事有分明亦成濟也舜典云三載考績周頌
敬之云日就月將皆言成功也 注詩曰至成也 釋曰云詩曰質爾民人者

大雅抑篇文云禮記曰年穀不登者下曲禮文云穀梁傳曰平者成也者宣十
五年文也 梏梗較頹庭道直也 釋曰梏梗較頹皆正直也庭條直也道者
頹道無所屈 注詩曰既庭且碩 釋曰小雅大田文 密康靜也 釋曰皆
安靜也周頌昊天有成命夙夜基命宥密大雅生民云不康禋祀 豫寧綏康
柔安也 釋曰皆安樂也大雅板篇云不敢戲豫虞書大禹謨云萬邦咸寧
商書大甲云撫綏萬邦大雅民勞云汔可小康虞書舜典云柔遠能迓 平均
夷弟易也 釋曰易者不難也和平均一皆易直也周頌天作云岐有夷之行
大雅洞酌云豈弟君子 矢弛也弛易也 釋曰郭云弛放也以弓釋弦曰弛
故云弛放禮記雜記云一張一弛弛又爲易謂相延易也 希寡鮮罕也鮮
寡也 釋曰皆簡少之稱也論語云希不失矣易說卦云翼爲寡髮大雅抑
篇云鮮不爲則郭云罕亦希也鄭風大叔于田云叔發罕忌鮮又爲寡轉互
相訓皆謂希少爾 酬酢侑報也 釋曰皆相報答也郭云此通謂相報答不
主于飲酒者以飲酒之禮主人酌酒於賓曰獻賓既卒爵洗而酌主人曰酢主
人既卒酢爵又酌自飲卒爵復酌進賓曰酬故說者以酬酢主謂飲酒相報答
郭以易繫辭云可與酬酢謂應對萬物也小雅楚茨云萬壽攸酢是神報主

人也故云不主于飲酒侑者案公食大夫禮賓三飯之後云公受宰夫束帛以
侑注云束帛十端帛也侑猶勸也主國君以為食賓殷勤之意未至復發幣
以勸之欲其深安賓也是侑者主人所以報賓也 毗劉暴樂也 釋曰舍人
曰毗劉暴樂之意也木枝葉稀疎不均為暴樂郭云謂樹葉缺落蔭跡暴樂見
詩者大雅桑柔云捋采其劉毛傳云劉爆燥而希也是矣 覲髮鬣離也 釋
曰郭云謂草木之叢茸翳蒼也弗離即彌離彌離猶蒙龍耳孫叔然字別為義
失矣郭以時驗而為此解孫氏毒字各別為義故云失矣 蠱詔貳疑也 釋
曰皆謂疑惑也郭云蠱惑有貳心者皆疑也者案昭元年左傳晉趙孟問於醫
和曰何謂蠱對曰淫溺惑亂之所生也於文皿蟲為蠱穀之飛亦為蠱在周易
女惑男風落山謂之蠱是蠱惑也貳者心疑不一也大雅大明云無貳尔心毛
傳云無敢懷貳心也云左傳曰天命不諂者哀十七年葉公子高辭也 楨翰
儀榦也 釋曰舍人曰楨正也築牆所立兩木也翰所以當牆兩邊障土者也
大雅生民云維周之楨又崧高云維周之翰儀表亦體榦也 弼棊輔比備
也 釋曰備猶輔也弼者商書說命云夢帝顛予良弼棊者周書康誥云天威
棊忱輔者商書湯誓云爾尙輔予一人比者易比卦象云比輔也 疆界邊衛圍

垂也 釋曰謂四垂也郭云疆場竟界邊旁營衛守圍皆在外垂也舍人曰圍拒
邊垂也孫炎曰圍國之四垂也 注左傳曰聊以固吾圍也 釋曰隱十一年鄭伯
辭也 昌敵疆應丁當也 釋曰皆相當也昌者言當也敵者仇匹相當也文
六年左傳曰敵惠敵怨疆者好與物相當值應者對當也大雅下武云應侯順
德丁者雲漢云寧丁我躬 注書曰禹拜昌言 釋曰虞書大禹謨文 淳肩
搖動蠢迪倮厲作也 釋曰皆興作也倮然興作貌莊公十二年左傳云禹湯罪
已其興也倮焉肩者勝任之作也搖者考工記矢人云夾而搖之以視其豐殺
之節也動者商書咸有一德云德惟一動罔不吉蠢者鄉飲酒義云春之為言
蠢也倮者始作也厲者方言云厲叩為也甌越曰叩吳曰厲為亦作也 注公
羊至樂矣 釋曰云公羊傳曰倮甚也者隱九年云三月庚辰大雨雪何以書
記異也何異爾倮甚也云穀梁傳曰始厲樂矣者隱五年云九月考仲子之宮
初獻六羽始僭樂矣孔子曰舞夏自天子至諸侯皆用八佾初獻六羽始厲樂
矣 茲斯咨皆已此也 釋曰此者對彼之稱言近在是也茲者虞書大禹謨
云念茲在茲斯者召南殷其雷云何斯違斯咨與茲同皆已與此皆音相近故
得為此也郭云皆已皆方俗異語 嗟咨嗟也 釋曰皆歎也周南卷耳云嗟

我懷人堯典云疇咨若時登庸郭云今河北人云嗟歎閑狎串貫習也 釋
曰皆便習也莊二十二年左傳曰赦其不閑於教訓曲禮曰賢者狎而敬之大
雅皇矣云串夷載路齊風猗嗟云射則貫兮皆是言也郭云串厭串貫貫伏也
今俗語皆然者當東晉時有此厭串貫伏之語故以為證也 曩塵佇淹留久
也 釋曰曩曩塵垢佇企淹滯留止皆稽久也通見詩書 逮及暨與也 釋
曰皆相親與也郭云公羊傳曰會及暨皆與也者隱元年文也云逮亦及也者
方言文 隲假格陟躋登陞也 釋曰皆謂陞上陟者周南卷耳云陟彼高岡
餘見注 注方言至陞也 釋曰云方言曰者案彼云躡躡音躡音躡音躡音
登也自關而西秦晉之間曰躡東齊海岱之間謂之躡魯衛曰鄆梁益之間曰
裕或曰跋躡鄆格裕音義同云禮記曰天子登遐者下曲禮文云公羊傳曰躡
者何陞也者文公二年文也 揮盪歇涸竭也 釋曰皆謂竭盡也揮者郭云
揮振去水亦為竭曲禮曰執玉器者弗揮是也盪即漉也郭云歇通語謂歇即
竭之通語也涸水竭也 注月令至成梁 釋曰云月令云無漉陂池者案月
令仲春之月是月也無竭川澤無漉陂池無焚山林鄭注云順陽養物也畜水
曰陂穿地通水曰池云國語曰水涸而成 梁者案周語定王使單襄公聘於

宋遂假道於陳以聘楚單子歸告王曰陳侯不有大咎國必亡王曰何故對曰
夫辰角見而雨畢天根見而水涸本見而草木節解駟見而隕霜火見而清風
戒寒故先王之教曰雨畢而除道水涸而成梁草木節解而備藏隕霜而冬
裘具清風至而脩城郭宮室今陳國火朝覲矣而道路若塞野場若棄澤不陂
障川無舟梁是廢先王之教也引之者證涸為水竭 桓拭刷清也 釋曰郭
云振訊拭拭埽刷皆所以為潔清禮記喪天記云柩用巾哀十四年公羊傳云
反袂拭面周禮凌人職云夏頒冰掌事秋刷後鄭云秋涼冰不用可以清除其
室 鴻昏於顯閒代也 注鴻鴈至相代 釋曰皆謂更代也云鴻鴈知運代
者鴻鴈之屬九月而南正月而北是知其時運而更代南北也云昏主代明者
釋經昏字也日入後二刻半為昏昏來則明往故云昏主代明云明亦代昏者
釋經顯也顯即明也云閒錯亦相代者謂閒厠交錯亦相更代也儀禮鄉飲酒
云乃閒歌魚麗鄭注云閒代也謂一歌則一吹是也又周頌桓篇云皇以閒之
饁饗饋也 釋曰饋者以食遺與也野饋曰饁舍人曰饗自家之野也 注國
語曰其妻饁之 釋曰晉語云曰季使舍於冀野冀缺耨其妻饁之敬相代如
賓從而問之冀芮之子也與之歸既復命而進之曰臣得賢父敢以告是也 遷

運徙也 釋曰皆謂移徙也大雅皇矣云帝遷明德易曰日月運行郭云今江東通言遷徙者時驗而言也 秉拱執也 釋曰皆謂持執也周書金縢云植辭秉珪郭云兩手持爲拱老子云雖有拱璧 厥熙興也 釋曰皆謂興作郭云書曰庶績咸熙者虞書舜典文云厥見周官者周官卽周禮也笙師職云大喪厥其樂器鄭注厥興也興謂作之 衛蹶假嘉也 釋曰謂嘉美也郭云詩序曰假樂嘉成王也者大雅假樂篇序也 廢稅赦舍也 釋曰皆舍置也廢者宣八年公羊傳云廢其無聲者赦者放置也虞書舜典云胥火肆赦郭云詩曰召伯所稅者召南甘棠文也 棲遲慙休苦歛歛四息也 釋曰皆止息也舍人曰棲遲行步之息郭云棲遲遊息也陳風衡門云衡門之下可以棲遲慙者召南甘棠云召伯所慙休者止而息也周南漢廣云不可休息苦者郭云苦勞者宜止息歛歛四者郭云皆氣息貌案方言云飽齟喙四息也周鄭宋沛之間曰飽自關而西秦晉之間或曰喙或曰飽東齊曰四故郭云今東齊呼息爲四也 供峙共具也 釋曰皆謂備具也供者論語云子路共之供共音義同時者周書費誓云峙乃糗糧周頌臣工云峙乃錢鋪峙序音義同共者小雅小旻云靖共爾位 煤憐惠愛也 釋曰愛謂寵惜也方言云憐切掩

音憐牟愛也韓鄭曰憐晉衛曰掩汝穎之間曰憐宋魯之間曰牟秦或曰憐憐通語也故郭云煤韓鄭語今江東通呼爲憐煤憐音義同惠者仁愛也邶此風云惠而好我 娠蠢震難妯騷感訛蹶動也 釋曰皆謂動作娠者說文云妊娠動也郭云娠猶震也者以大雅生民云載震載夙昭元年左傳曰邑姜方震大叔哀元年左傳曰后緡方震皆謂有身爲震故云娠猶震也蠢者郭云蠢難騷蹶自搖動貌小雅采芑云蠢爾蠻荆震者大雅常武云震驚徐方難者恐動也商頌長發云不難不竦騷者大雅常武云徐方釋騷蹶者大雅絲篇云文王蹶厥生 一注詩曰至或訛 釋曰云詩曰憂心且妯者小雅鼓鍾文云無感我悅兮者召南野有死麕文云或寢或訛者小雅無羊文 覆察副審也 釋曰郭云覆校察視副長皆所爲審諦覆者月令季春云命舟牧覆舟五覆五反察者周書呂刑云惟察惟法副者次長之稱 契滅殄絕也 釋曰皆謂斷絕契者郭云今江東呼刻斷爲契斷定九年左傳曰盡借邑人之車契其軸杜注云契刻也滅者小雅正月云寧或滅之殄者大雅桑柔云不殄心憂 郡臻仍迺侯乃也 釋曰乃語辭也迺乃音義同大雅絲篇云迺慰迺止是也 迪繇訓道也 釋曰虞書大禹謨云惠迪吉小雅巧言云秩秩大猷猷繇音義同周

書顧命云命汝嗣訓 僉成胥皆也 釋曰謂眾皆也 舜典云僉曰伯禹作司
空商書云咸有一德郭云東齊曰胥見方言者案方言云僉胥皆也自山而
東五國之郊曰命東齊曰胥是也 胥孟者艾正伯長也 釋曰皆謂長上也
郭云胥養亦為長邾谷風云既生既育鄭箋云育謂長老也孟庶長也又周書
康誥云王若曰孟侯孔安國云孟長也五侯之長者艾皆老長也曲禮曰五十
曰艾服官政六十曰耆指使正伯皆官長大雅雲漢云以戾庶正盤庚云邦伯
師長 艾歷也 釋曰艾又為歷郭云長者多更歷 歷秭算數也 釋曰
皆算數也郭云歷歷數也推律所生之數虞書大禹謨云天之歷數在汝躬秭
者周頌豐年云萬億及秭毛傳云數億至萬曰億數億至億曰秭郭云今以十
億為秭者以時驗而言也 注論語云何足算也 釋曰案論語子貢問曰今
之從政者何如子曰噫斗筭之人何足算也鄭曰算數也 歷傅也 釋曰謂
傅近也隱十一年左傳云庚辰傅於許 艾歷覲胥相也 釋曰皆謂相共也
覲者郭云覲謂相視也說文云覲邪視也郭云公羊傳曰胥盟者何相盟也者
桓三年文 又亂靖神弗渥治也 注論語至詩書 釋曰皆治理也舍人曰
亂義之治也孫炎曰亂治之理也云論語曰子有亂臣十人者泰伯篇文也渥

書序作汨音同耳者虞書序云帝釐下土方設居方別生分類作汨作孔傳云
汨治作興也言其治民之功興故為汨作之篇亡云餘並見詩書者舜典云有
能俾又小雅苑柳云俾予靖之大雅生民云第厥豐草弗弗音義同 頤艾
育養也 釋曰頤者易曰頤貞吉育者易无妄象曰先王以茂對時育萬物郭
云汝頤梁宋之間曰艾方言云者案方言云台胎陶鞠養也晉衛燕魏曰台音
陳楚韓鄭之間曰鞠秦或曰陶汝頤梁宋之間曰胎或曰艾是也 汰渾隕墜
也 釋曰皆墜落也郭云汰渾皆水落貌春秋僖公十六年經云星隕如雨
際接昶捷也 釋曰郭云捷謂相接續也際者相會之捷也左傳曰爾未際也
小雅苑柳云無自瘵焉鄭箋云瘵接也接者曾子問云接祭而已謂捷速而
祭也昶者未詳 愆神溢慎也 釋曰謂謹慎也愆者周書洛誥云夙夜愆祀
溢者舍人曰溢行之慎周頌維天之命云假以溢我故注云見詩書 鬱陶繇
喜也 注孟子至字耳 釋曰皆謂歡悅鬱陶者心初悅而未暢之意也云孟
子曰鬱陶思君者案孟子云象往入舜宮舜在牀琴曰鬱陶思君爾忸怩趙氏
注云象見舜生在牀鼓琴愕然反辭曰我鬱陶思君故來爾辭也忸怩而慙是
其情也云禮記曰人喜則斯陶陶斯詠詠斯猶者下檀弓文鄭注云陶鬱陶也

咏嘔也猶當為搖聲之誤也搖謂身動搖也秦人猶搖聲相近云猶即繇也古
今字耳者言禮記猶即此輕繇也古今字異耳 馘齊獲也 釋曰皆謂克獲
也郭云今以獲賊耳為馘者大雅皇矣云攸馘安安毛傳云不服者殺而獻其
左耳曰馘魯頌泮水云在泮獻馘鄭箋云馘所格者之左耳皆謂臨陳格殺之
而取其耳也 云獲禾為穡者小雅大田云此有不斂穡穡者禾之鋪而未束故
云獲禾為穡是並見詩也 阻艱難也 釋曰皆險難也秦風蒹葭云道阻且
長商書說命云非知之艱 剡矜利也 釋曰皆矜利之利也小雅大田云以我覃
耜剡覃音義同周頌載芟云有略其耜矜略音義同 允任壬佞也 釋曰皆
謂詔佞也允信也佞人似信任者孫炎云似可任之佞也虞書舜典云而難任
人壬猶任也臯陶謨云何畏乎巧言令色孔壬 俾拚拚使也俾拚拚使從也
釋曰皆謂使今隨從也郭云見詩者魯頌閟宮云俾爾熾而昌大雅桑柔云莽
云不逮拚莽音義同拚義亦同此皆為使令也俾拚拚使四者又為隨從
儻仍因也 釋曰皆因緣也費誓曰無敢寇攘鄭注云因其亡失曰攘儻攘音
義同施博士讀曰襄周書君奭云襄我二人郭無明說義得兩通論語云仍舊
貫 董督正也 釋曰皆謂御正也虞書大禹謨云董之用威春秋僖公十二

年左傳云謂督不忘享孝也 釋曰享祀孝道也小雅信南山云享於祖考
珍享獻也 釋曰致物於尊者曰獻珍者珍物宜獻也享者周禮六行人云廟
中將幣三享鄭司農云三享三獻也郭云穀梁傳曰諸侯不享覲者僖五年文
縱縮亂也 釋曰縱放掣縮皆亂法也大雅民勞云無縱詭隨 探篡俘取也
釋曰郭云探者摸取也篡者奪取也李巡曰囚敵曰俘伐執之曰取注云書曰
俘厥寶玉者商書序云夏師敗績湯遂從之逐伐三股俘厥寶玉孔氏云俘取
也 徂在存也 釋曰鄭風出其東門云匪我思且鄭箋云非我思存也徂且
音義同在訓存者常語也上云徂往也往則非存故郭氏引類以曉人也云美
惡不嫌同名者案隱七年公羊傳云貴賤不嫌同號美惡不嫌同辭何休云若
繼體君亦稱即位繼弒君亦稱即位皆有起文美惡不嫌同辭是也若此篇往
也死也亦稱徂是惡也存也亦稱徂是美也各首其義故云美惡不嫌同名
在存省士察也 釋曰謂審祭也虞書舜典云在璿璣玉衡以齊七政存即在
也省謂視察論語云吾日三省吾身士者理獄之官亦主聽察虞書舜典舜命
臯陶云汝作士 烈枿餘也 釋曰謂遺餘也詩大雅雲漢序云宣王承厲王
之烈李巡曰枿槁木之餘也商書盤庚云若顛木之有由蘖枿音義同郭

云晉衛之間曰藁陳鄭之間曰烈者方言文 迓迎也 釋曰謂相逢逆也郭
云公羊傳曰跛者迓跛者此成二年傳文案彼云晉卻克與臧孫許同時而聘
于齊蕭同姪子者齊君之母也踊于楛而窺客則客或跛或眇於是使跛者迓
跛者眇者迓眇者是也引之以證迓爲迎也宣二年左傳曰狂狡輅鄭人杜注
云輅迎也周禮秋官有訝士及聘禮云厥明訝賓于館鄭注皆云訝迎也召南
鵲巢云百兩御之鄭注亦云御迎也字形雖別音義實同蓋以作非一人致茲
異也當以迓爲正字餘皆假借 元良首也 釋曰謂頤首也郭云左傳曰
人歸先軫之元者僖三十三年狄伐晉及箕八月戊子晉侯敗狄于箕卻缺獲
白狄子先軫曰匹夫逞志於君而無討敢不目討乎免胃入狄師死焉狄人歸
其元面如生是也引證元爲首良未詳 薦摯臻也 釋曰臻至也薦進執摯
皆所以表至也 賡揚績也 釋曰謂相繼續也郭云書曰乃賡載歌者虞書
益稷文 耐旒祖也 釋曰謂先祖也說文云耐後死者合食於先祖也郭云
耐付也付新死者於祖廟士虞記云明日以其班耐毀廟之主名旒耶尼也
釋曰尼近也言卽今相近也 尼定也 釋曰尼詰爲止止卽定舍人曰尼者
私之定也 邇幾暱近也 釋曰皆謂殆近也邇者鄭風東門之墀云其室則

邇幾者聘義曰日幾中而后禮成暱者郭云親近也小雅菀柳云無自暱焉
安安坐也 釋曰安者安定之坐也郭云禮記曰安而后傳命者案士相見禮
云凡言非對也安而后傳言鄭注云凡言謂已爲君言事也安安坐也傳言猶
出言也此言禮記曰安而后傳命者傳寫誤也或所見本異 貉縮綸也 釋
曰郭云綸者繩也謂牽縛縮貉之今俗語亦然據時驗而言也大雅緜篇云其
繩則直縮板以載 貉嘆安定也 釋曰皆靜定也大雅皇矣云貉其德音毛
傳云貉靜也鄭箋云德正應和曰貉嘆者皇矣又云求民之莫鄭箋云求民之
定謂所歸就也貉貉嘆莫音義同安者小雅斯干云乃安斯寢 伊維也伊維
侯也 釋曰皆發語辭轉互相訓邶谷風云伊余來墜大雅大明云維此文王
小雅六月云侯誰在矣 時寔是也 釋曰是此也秦風駟驥云奉時辰牡郭
云公羊傳曰寔來者何是來也者案春秋桓五年冬州公如曹六年春正月寔
來公羊傳曰寔來者何猶曰是人來也引之證寔爲是也 卒猷假輟已也
釋曰皆謂終已也卒者終盡之已也輟止已也論語曰輟而不輟 求首在卒
就終也 釋曰昔謂終盡也求者大雅下武云世德作求郭云詩曰嗣先公爾
首矣者大雅卷阿文卒者邶風日月云畜我不卒就者凡事物成就亦終也

崩薨無祿卒殂落殪死也 釋曰此皆死之別稱也曲禮云天子死曰崩諸侯曰薨大夫曰卒士曰不祿庶人曰死鄭注云異死名者為人褻其無知若猶不同然也自上顛壞曰崩薨顛壞之聲卒終也不祿不終其祿死之言漸也精神漸盡也又曰壽考曰卒短折曰不祿鄭注云祿謂有德行任爲大夫士而不爲者老而死從大夫之稱少而死從士之稱此云無祿者卽彼之不祿也殂落者李巡曰殂落堯死之稱郭云古者死亡尊卑同稱耳故尙書堯曰殂落舜曰陟方乃死者皆虞書舜典文也謂之殂落者蓋殂爲往也言人命盡而往落者若草木葉落也殪者案隱九年左傳云夷戎師前後擊之盡殪杜注云殪死也

爾雅疏卷第二

光緒四年歲在著雍攝提格吳興陸氏十萬卷樓重雕

陸心源校

爾雅疏卷第三

翰林侍講學士朝請大夫守國子祭酒上柱國賜紫金魚袋臣邢昺等奉勅校定

釋言第二

釋曰說文曰直言曰言仲尼曰言以足志介之推曰言身之文也然則言者發於志而形於聲所以文章於身者也論語曰詩三百一言以蔽之曰思無邪左傳趙簡子稱子大叔遺我以九言皆以一句爲一言也漢書東方朔云十六學詩書誦二十二萬言則以一字爲一言也雖一句一字有異要以今古方國殊別學者莫能通是以方言云皆古今語也初別國不相往來之言也今或同而舊書雅記故俗語不失其方而後人不知故爲之作釋也是曰釋言殷齊中也 釋曰殷齊皆謂正中也注書曰以殷仲春者堯典文案彼云日中星鳥以殷仲春孔安國以殷爲正中正義同故也云釋地曰距齊州以南者彼注云距去也齊中也謂中州爲齊州是齊得爲中也 斯諺離也 釋曰斯析諺張皆分離也孫炎曰斯析之離郭云齊陳曰斯者方言文陳風墓門云斧以斯之是也云諺見詩者小雅巷伯云哆兮侈兮成是南箕鄭箋云因箕星

之哆而又侈大之是也侈侈音義同 謾興起也 釋曰謾興皆作起也注禮
記曰尸謾者祭統文也 還復返也 釋曰皆迴返也春秋書師還又曰至
河乃復之類是也 宣徇徧也 釋曰皆周徧也大雅江漢云來旬來宣毛傳
云旬徧鄭箋云宣徧是皆為周徧也徇旬音義同 駟遽轉也 釋曰皆傳
車驛馬之名文十六年左傳曰楚子乘駟會師于臨品又僖三十三年云使遽
告於鄭又成五年曰晉侯以傳召伯宗是皆謂今驛也 蒙荒奄也 釋曰
昔謂奄覆唐風云葛生蒙楚孫炎曰荒大之奄周南云葛藟荒之故郭云
皆見詩 告謁請也 釋曰皆謂求請也成二年左傳曰卻克對齊侯曰晉
與魯衛兄弟也來告曰大國朝夕釋憾於敝邑之地詩序云無險詖私謁之
心 肅隤聲也 釋曰和樂聲也注詩曰肅隤和鳴者周頌有瞽文也 格
懷來也 釋曰謂招來也注書曰格爾眾庶者商書湯誓文也云懷見詩者
周頌時邁云懷柔百神 吟底致也 釋曰曲禮曰吟於鬼神昭元年左傳叔
向曰底祿以德周頌武篇云耆定爾功毛傳曰耆致也王肅云致定其大功
謂誅紂定天下是毛讀者為底故注云見詩傳 侈怙恃也 釋曰皆依恃
也郭云今江東呼母為侈小雅蓼莪云無父何怙無母何恃是也 律適述也

釋曰皆敘述也方俗語異耳律管所以述氣適者述行之也大雅文王有聲
適駿有聲之類是也 俞富然也 釋曰皆然應也注禮記曰男唯女俞者內
則文也富古吝字故為應也 豫臚敘也 釋曰皆陳敘也事豫備者亦有敘
也漢書云典客秦官大初元年更名大鴻臚韋昭曰鴻大也臚陳敘也以禮大
陳敘賓客也又莊子云大儒鴻傳是也 庶幾尚也 釋曰尚謂心所希聖也
注詩曰不尚息焉者小雅菀柳篇文也鄭箋云尚庶幾也以心所念尚即是庶
幾義相反覆故引之 觀指示也 釋曰示謂呈見於人也注國語曰且觀之
兵者案周語穆王將征犬戎祭公謀父諫曰不可先王耀德不觀兵犬戎氏以
其職來王天子曰子必以不享征之且觀之兵無乃廢先王之訓而王幾頓乎
是也論語曰指其掌謂舉掌以示人也 若惠順也 釋曰順不逆也書曰若
稽古謂順考古道也詩邶風終風云惠然肯來言有順心然後可來是也
敖撫傲也 釋曰皆謂傲慢周頌絲衣云不吳不傲注禮記曰無憚無傲者投
壺文也案彼云 令弟子辭曰毋撫母教母偕立母踰言偕立踰言有常爵
是也 幼鞠離也 釋曰方言云稚年小也曲禮曰幼子常視無誑書曰兄亦
不念鞠子哀是皆謂年小也書曰者周書康誥文也 逸嘗過也 釋曰皆謂

咎過也注云書曰汝則有逸罰者案商書盤庚云惟予一人有佚罰費誓云汝則有常刑書云汝則有逸罰者師讀不同故也或者其在今文乎誓者左傳曰禮義不訾之類是也疑休戾也釋曰戾止也書曰疑謀勿成月令云百工休是疑休皆為也疾齊壯也釋曰急疾齊整皆於事敏速彊壯也
械褊急也釋曰械與亟同大雅靈臺云經始勿亟文王有聲云匪棘其欲禮記引此詩作匪革其猶革亦急也械亟棘革字雖異音義同魏風葛屨云維是褊心又廣雅云械謹也褊狹陋也是皆急狹也賈賈市也釋曰謂市買賣物也注詩曰抱布貿絲者衛風氓篇文也大雅瞻卬云如賈三倍也匪陋隱也釋曰皆幽隱也注禮記曰匪用席者案有司徹云有司官徹饋饌于室中西北隅南面如饋之設右几匪用席是也云禮記者誤也云書曰揚側陋者堯典文也邊遠也釋曰逮謂相及也注東齊曰邊北燕曰遠者方言文也征邁行也釋曰皆出行也注詩曰王子出征者小雅六月文也云邁亦行者詩云周王子邁是也圯敗覆也釋曰圯毀敗壞皆傾覆也書曰祖乙圯于耿荇原再也釋曰皆重再也孫炎云荇草生之再也郭云易曰水荇至者周易坎卦象辭也云今呼重蠶為屬者周禮夏官馬質云禁原蠶者是

也撫救撫也釋曰皆憐撫也方言云宋衛邠陶之間謂愛曰撫故注云撫愛撫也云救寧見書者大誥云予翼以于救寧武圖功之類是也臞瘠瘠也釋曰皆瘦瘠也鄭玄周禮注云瘦臞腐敗郭云齊人謂瘠瘦為臞稊頰充也釋曰孫叔然本批作光書云光被四表說文云頰是火光也是皆充盛也屢暱亟也釋曰亟猶數也詩頌曰屢豐年左傳曰諸夏親暱親暱者恩信必數故注云親暱者亦數靡罔無也釋曰無不有也詩云靡神不舉書曰罔有攸赦皆是爽差也爽忒也釋曰廣異言也爽謂差錯又為忒變孫炎曰忒變雜不一郭云皆謂用心差錯不專一詩衛風云女也不爽大雅瞻卬云鞠人忒忒俱貳也釋曰俱次也次即副貳之義劑剪齊也釋曰皆為齊截也郭云南方人呼剪刀為劑刀釋器云金鍬翦羽謂之鍬饋餽稔也釋曰稔熟也孫炎曰蒸之曰饋均之曰餽郭云今呼餐飯為饋饋熟為餽說文云饋一蒸米也餽飯氣流也然則蒸米謂之饋饋必餽而熟之故言饋餽稔也大雅洞酌云可以餽饋饋音義同媵將送也釋曰皆謂送行也孫炎曰將行之送也注云左傳曰以媵秦穆姬者案僖五年晉執虞公及其大夫井伯以媵秦穆姬杜注云秦穆姬晉獻公女送女曰媵以屈辱之云詩曰遠于將之者邶風

燕燕衛莊姜送歸妾之詩也 作造爲也 釋曰謂營爲也皆見鄭風緇衣篇

養餼食也 釋曰皆飯食也注方言云陳楚之間相呼食爲養者案彼云養

餼食也陳楚之內相謁而食麥饘謂之養楚曰餼凡陳楚之郊南楚之外相

謁而餼或曰餼或曰粘秦魯之際河陰之間曰餼惡恨切 餼五恨切此真秦

語也大雅公劉云迺裹餼糧 鞠究窮也 釋曰皆窮盡也大雅雲漢云鞠

哉庶正小雅節南山云以究王詔 涵矜鹹苦也 釋曰郭云涵苦地也者謂

斥鹵可煮鹽者左傳曰表溇鹵云可矜憐者亦辛苦者小雅鴻鴈云爰及矜人

鄭箋云可憐之人謂貧窮者是辛苦之人也云苦即大鹹者釋經之鹹也鹹味

極必苦故以鹹爲苦也 干流求也 釋曰皆求取也論語云子張學干祿注

詩曰左右流之周南關雎文也 流是覃也覃延也 釋曰轉相解也皆謂蔓

延相被及水之流必相延及詩周南云葛之覃兮 佻偷也 釋曰小雅鹿鳴

云視民不佻是也李巡曰佻偷薄之偷郭云謂苟且左傳趙孟曰吾儕偷食朝

不謀夕何其長也杜注云言欲苟免目前不能念長久是謂偷爲苟且也 潛深

也潛深測也 釋曰轉相解也詩曰潛雖伏矣是深矣潛深又爲測郭云測亦

水深之別名 穀鞠生也 釋曰皆生活也注詩曰穀則異室者王風大車篇

文也小雅蓼莪云母兮鞠我 啜茹也 釋曰說文云啜嘗也郭云啜者拾食

禮記檀弓云啜菽飲水大雅烝民云柔則茹之方言云茹食也吳越凡貪飲食

者謂之茹 茹虞度也 釋曰皆謂測度也注詩曰不可以茹者邶柏舟文也

左傳曰備豫不虞 試式用也 釋曰皆任用也注皆見詩書者小雅大東云

百僚是試雨無正云庶曰式臧商書盤庚云今予將試以汝遷又云式敷民德

之類是也 詰誓謹也 釋曰皆謹勅也以大義諭衆謂之詰集將士而戒之

曰誓尚書詰誓之篇是也故郭云皆所以約勒謹戒衆也 競逐彊也 釋曰

皆自勉彊也大雅抑篇云無競維人馳逐者亦彊梁也 禦圍禁也 釋曰皆

謂禁制小雅常棣云外禦其務養馬曰圍亦所以禁制故皆爲禁也 室穉

塞也 釋曰皆謂堙塞孔穴幽七月云穹室熏鼠大宗伯云以狸沈祭山林

川澤是其類也 黼黻彰也 釋曰彰明也言文采著明也注黼文如斧黻文

如兩已相背者考工記云白與黑謂之黼黑與青謂之黻釋器云斧謂之黼蓋

半白半黑似斧刃白而身黑黻謂以青黑線刺繡爲兩已字相背黼取能斷

黻取善惡相背 膺身親也 釋曰服膺身先皆謂躬親也 愷悌發也 釋曰

謂發明而行也注詩曰齊子愷悌者齊風載驅篇文也毛傳云言文姜於是樂

易然鄭箋云此豈弟猶言發夕也豈讀當爲闔弟古文尚書以弟爲圍圍明也然則郭云發發行也是用鄭箋爲說 髦士官也 釋曰下云髦俊也士者男子之人大號言取俊士令居官也大雅棫樸云髦士攸宜是也 畯農夫也 釋曰田畯一曰農夫孫炎曰農夫田官也皆謂主田大夫也小雅甫田云田畯至喜鄭箋云田畯司嗇今之嗇夫也此注云今之嗇夫是也然則田畯田官在田司主稼穡故謂之司嗇漢及東晉亦有此官謂之嗇夫故鄭郭皆云今之嗇夫也 蓋割裂也 釋曰割謂以方裂之也 邕支載也 釋曰謝氏云邕字又作擁釋云擁者護之載郭云皆方俗語亦未詳 誣諉累也 釋曰謂相累及也孫炎云楚人曰誣秦人曰諉郭云以事相屬累爲誣諉 漠察清也 釋曰樊光云漠然清貌察明也是皆清明也 庇麻蔭也 釋曰舍人曰庇蔽也麻依止也郭云今俗語呼樹蔭爲麻文七年左傳云葛藟猶能庇其本根 穀履祿也 釋曰皆福祿也孝經援神契云祿者錄也取上所以敬錄接下下所以敬錄事上注書曰既富方穀者洪範文云詩曰福履將之者周南樛木文也 履禮也 釋曰履又爲禮也注禮可以履行見易者序卦云物畜然後有禮故受之以履韓康伯云履者禮也 隱占也 釋曰占者視兆以知吉凶也

必先隱度故曰隱占也 逆迎也 釋曰謂迎迓周書顧命云逆子釗于南門之外 憺曾也 釋曰憺猶言曾也曾則也皆發語辭郭云見詩者小雅節南山云憺莫懲嗟衛風河廣云曾不崇朝之類是也 增益也 釋曰謂饒益也郭云今江東通言增 窶貧也 釋曰窶者無禮也貧者無財也由其無財以爲禮郭云謂貧陋邨風北門云終窶且貧 菱隱也 釋曰愛郭即隱蔽也 僂吧也 釋曰孫炎曰心吧也郭云鳴吧短氣皆見詩大雅桑柔云亦孔之僂是也 基經也基設也 釋曰基牆下止也又詰爲始作事謀始必經綸也郭云基業所以自經營基又爲造設 祺祥也祺吉也 釋曰舍人曰祺福之祥謂徵祥也祥即吉之先見者也故又爲吉夫雅行葺云壽考惟祺 兆域也 釋曰謂塋墓界域也孝經曰卜其宅兆廣雅云兆葬地也士喪禮云筮宅家人營之鄭注云宅葬居也然則筮得吉兆經營之以爲界域也 肇敏也 釋曰謂敏疾也注書曰肇牽車牛者周書酒誥文也 挾藏也 釋曰謂隱藏物也郭云今江東通言挾史記秦有挾書之律 浹徹也 釋曰言澤潤浹洽相霑徹也 替廢也替滅也 釋曰替謂廢已也小雅楚茨云子子孫孫勿替引之是也替又爲絕滅 速徵也徵召也 釋曰轉相解也皆謂呼召注易曰不速之

客者需卦上六爻辭也 琛寶也 釋曰謂珍寶也舍人曰美寶曰琛注詩曰
來獻其琛者魯頌泮水文也 探試也 釋曰試謂嘗之也論語云見不善如
探湯郭云刺探嘗試 髦選也髦俊也 釋曰廣異言也毛中之長毫曰髦
士之俊選者借譬為名焉故郭云士中之俊如毛中之髦 俾職也 釋曰俾
詰為使言任使供職也 紕飾也 釋曰注謂緣飾見詩者鄙風于旄云素絲
紕之是也 凌慄也慄感也 釋曰轉相解也埤蒼云凌慄也郭云凌慄戰慄
則凌凌音義同慄又為感郭云戰慄者憂感秦風黃鳥云惴惴其慄 蠲明
也茅明也明朗也 釋曰郭云蠲清明貌樊光云蠲除垢穢使令清明茅亦明
也舍人曰茅昧之明也注左傳云前茅慮無者宣十二年傳文也杜注慮無如
今軍行前有斥候踰伏皆持以絳及白為幡見騎賊舉絳幡見步賊舉白
幡備慮有無也茅明也或曰時楚以茅為旌識明即融朗也 猷圖也猷若也
釋曰猷謂圖畫又為若若如也注周禮曰以猷鬼神祇者春官凡以神仕者掌三
辰之法以猶鬼神示之居辨其名物是也注詩曰寔命不猷者召南小星文也
俾舉也 釋曰謂與舉也注俾爾戈者周書牧誓文也 稱好也 釋曰謂美
好郭云物稱人意亦為好 坎律銓也 釋曰謂銓量也樊光曰坎卦水也水

性平律亦平銓亦平郭云易坎卦主法者說卦云坎為水水平故主法云法律
皆所以銓量輕重者白虎通云水之為言準也律歷志云繩直生準準正則平
衡而鈞權矣又曰權衡者衡平也權重也衡所以任權而均物平輕重也本起
於黃鍾之重一龠容千二百黍重十二銖兩之為兩兩者兩黃鍾律之重是法
律皆所以銓量輕重也 矢誓也 釋曰相約誓也鄘柏舟云之死矢靡它
舫舟也 釋曰謂並兩船釋水曰大夫方舟 泳游也 釋曰謂潛行游水底也
邶谷風云泳之游之 迨及也 釋曰謂相及也注東齊曰迨者方言文也
冥幼也 釋曰謂幼少也郭云幼稚者冥昧小雅斯干云噦噦其冥 降下也
釋曰召南草蟲云我心則降 傭均也 釋曰謂齊等也小雅節南山云昊天
不傭 彊暴也 釋曰彊梁者好凌暴於物詩序云彊暴之男 宛肆也肆
力也 釋曰宛輕也肆放也輕宛者好放肆肆又為極力 倅戴也 釋曰謂
頭戴也注詩曰戴弁倅倅者周頌絲衣文也 瘞幽也 釋曰皆謂薶藏
瘞屬也 釋曰毛菴所以為屬舍人曰菴謂毛屬也胡人續羊毛而作衣然則屬
者織毛為之若今之毛氍毹以衣馬之帶鞅也 烘燎也堪娃也 釋曰舍人曰烘
以火燎也堪娃竈也郭云烘謂燒燎堪今之三隅竈也然則娃者無釜之竈其

上燃火謂之烘本爲此竈上以燃火照物若今之火爐也注云見詩者小雅白
華云樵彼桑薪印烘于熤是也 陪朝也 釋曰臣見君曰朝朝之列位必
陪重是陪位爲朝也 康苛也 釋曰注謂苛刻案苛者毒草名爲政刻急
者取譬焉禮記孔子曰苛政猛於虎苛名康者以康安也苛刻者心安之左傳
曰州吁阻兵而安忍其類也 樊藩也 釋曰孫炎曰樊圃之藩也郭曰謂藩離
藩以細木爲之齊風東方未明云折柳樊圃小雅青蠅云營營青蠅止于榛毛
傳云榛所以爲藩是也 賦量也 釋曰謂賦稅也郭云賦稅所以評量方言
云平均賦也燕之北鄙東齊北郊凡相賦斂謂之平均是平量也 糗糧也
釋曰謂糧食也郭云今江東通言糗王制云五十異糗 庶侈也庶幸也 釋曰富
庶者多奢侈郭云庶者衆多爲奢侈書曰祿不期侈庶又爲幸望郭云庶幾僥
倖僥者求見親御也幸與倖通用之 筑拾也 釋曰拾謂拾掇金滕云凡大木
所偃盡起而築之馬融云起其木拾其禾 樊駟也 釋曰皆謂大也秦晉謂
大爲樊郭云今江東呼大爲駟猶麤也 集會也 釋曰說文云集若羣鳥
在林木之上故曰集指事也故經典通謂聚會爲集 舫泝也 釋曰孫炎
曰舫水中爲泝筏也郭云水中箴筏方言云泝謂之箴箴謂之筏筏秦晉

之通語也周南漢廣云不可方思論語云乘桴浮于海注云桴編竹木大曰楫
小曰桴是也舫方泝桴音義同 洵均也洵龕也 釋曰李巡曰洵徧之均也
郭云謂調均大雅桑柔云苑彼桑柔其下候旬毛傳云旬言陰均也然則洵
旬音義同洵又爲龕未詳 逮還也 釋曰亦謂相及方俗語異爾郭云今荆
楚人皆云還 是則也 釋曰是不非也則法效也郭云是事可法則言不非之
事乃可爲人法則 畫形也 釋曰郭云畫者爲形象考工記云畫績之事土
以黃其象方天時變火以圜山以章水以龍鳥獸蛇是畫者爲形象也
賑富也 釋曰皆豐財也郭云謂隱賑富有 局分也 釋曰郭云謂分部成
十六年左傳云離局姦也杜注云遠其部曲爲離局 濟怒也 釋曰舍人曰
濟怒聲也郭云詩曰天之方濟者大雅版篇文也 僖聲也 釋曰郭云謂聲
音言聲音僖僖然也 葵揆也揆度也 釋曰轉相解也皆謂商度注詩曰天
子葵之者小雅采芣文也鄙風定之方中云揆之以日 逮及也 釋曰亦謂
相及也大雅桑柔云弁云不逮 怒飢也 釋曰李巡云怒宿不食之飢也郭云
怒然飢意周南汝墳云怒如調飢毛傳云怒飢意也鄭箋釋云怒思也然則
怒之爲訓本爲思耳但飢之思食意又怒然故又以爲飢怒是飢之意非飢之

狀故郭及毛傳皆言飢意鄭箋以為思義相接成也 眡重也 釋曰注云謂厚重見左傳者隱三年衛大夫石碭曰夫寵而不驕驕而能降降而不憾憾而能眡者鮮矣杜注云如此者少也降其身則必恨恨則思亂不能自安自重是也 獵虐也 釋曰獵謂從禽也必暴害於物故云虐郭云凌獵暴虐土田也 釋曰別地之二名也白虎通云中央者土土主吐含萬物土之為言吐也釋名云土已耕者曰田田者填也五稼填滿其中也 戍邊也 釋曰邊止也郭云戍守所以止寇賊春秋公子買戍衛 師人也 釋曰師眾也周禮大司馬二千五百人為師故郭云謂人眾 砧鞞也 釋曰謂牢固易文言云確乎其不可拔又革卦初九云鞞用黃牛之革若如此說砧切若學當從告說文別有砧切 石堅也字雖小異其義則同 棄忘也 釋曰心遺忘小雅谷風云棄我如遺 蹢閑也 釋曰蹢然閑暇貌 謀心也 釋曰謀慮以心 獻聖也 釋曰郭云謚法曰聰明睿智曰獻謚法者周書篇名也 里邑也 釋曰謂邑居也論語云里仁為美王制云凡居民量地以制邑 襄除也 釋曰謂除去也注詩曰不可襄者鄘風牆有茨文也 振古也 釋曰言久故也注詩曰振古如茲猶言久若此者案周頌戴芟云匪今斯今振古如茲毛傳去振自也鄭箋

云振亦古也言脩德行禮莫不獲報乃古古而如此所由來者久非適今時是也 對怨也 釋曰謂怨恨左傳曰以死誰對 縞介也 釋曰郭云縞者繫介猶闕以釋水云縞綏也綏繫著則介闕也 號諱也 釋曰謂叫諱也小雅賓之初筵云載號載呶郭云今江東皆言諱 凶咎也 釋曰謂咎惡也通見詩書 苞稹也 釋曰郭云今人呼物叢緻者為稹孫炎曰物叢生曰苞齊人名曰稹唐風鴉羽云集于苞栩毛傳云苞稹鄭箋云稹者根相迫迮相緻亦謂叢生也 迨寤也 釋曰迨謂相干也寐而覺之曰寤郭云相干寤 頤頤也 釋曰皆謂頤也注詩曰麟之定者周南麟之趾文也 猷肯可也 釋曰皆堪可也注詩曰猷來無棄者魏風陟岵文也肯今通言者邶風終風云惠然肯來是也 務侮也 釋曰謂輕侮也注詩曰外禦其侮小雅常棣文也 貽遺也 釋曰謂相歸遺詩云貽我握椒 質買也 釋曰質市也又為買郭云廣二名詩云抱布貿絲 賄財也 釋曰財帛摠名賄周禮冢宰職云商賈阜通貨賄鄭注云布帛曰賄 甲狎也 釋曰謂狎習也衛風芄蘭云能不我甲左傳曰水懦民狎而翫之 莢駮也 釋曰廣異言也注詩曰毳衣如莢者王風大車文也毛傳云莢駮也蘆之初生者也鄭箋云莢駮也以傳解莢色

未辨草名故定之也郭云菸草色如騅在青白之間者以釋畜云蒼白雜毛
騅故也 粲餐也 釋曰謂餐食也郭云今河北人呼食為餐鄭風緇衣云還
子授子之餐兮鄭箋云自館還在采地之都我則設餐以授之愛之欲飲食之
渝變也 釋曰謂變易也詩曰救命不渝 宜肴也 釋曰謂肴饌也李巡曰
飲酒之肴也注詩曰與子宜之者鄭風女曰雞鳴文也 夷悅也 釋曰謂喜悅
也注詩曰我心則夷者召南草蟲文 顛頂也 釋曰謂頭上也詩曰有馬白
顛 耄老也 釋曰耄鐵也孫炎曰老人面如鐵色郭云八十為耄詩秦風車
鄰云逝者其耄毛傳云八十曰耄易離卦云大耋之嗟鄭注云年踰七十倍九
年左傳曰伯舅耄老服虔云七十曰耄此及詩傳言八十曰耄者耄有七十八
十無正文也詩以仕者七十致事任者慮已之耄欲得早致事故以為八十此
用詩傳為說故與之同 輶輕也 釋曰謂輕微也注詩曰德輶如毛者大雅
烝民文 倭淺也 釋曰謂淺近注詩曰小戎倭收者秦風小戎文也 絢絞
也 釋曰謂糾絞繩索也李巡曰絢繩之絞也爾雅七月云宵爾索絢 訛化也
釋曰匡正之化也注詩曰四國是訛者幽風破斧文 跋躡也寔踏也 釋曰
李巡曰跋前行曰躡踏卻頓曰寔注詩云狼跋其胡載寔其尾者幽風狼跋

文也說文云跋躡都年切躡竹二切躡即寔也然則跋與寔皆是顛倒之類以
跋為躡者謂跋其胡而倒躡耳毛傳云老狼有胡謂頷下垂胡進則躡其胡
謂躡胡而前倒也退則踏其尾謂卻頓而倒於尾上也 烝塵也 釋曰孫炎
云烝物久之塵小雅南有嘉魚云烝然罩罩郭云人眾所以生塵埃 戎相也
釋曰戎相也如字一云相助也息亮切故注云相佐助也 飲私也 釋曰孫炎
曰飲非公朝私飲酒也郭云宴飲之私小雅常棣云飲酒之飲毛傳云飲私也
不脫履升堂謂之飲鄭箋云私者圖非常之事若議大疑於堂則有飲禮焉
聽朝為公周語曰王公立飲 孺屬也 釋曰李巡云孺骨肉相親屬也常棣
云和樂且孺毛傳云九族會曰和孺屬也鄭箋云屬者昭穆相次序 幕暮也
釋曰幕然暮夜也 煽熾也熾盛也 釋曰轉相解也皆嬖寵熾盛也注煽義
見詩者小雅十月之交云豔妻煽方處 抵本也 釋曰謂根本也周禮典瑞
云四圭有邸鄭司農云於中央為璧圭著其四面一玉俱成即引此文云邸本
也圭本著於璧故四圭有邸圭末四出故也又曰兩圭有邸後鄭云儻而同邸
皆謂本也抵邸音義同 窈間也 釋曰窈窕間隙也詩周南關雎云窈窕
淑女毛傳云窈窕幽間鄭箋云幽間深宮皆謂淑女所處之宮形狀窈窕然

淪率也 釋曰謂相牽率郭云相率使小雅雨無正云無淪胥以鋪 罹毒也
釋曰釋詁云罹憂也郭云憂思慘毒小雅小弁云我獨于罹 檢同也 釋曰
檢模範也郭云模範同等說文云書署也 郵過也 釋曰郵謂郵亭過經
過也郭云道路所經過郊特牲云郵表曠 遜遜也 釋曰謂逃去也春秋莊元年夫
人姜氏孫于齊公羊傳曰孫者何孫猶孫也內諱奔謂之孫穀梁傳曰孫之猶
言為孫諱奔也 斃踣也債僵也 釋曰前卻顛倒之名也斃又謂之踣皆前
覆也檀弓云射之斃鄭注云斃仆也然則又為仆債謂之僵皆卻偃也左傳曰
鄭伯之車債於濟 眡殄也 釋曰謂殄絕也周頌載芟云徂隰徂眡毛傳曰
眡場也地官遂人云十夫有溝溝上有眡則眡謂地畔之徑路也至此而易之
故以眡為場易則地絕故得為殄 曷盍也 釋曰郭云盍何不也論語曰盍
各言爾志 虹潰也 釋曰潰敗亂也大雅抑篇云實虹小子召旻云蝨賊內
訌 暗闇也 釋曰謂冥昧也郭云暗然冥貌 黏膠也 釋曰膠黏黏也方
言云黏黏也齊魯青徐自關而東或曰黏或曰黏 孔甚也厥其也冥禮
也 釋曰孔甚厥其通見詩書釋詁云夏常也故郭云謂常禮 閣臺也
釋曰謂城門臺也鄭風云出其闔闔毛傳云闔曲城也闔城臺也 囚拘也

釋曰謂拘執也月令云挺重囚左傳曰南冠而縶者楚囚也縶則拘執也
攸所也展適也 釋曰易曰利有攸往郭云得自申展皆適意也鬱氣也
釋曰鬱然氣出也謂鬱蒸之氣也 宅居也 釋曰謂居處也大雅文王有聲
云宅是鎬京 休慶也 釋曰謂嘉慶也商頌曰何天之休 所叫也 釋曰祈
猶禱也求也春官大祝掌六祝之辭以祈福祥求永貞郭云祈祭者叫呼而請
事 濬幽深也哲智也 釋曰舍人曰濬下之深也哲大智也郭云濬亦深也
虞書舜典云濬哲文明孔安國云舜有深智言其智之深所知不淺近也
弄玩也 釋曰謂玩好也小雅斯干云載弄之璋鄭箋云玩以璋者欲其比德
焉 尹正也皇匡正也 釋曰正長也郭云謂官正也言為一官之長也周書君
陳曰尹茲東郊皇君威之正匡救諫之正孝經云匡救其惡注詩曰四國是皇
者豳風破斧文也 服整也 釋曰謂整治也郭云服御之令齊整周南葛覃
云服之無斃 聘問也 釋曰問謂存省之對而言之則聘問異周禮大行人
云時聘以結諸侯之好問問以諭諸侯之德又曰凡諸侯之邦交歲相問也殷
相聘也聘禮云小聘曰問是異也散而言之皆謂相存省故此云聘問也注見
穀梁傳者案隱九年春天王使南季來聘穀梁傳曰南氏姓也季字也聘問

也是其事 愧慙也 釋曰謂慙恥也小爾雅云不直失節謂之慙慙愧也面

慙曰懣心慙曰恧體慙曰遠方言云梅慙音慙慙也晉曰梅或曰慙秦晉之間

凡愧而見上謂之赦梁宋曰慙又云慙音慙慙也荆揚青徐之間曰慙若

梁益秦晉之間言心內慙矣山之東西自愧曰恧趙魏之間謂之恥音密亦

誅也 釋曰謂誅責注書曰鮫則殛死者周書洪範文 克能也翌明也

釋曰克能通見書傳注書曰翌日乃瘳者周書金縢文 訕訟也 釋曰多爭

訟郭云言訕譏譏即謹譏小雅節南山云降此鞫訕 晦冥也奔走也遠退也

釋曰冥謂闇冥見公羊傳奔大走也左傳曰車馳卒奔遠却退也注外傳曰已

復於事而遠者齊語管仲對桓公辭也韋昭曰已畢也遠伏退也此國語也而

謂之外傳者韋昭曰左丘明采錄前世穆王以來下訖魯悼智伯之誅邦國成

敗嘉言善語陰陽律呂天時人事逆順之數以為國語其文不主於經故號曰

外傳也 寔仆也 釋曰即前文踰與踣也郭云頓躓倒仆 亞次也諗念也

釋曰亞下次也通見書傳諗者相思念也小雅四牡云將母來諗 屈極也

釋曰有所限極也大雅瞻卬云靡有夷屆 弁同也弁蓋也 釋曰廣異言也

注詩曰奄有龜蒙魯頌闕宮文言弁覆同為已有弁又為蓋謂覆蓋也易曰

惡積而不可揜弁奄揜音義同 恫痛也 釋曰謂痛傷注詩曰神罔時恫大

雅思齊文王肅云文王之德能上順祖宗安寧百神無失其道無所怨痛

握具也 釋曰主持辨具也郭云謂備具李本作幄釋云居位處之具也秦風

權輿云夏屋渠渠鄭箋云屋具也義其同乎 振訊也 釋曰謂振訊去塵也

郭云振者奮訊曲禮曰振書端書 閱恨也 釋曰郭云相怨恨孫炎本作很

解云相很戾小雅常棣云兄弟鬩于牆毛傳云鬩很也很者忿爭之名曲禮曰

很無求勝以字形異濫故釋者致殊於義兩解得之 越揚也對遂也 釋曰

揚謂稱美郭云謂發揚遂者因事之辭注詩曰對揚王休者大雅江漢文

燬火也 釋曰李巡曰燬一名火孫炎曰方言有輕重故謂火為燬郭云燬齊

人語方言云燬呼曉火也楚轉語也猶齊言焜音焜火也注詩曰王室如燬者周

南汝墳文 懈怠也 釋曰謂惰慢也大雅烝民云夙夜匪懈 宣緩也

釋曰謂寬緩也 遇偶也 釋曰郭云偶爾相值遇春秋隱八年春宋公衛侯

遇于垂穀梁曰不期而會曰遇 曩曩也 釋曰在今而道既往或曰曩或曰

曩書大傳云曩之取於囿中勇力之取也注國語曰曩而言戲也者案晉語驪

姬與優施謀飲里克酒乃歌曰暇豫之吾吾不如鳥烏人皆集於苑已獨集於

枯里克笑曰何謂苑何謂枯優施曰其母為夫人其子為君可不謂苑乎其母既死其子又有謗可不謂枯乎枯且有傷優施出里克辟奠不餐而寢夜半召優施曰曩而言戲乎如有所聞之乎是也 惶暇也 釋曰謂聞暇注詩曰不遑啓處者小雅駟牡文 宵夜也 釋曰舍人曰宵陽氣消也詩云肅肅宵征書曰宵中星虛 懊忤也渴食也 釋曰皆謂愛忤貪羨也昭元年左傳云主民翫歲而惕日杜注云翫惕皆貪也 楛柱也 釋曰郭云相楛柱也說文云楛柱砥古用木今以石字書云柱屋之楛 裁節也並併也 釋曰易泰卦云后以財成天地之道裁財音義同並併古今字注詩曰並坐鼓瑟者秦風車鄰篇文 卒既也 釋曰皆謂盡已也 槽慮也 釋曰郭云謂謀慮也字書作棕 將資也 釋曰行所資也郭云謂資裝 備紱也 釋曰謂縫刺也郭云今人呼縫紱衣為備鄭注司服云黼黻希繡希讀為備謂刺繡也 遞迭也 釋曰李巡曰遞者更迭閒廁相代之義邨柏舟云胡迭而微 矧況也 釋曰說文云矧況辭從矢取辭之所之如矢也郭云譬況謝氏云志譬況是也 廩廩也 釋曰廣雅云廩倉也則廩廩皆困倉之別名孫炎云廩藏穀鮮絜也舍人云稟少鮮也郭云或說云即倉廩所未詳 遁逃也 釋曰謂遁逃商書大甲

云自作孽不可追注亦見禮記者案緇衣云子曰小人溺於水君子溺於口大人溺於民皆在其所褻也下云大甲曰天作孽可違也自作孽不可以追 訊言也 釋曰訊問以言也郭云相問訊詩云執訊獲醜 閒倪也 釋曰反閒一名倪今之細作也注左傳謂之諜者案桓公十二年云使伯嘉諜之杜注云謀伺也兵書謂之反間也案說文云諜軍中反閒也謂詐為敵國之人入其軍中伺候閒隙以反報其主又鄭注周禮掌戮云諜謂姦寇反閒者 沆沆也 釋曰說文云沆轉流也一曰沆郭云水流潏沆沆沆水大貌 干扞也 釋曰郭云相扞衛孫炎曰干盾自蔽扞周南兔置云公侯干城言公侯以武夫自固為扞蔽如盾為防守如城然 趾足也跣則也 釋曰易云賁其趾趾則足也亦謂之脚跣一名則斷足刑也呂刑云剕罰五百孔安國云則足曰剕鄭注司刑云則斷足也周改贖作則跣音義同 襄駕也 釋曰謂乘駕也鄭風大叔于田云兩服上襄注書曰懷山襄陵堯典文 忝辱也煥煖也 釋曰忝謂恥辱也詩曰無忝爾所生煥温也洪範云哲時煥若郭云今江東通言煥塊塌也 釋曰塊者結土也說文云塊俗坵字也坵一名塌郭云土坵也 注外傳曰枕坵以塌 釋曰案吳語吳王夫差既許越成乃大戒師徒將以伐齊申

胥進諫曰昔楚靈王不君其臣箴諫不入乃築臺於章華之上闕為石郭陂漢以象帝舜罷弊楚國以問陳蔡不脩方城之內踰諸夏而圖東國三歲於沮汾以服吳越其民不忍饑勞之殃三軍叛王於乾谿王親獨行屏營仿徨於山林之中三日乃見其消人疇王呼之曰余不食三日矣疇趨而進王枕其股以寢於地王寐疇枕王以撲而去之王覺而無見乃匍匐將入於棘圍棘圍不納也乃入芋尹申亥氏焉是其事也說文云璞四角切亦塊也今注云枕出者字之誤也出當作王又外傳作撲郭云以播者蓋亦理同或所見本異也將齊也釋曰郭云謂分齊也詩曰或肆或將者小雅楚茨文毛傳云肆陳將齊也或陳于牙或齊其肉王肅云分齊其肉所當用也餽餽也釋曰郭云糜也下云鬻糜郭云淖糜然則餽餽鬻糜相類之物稠者曰糜淖者曰鬻餽餽是其別名昭七年左傳云饋於是鬻於是餽余口啓跪也釋曰謂跪拜也小雅四牡云不遑啓處郭云小踧說文曰踧長踧也莊子云擊踧曲拳臣之禮也騁密也釋曰郭云謂緻密開闢也釋曰注書曰闢四門虞書舜典文袍襴也釋曰玉藻云纁為袍鄭玄云衣有著之異名也纁謂今之新縣纁謂今之纁及舊絮也然則繭是袍之別名謂新縣著袍者也注左傳曰重

繭衣裘者襄二十一年傳云楚子使遺子馮為令尹遂以疾辭方暑闕地下冰而淋焉重繭衣裘鮮食而寢是也障眡也釋曰郭云謂壅障一名眡左傳曰封眡土略靦媯也釋曰郭云面媯然孫炎曰靦人面媯然說文曰靦面見人媯面靦也然則靦與媯皆面見人之貌詩云有靦面目舒緩也釋曰郭云謂遲緩詩云舒而脫脫兮翻靦也靦靦也釋曰李巡曰翻舞者所持纛也孫炎曰纛舞者所持羽也郭云今之羽葆幢鄭司農注鄉師云翻羽葆幢也蔡邕獨斷云以旄牛尾為之大如斗左右駢馬頭上所謂黃屋左纛纛又謂之翳郭曰舞者所以自蔽翳然則翻一名為纛纛所以為翳故王風云左執翻毛傳云翻纛也翳也隍壑也釋曰隍城池無水者郭云城池空者為壑易泰卦上六城復於隍 芼擗也釋曰孫炎曰皆擇菜也某氏曰擗猶拔也郭云謂拔取菜以擗是拔之義史記曰斬將擗旗謂拔取敵人之旗也周南關雎云參差荇菜左右芼之故云謂拔取菜毛傳云芼擇亦謂拔菜而擇之也典經也威則也釋曰周禮大宰之職掌建邦之六典鄭注云典常也經也法也王謂之禮經常所秉以治天下也邦國官府謂之禮法常所守以為法式也常者其上下通名郭云威儀可法則詩曰敬慎威儀維民之則 苛姁也釋曰

說文云姤妬也郭云煩苛者介嫉妍言煩苛之人多嫉妬 芾小也 釋曰芾是木幹及葉之小者也召南云蔽芾甘棠此比於大木爲小也我行其野云蔽芾其樛鄭箋云樛之蔽芾始生謂樛葉之始生形亦小也郭云芾者小貌 迷惑也狃復也 釋曰小雅節南山云俾民不迷謂不惑也狃復習也郭云狃快復爲孫炎云狃快前事復爲也說文云狃狎也快習也鄭風云將叔無狃毛傳云狃習也桓十三年左傳云莫敖狃於蒲騷之役杜注云狃快也然則狃快皆貫習之義復亦貫習之意也 逼迫也般還也 釋曰逼相急迫也般還反也注左傳曰般馬之聲者襄十八年晉大夫邢伯告中行伯之辭也 班賦也 釋曰郭云謂布與桓六年左傳云諸侯之大夫成齊齊人饋之餼使魯爲其班聘禮記云盼肉及瘦車班盼音義同左傳曰屬役賦文 濟渡也濟成也濟增也 釋曰郭云所以廣異訓各隨事爲義方言云過渡謂之涉濟彼注云猶今云濟渡左傳曰濟河焚舟濟又爲成左傳曰以欲從人則可以人從欲鮮濟濟又爲增益左傳曰盍請濟師於王 緡綸也 釋曰孫炎云皆繩名也郭云緡繩也江東謂之綸注詩曰維絲伊緡者召南何彼穠矣又 祭盞也 釋曰李巡云吐沫釐也郭云漉漉出涎沫鄭語云訓語有之曰夏之衰也喪人之神化

爲二龍以同于王庭而言曰余襲之二君夏后卜殺之與去之與止之莫吉卜請其禱而藏之吉韋昭云禱龍所吐沫龍之精氣也 寬綽也 釋曰孫炎云性之裕者郭云謂寬裕也臯陶謨云寬而栗 袞黻也 釋曰郭云袞衣有黻文小雅采芣云玄袞及黼袞必兼有黼黻詩但言及黼嫌於無黻故此釋之毛傳云玄袞卷龍也白與黑謂之黼鄭箋云玄袞玄衣而畫以卷龍也黼黼黻謂絺衣也諸公之服自袞冕而下 華皇也 釋曰草木之華一名皇樊光引詩云皇皇者華孫炎云皇皇猶煌煌郭云釋草曰皇華榮引之以證皇亦華榮之名 昆後也 釋曰郭云謂先後方俗語大禹謨云官占惟先蔽志昆命于元龜 彌終也 釋曰郭云終竟也大雅生民云誕彌厥月言大矣后稷之在其母終人道十月而生也

爾雅疏卷第三

光緒四年歲在著雍攝提格吳興陸氏十萬卷樓重雕

陸心源校

爾雅疏卷第四

翰林侍講學士朝請大夫守國子祭酒上柱國賜紫金魚袋臣邢昺等奉

勅校定

釋訓第三


釋親第四

釋訓第三

釋曰案釋詁云訓道也周禮地官有土訓誦訓鄭司農注云謂以遠方土地所生異物以告道王也後鄭云玄謂土訓能訓說土地善惡之勢誦訓能訓說四方所誦習及人所作為久時事然則此篇以物之事義形貌告道人也故曰釋訓案此所釋多釋詩文故郭氏即以詩義解之 明明斤斤察也 釋曰舍人曰

明明言其明甚孫炎曰明明性理之察也大雅常武云赫赫明明舍人曰斤斤物精詳之察也孫炎曰斤斤重慎之察也周頌執競云斤斤其明聰明鑿察也 條條秩秩智也 釋曰皆智思深長也小雅賓之初筵云左右秩秩言其

威儀審智不失禮也 穆穆肅肅敬也 釋曰周頌雝篇云有來雝雝至止肅肅相維辟公天子穆穆此皆禘祭之時容儀謹敬也 諸諸便便辯也 釋曰皆言辭辯給也論語云便便言小雅采芣云平平左右毛傳云平平辯治也便



平古今字 肅肅翼翼恭也 釋曰皆恭敬也 大雅思齊云肅肅在廟大明云
維此文王小心翼翼言文王及羣臣恭敬貌也 靡靡優優和也 釋曰大
雅思齊云雝雝在宮商頌長發云敷政優優此皆人君德政和樂也 兢兢愷
愷戒也 釋曰小雅小旻云戰戰兢兢大雅抑篇云子孫繩繩此皆小心戒慎
也 愷繩音義同 戰戰踴踴動也 釋曰小旻云戰戰兢兢楚茨云濟濟踴
踴此皆恐動趨步威儀謹敬也 晏晏溫溫柔也 釋曰衛風氓篇云言笑晏
晏大雅抑篇云溫溫恭人此皆寬緩和柔也 業業翹翹危也 釋曰大雅召
旻云兢兢業業翹風鳴鳴云子室翹翹此皆縣危恐懼也 惴惴僬僬懼也
釋曰秦風黃鳥云惴惴其慄翹風鳴鳴云子維音曉曉此皆危恐戰懼也
番番矯矯勇也 釋曰大雅崧高云申伯番番魯頌泂水云矯矯虎臣此皆武
夫壯勇之貌 桓桓烈烈威也 釋曰皆威武嚴猛之貌周頌桓篇云桓桓武
王小雅黍苗云烈烈征師 洸洸赳赳武也 釋曰大雅江漢云武夫洸洸周
南兔置云赳赳武夫此皆武夫果毅之貌左傳殺敵爲果致果爲毅 藹藹
濟濟止也 釋曰大雅卷阿云藹藹王多吉士小雅楚茨云濟濟踴踴此皆王
朝賢士盛多之容止也 悠悠洋洋思也 釋曰鄭風于衿云悠悠我思邶風

二子乘舟云中心養養此皆想念憂思也羊養音義同又中庸云齊明盛服以
承祭祀洋洋乎如在其上如在其左右鄭立云洋洋人想思其傍優之貌
蹶蹶踏踏敏也 釋曰唐風蟋蟀云良士蹶蹶小雅楚茨云執爨踏踏此皆便
速敏捷於事也 薨薨增增衆也 釋曰周南螽斯云螽斯羽薨薨兮魯頌閟
宮云烝徒增增此皆人物衆夥之貌楚人謂多爲夥 烝烝遂遂作也 釋曰
皆物盛興作之貌也魯頌泂水云烝烝皇皇 委委佗佗美也 釋曰李巡曰
皆寬容之美也孫炎曰委委行之美佗佗長之美詩鄘風君子偕老云委委佗
佗毛傳云委委者行可委曲從迹也佗佗者德平易也是皆佳麗美豔之貌也
怵怵惕惕愛也 釋曰李巡曰怵怵和適之愛也注詩云心焉惕惕者陳風防
有鵲巢文云韓詩以爲悅人故言愛也者燕人韓嬰爲詩作傳名曰韓詩以此
惕惕爲悅人故言愛也 僂僂格格舉也 釋曰皆謂舉持物也 藜藜孽
孽戴也 釋曰周南桃夭云其葉藜藜衛風碩人云庶姜孽孽此皆頭戴物婦
人盛飾貌 慙慙媿媿安也 釋曰秦風小戎云厭厭良人毛傳云厭厭安靜也
孫炎曰媿媿行步之安也魏風葛屨云好人提提毛傳云提提安諦謂行步安
舒而審諦也是皆好人安詳之容也 祁祁遲遲徐也 釋曰皆安徐也關風

七月云春日遲遲采蔡祁祁 丕丕簡簡大也 釋曰書立政云以並受此不
丕基周頌執競云降福簡簡是皆多大之稱 存存萌萌在也 釋曰謂存在
也易繫辭云成性存存萌萌字書作蕙說文作藹郭云未見所出 懋懋慎
慎勉也 釋曰皆自勉強也書曰懋哉懋哉慎與慕同 庸庸惓惓勞也 釋
曰皆劬勞也有功庸者皆勞也小雅巷伯云勞人草草毛傳云草草勞心也又
陳風月出云勞心惓兮惓草音義同 赫赫躍躍迅也 釋曰孫炎云赫赫顯
著之迅大雅常武云赫赫業業毛傳云赫赫然盛也何人斯云躍躍兔是皆
顯盛迅疾之貌 綽綽爰爰緩也 釋曰皆寬緩也小雅角弓云綽綽有裕毛
傳云綽綽寬也王風兔爰云有兔爰爰毛傳云爰爰緩意郭云攸攸偈偈丕
簡簡存存懋懋庸庸綽綽盡重語者言此數字單言之其義亦同但古人有
重語者故復出之 坎坎塤塤喜也 釋曰皆鼓舞懽喜也小雅伐木云坎坎
鼓我蹲蹲舞我鄭箋云爲我擊鼓坎坎然爲我與舞蹲蹲然謂以樂樂已也
蹲蹲音義同 瞿瞿休休儉也 釋曰李巡曰皆良士顧禮節之儉也唐風蟋
蟀云良士瞿瞿毛傳云瞿瞿然顧禮義也又云良士休休毛傳云休休樂道之
心皆良士節儉也 旭旭躑躑僑也 釋曰郭氏讀旭旭爲好好小雅巷伯云

驕人好好鄭箋云好好者喜讒言之人也大雅板篇云小子躑躑毛傳云躑躑
驕貌是皆小人得志僑蹇之貌也 夢夢訕訕亂也 釋曰孫炎曰夢夢昏昏
之亂也大雅抑篇云視爾夢夢又曰誨爾諄諄是皆闇亂也訕諄音義同
爆爆邈邈悶也 釋曰爆爆煩悶也舍人曰貌貌憂悶也大雅抑篇云聽我貌
貌毛傳云貌貌然不入也是皆煩悶之謂也 僂僂洄洄昏也 釋曰皆迷亂
昏惑也郭音義云洄本作憫音羣 版版盪盪僻也 釋曰皆邪僻也李巡曰
版版失道之僻也蕩蕩者弗思之僻也大雅板篇云上帝板板毛傳云板板反
也上帝以稱王者也鄭箋云王爲政反先王與天之道又蕩篇云蕩蕩上帝鄭
箋云蕩蕩法度廢壞之貌版板盪盪音義同 熯熯炎炎薰也 釋曰皆早熟
之氣薰炙人也大雅雲漢云蘊降蟲蟲毛傳云蘊蘊而暑隆隆而雷蟲蟲而熱
又云赫赫炎炎毛傳云赫赫氣也炎炎熱氣也熯蟲音義同 居居究究惡也
釋曰李巡曰居居不狎習之惡孫炎曰究究窮極人之惡唐風羔裘云羔裘豹
祛自我人居居又曰自我人究究毛傳曰居居懷惡不相親比之貌究究猶居
居也是皆相憎惡也 仇仇敖敖傲也 釋曰小雅正月云執我仇仇毛傳云
仇仇猶警警也鄭箋云王既得我執留我其禮待我警警然亦不問我在位

之功力言其有貧賢之名無用賢之實大雅板篇云我即爾謀聽我蹢蹢毛傳云蹢蹢猶警警也鄭箋云我就女而謀欲忠告以善道女反聽我言警警然不肯受是皆傲慢賢者敖警蹢音義同 此此瑣瑣小也 釋曰皆才器細陋也小雅正月云此此彼有屋毛傳云此此小也鄭箋云此言小人富也舍人曰瑣瑣計謀褊淺之貌節南山云瑣瑣姻亞鄭箋云瑣瑣婚姻妻黨之小人 悄悄慘慘慍也 釋曰慍恨怒也皆賢人愁恨也邶風柏舟云憂心悄悄慍于羣小毛傳云慍怒也悄悄憂貌李巡曰慘慘憂之慍大雅抑篇云我心慘慘毛傳毛慘慘憂不樂也 瘡瘡瘵瘵病也 釋曰小雅杜杜云四牡瘡瘡毛傳云瘡瘡罷貌又大雅板篇云靡聖管管毛傳云管管無所依也小雅正月云憂心愈愈毛傳云愈愈憂懼也此皆賢人失志懷憂病也 殷殷惇惇切切惇惇欽欽京京忡忡惓惓忡忡奔奔憂也 釋曰小雅正月云憂心惓惓毛傳云惓惓然痛也又云憂心惇惇毛傳云惇惇憂意也檜風羔裘云勞心切切鄭箋云三諫不從待放而去思君如是心切切然又素冠云勞心惇惇毛傳云惇惇憂勞也秦風云憂心欽欽毛傳云思望之心中欽欽然小雅正月云憂心京京毛傳云京京憂不去也召南草蟲云未見君子憂心忡忡毛傳云忡忡猶衝衝也

云未見君子者謂在塗時也在塗而憂憂不當君子無以寧父母故心衝衝然又曰憂心惓惓毛傳云惓惓憂也小雅頍弁云憂心忡忡毛傳云忡忡憂盛滿也又云憂心奔奔毛傳云奔奔然無所薄也此皆作者歌事以詠心憂也 昫昫田也 釋曰謂耕懇開辟土田昫昫然也小雅信南山云昫昫原隰毛傳云昫昫墾辟貌 憂憂耜也 釋曰舍人曰憂憂耜入地之貌周頌良耜云憂良耜俶載南畝毛傳云憂憂猶測測也鄭箋云良善也農人測測以利善之耜熾蓄是南畝也是言耜之嚴利也 郝郝耕也 釋曰謂耕地其土解散郝郝然也周頌載芟云其耕澤澤鄭箋云土氣蒸達而和耕之則澤澤然解散郝郝澤澤並音釋其義亦同 釋曰舍人云穀皆生之貌載芟云驛驛其達毛傳云達射也鄭箋云達出地也是言其種調勻皆出地而生也釋與驛音義同 穉穉苗也 釋曰大雅生民云禾役穉穉毛傳云役列也 穉穉苗好美也是言茂好也 縣縣穉也 釋曰孫炎云縣縣言詳密也載芟云縣縣其庶毛傳云庶耘也說文云穉耨鋤田也字林云穉耕禾間也是言芸耨精也穉庶耘芸音義同 揜揜也粟粟衆也 釋曰孫炎云揜揜聲也李巡曰粟粟積聚之衆也良耜云穫之揜揜積之粟粟毛傳揜揜聲也粟粟衆多

也小爾雅云截穎謂之挫故郭云刈禾聲積聚緻也緻謂密也 溘溘浙也浮

浮浮氣也鄭箋云釋之烝之以爲酒及簠簋之實故郭云洮米聲氣出盛也溘

叟音異義同浮音義同 俵俵服也 釋曰周頌絲衣云載弁俵俵毛傳云

俵俵恭順貌鄭箋云載猶戴也弁爵弁也爵弁而祭於王士服也故郭云謂戴

弁服 峨峨祭也 釋曰大雅棫樸云奉璋峨峨毛傳云半珪曰璋峨峨盛壯

也鄭箋云璋璋瓚也祭祀之禮王裸以圭瓚諸臣助之亞裸以璋瓚奉璋之儀

峨峨然故郭云執圭璋助祭也 鏗鏗樂也 釋曰周頌執競云鍾鼓喤喤毛

傳云喤喤和也鄭箋云武王既定天下祭祖考之廟奏樂而八音克諧字書云

鏗鏗樂之聲也故郭云鍾鼓音喤鏗音義同

穰穰福也 釋曰執競云降福穰穰毛傳云穰穰衆也鄭箋云神與之福

又衆大謂如嘏辭也是言得福饒多也 子子孫孫引無極也 釋曰子子孫

孫小雅楚茨文也引無極也者作者所以釋之也舍人曰子孫長行美道引無

極也郭云世世昌盛長無窮 顒顒叩叩君之德也 釋曰此道人君之顒望

也顒顒叩叩大雅卷阿文也君之德也者作者釋之也案詩云顒顒叩叩如圭

如璋令聞令望毛傳云顒顒溫貌叩叩盛貌鄭箋云令善也王有賢臣與之以

禮義相切磋體貌則顒顒然敬順志氣則叩叩然高朗如玉之圭璋也人間之

則有善聲譽人望之則有善威儀德行相副 丁丁嚶嚶相切直也 釋曰直

猶正也小雅伐木云伐木丁丁鳥鳴嚶嚶鄭箋云昔日未居位在農之時與友

生於山巖伐木爲勤苦之事猶以道德相切直也故郭云丁丁伐木聲嚶嚶兩

鳥鳴以喻朋友切磋相正 藹藹至服也 釋曰大雅卷阿云藹藹王多吉士

鄭箋云王之朝多善士藹藹然又云萃萃萋萋離離喈喈毛傳云梧桐盛也

鳳皇鳴也臣竭其力則地極其化天下和洽則鳳皇樂德鄭箋云萃萃萋萋

喻君德盛也離離喈喈喻民臣和協是皆臣下盡力民人協服也故郭云梧桐

茂賢士衆地極化臣竭忠鳳皇應德鳴相和百姓懷附興頌歌也 佻佻契契

愈遐急也 釋曰愈益也遐遠也謂賦役不均小國困竭賢人憂歎遠益急切

也小雅大東云糾糾葛屨可以履霜佻佻公子行彼周行毛傳云佻佻獨行貌公

子譚公子也鄭箋云葛屨夏屨也周行周之列位也言時財貨盡雖公子衣屨

不能順時乃夏之葛屨今之履霜送轉餽因見使行周之列位者而發幣焉言

雖困乏猶不得止又云契契寤歎哀我憚人毛傳云契契憂苦也鄭箋云今譚

大夫契契憂苦而寤歎哀其民人之勞苦是也 寔寔粲粲尼居息也 釋曰
尼近也謂晏安盛飾近處優閑也小雅北山云或燕燕居息毛傳云燕燕安息貌
又大東云東人之子職勞不來西人之子粲粲衣服毛傳云東人譚人也來勤
也西人京師人也粲粲鮮盛也鄭箋云職主也東人勞苦而不見謂勤京師人
衣服鮮絜而逸豫言王政偏甚也 哀哀悽悽懷報德也 釋曰懷思也悲苦
征役思報父母之德也小雅蓼莪云哀哀父母生我劬勞鄭箋云哀哀者恨不
得終養父母報其生長已之苦郭音云悽本或作萋出車云赫赫南仲薄伐西
戎春日遲遲卉木萋萋是也言以此征役故思所生也所生謂父母 儵儵
嘒嘒禍毒也 釋曰罹遭也小雅小弁云踧踧周道鞠為茂草毛傳云踧踧平
易也周道周室之通道鞠窮也鄭箋云此喻幽王信褒姒之讒亂其德政使不
通於四方又曰菀彼柳斯鳴蜩嘒嘒毛傳云蜩蟬也嘒嘒聲也鄭箋云柳木茂
盛則多蟬案詩序云小弁刺幽王也太子之傳作焉毛傳云幽王取申女生大
子宜咎又說褒姒生子伯服立以為后而放宜咎將殺之故郭云悼王道穢塞
羨蟬鳴自得傷已失所遭讒賊儵踧並音狄 晏晏旦旦悔爽忒也
釋曰悔恨也爽忒差失也皆婦人恨夫棄已而行差失也衛風氓篇云總角

之宴言笑晏晏信誓旦旦毛傳云總角結髮也晏晏和柔也信誓旦旦毛鄭
箋云我為童女未笄結髮宴然之時女與我言笑晏晏然而和柔我其以信
相誓旦旦耳言其懇惻款誠案詩序云氓刺時也宣公之時禮義消亡淫風大
行男女無別遂相奔誘華落色衰復相棄背或乃困而自悔喪其妃耦故序
其事以風焉故郭云傷見絕棄恨 失也 皐皐瑋瑋刺素食也 釋曰素
空也刺無德而空食其祿也舍人曰皐皐不治之貌大雅召旻云皐皐訛訛
曾不知其玷毛傳云皐皐頑不知其道也鄭箋云玷缺也王政已大壞小人在
位曾不知大道之缺某氏云鞞鞞無德而佩小雅大東云鞞鞞佩璲不以其長
毛傳云鞞鞞玉貌璲瑞也鄭箋云佩璲者以瑞玉為佩佩之鞞鞞然居其官職
非其才之所長也徒美其佩而無其德刺其素飭是也郭云譏無功德尸寵祿
也者案鄭注禮記云尸謂不知人事無辭讓也以其尸者神象居位不言但受
祭享小人在位亦無言而受寵祿有似於尸故云尸寵祿也瑋瑋音義同
懼懼搖搖憂無告也 釋曰謂賢者憂懼無所告訴也大雅板篇云老夫灌灌
毛傳云灌灌猶欵欵也鄭箋云老夫諫女欵欵然王風云中心搖搖毛傳云搖
搖憂無所愬懼懼搖音義同 憲憲洩洩制法也 釋曰李巡曰皆惡黨

為制法則也孫炎曰厲王方虐諂臣並為制作法令大雅板篇云天之方難無然憲憲天之方蹶無然泄泄毛傳云憲憲猶欣欣也蹶動也泄泄猶沓沓也鄭箋云天斥王也王方欲艱難天下之民又方變更先王之道臣子女無憲憲然無沓沓然為之制法度達其意以成其惡皆是佐興虐政設教令也 謔謔謔謔謔謔也 釋曰崇增也謔謔也謔惡也言樂禍助虐增謔惡也舍人曰謔謔謔謔皆盛烈貌孫炎曰厲王暴虐大臣謔謔謔謔然盛以興謔惡也大雅板篇云天之方虐無然謔謔毛傳云謔謔然喜樂鄭箋云王方為酷虐之政女無謔謔然以謔謔助之又曰多將熇熇不可救藥毛傳云熇熇然熾盛也鄭箋云多行熇熇慘毒之惡誰能止其禍是也謔謔音義同 翁翁訛訛莫供職也 釋曰言賢者陵替姦黨熾盛背公恤私曠其職事無背供職也小雅小旻云滄滄訛訛亦孔之哀毛傳云滄滄然患其上訛訛然思不稱乎上鄭箋云臣不事君亂之階也甚可哀也又大雅召旻云臯臯訛訛毛傳云訛訛窳不共事也故郭云賢者陵替姦黨熾盛背公恤私曠職事說文云窳窳也草木皆自豎立惟瓜瓠之屬臥而不起似若嬾人常臥室故字從宀 眠音 速速蹙蹙惟速鞫也 釋曰惟念也速急迫也鞫窮也言鄙陋小人專據爵祿國土侵削致賢云永哀

憂其窮迫也小雅正月云藹藹方有穀毛傳云藹藹陋也鄭箋云穀祿也此言小人富而窶陋將貴也又節南山云蹙蹙靡所騁毛傳云騁極也鄭箋云蹙蹙小之貌我視四方土地日見侵削於夷狄蹙蹙然雖欲馳騁無所之也速藹音義同 抑抑密也秩秩清也 釋曰言威儀審諦德音清明也舍人曰威儀密靜也大雅假樂云威儀抑抑德音秩秩鄭箋云成王立朝之威儀致密無所失教令又清明天下皆樂仰之 粵峯掣曳也 釋曰孫炎曰謂相掣曳入於惡也郭云謂牽挽周頌小毖嗣王求助也云莫予弄蜂毛傳云弄蜂摩曳也鄭箋云羣臣小人無敢我摩曳謂為譎詐欺不可信也然則掣曳者從旁牽挽之言是挽離正道使就邪僻弄粵峯蜂掣摩音義同 朔北方也 釋曰舍人曰朔盡也北方萬物盡故言朔也李巡曰萬物盡於北方小雅出車云城彼朔方毛傳云朔方北方也但北方大名皆言朔方義典云宅朔方郭云謂幽朔 不俟不來也 釋曰俟待也既云不待是不來也故郭云不可待是不復來 不適不蹟也 釋曰適循也蹟軌跡也謂不循道者曰不蹟郭云言不循軌跡也小雅沔水云念彼不蹟毛傳云不蹟不循道也是矣 不徹不道也 釋曰小雅十月云天命不徹毛傳云徹道也鄭箋云不道者言王不循天之政教是也

勿念勿忘也 釋曰勿念念也念即不忘也若大雅文王篇云無念爾祖是也
 菱諼忘也注義見伯兮考盤詩 釋曰衛風伯兮云焉得諼草毛傳云諼草令
 人忘憂又考槃云永矢弗諼是也伯兮篇本或作菱草 每有雖也 釋曰小
 雅常棣云每有良朋況也永嘆毛傳云況茲永長也箋云每有雖也良善也當
 急難之時雖有善同門來茲對之長嘆而已郭云辭之雖也者言為語辭之雖
 無佗義也 饔酒食也 釋曰小雅天保云吉蠲為饔毛傳云吉善蠲絜也饔
 酒食也郭云猶今云饔饌皆一語而兼通者言饔之一字兼通酒食兩名也李
 巡曰得酒食則喜歡也 舞號雩也 釋曰孫炎云雩之祭有舞有號左傳云
 龍見而雩服杜皆云雩之言遠也遠謂百穀祈膏雨月令仲夏云大雩帝鄭注
 云雩吁嗟求雨之祭也郭云雩之祭舞者吁嗟而請雨是同鄭說也 暨不及
 也注公羊至得及 釋曰案春秋隱元年三月公及邾婁儀父盟于昧公羊傳
 曰及者何與也會及暨皆與也曷為或言會或言及或言暨會猶最也及猶汲
 汲也暨猶暨暨也及我欲之暨不得已也然則暨者非我欲之事不獲已而為
 會者也故云不及也 蠢不遜也 釋曰蠢動也遜順也言蠢動為惡不謙遜
 也小雅采芣云蠢爾蠻荆大邦為讎是也 如切至忘也 釋曰此舉衛風淇奧篇

文以釋之也云如切如磋者詩文也云道學也者作者以釋詩也道言也言道
 之學以成德如切磋骨象以成器毛傳云治骨曰切象曰磋道其學而成也故
 郭云骨象須切磋而為器人須學問以成德云如琢如磨者詩文也云自脩也
 者釋之也言人自脩飾如琢磨玉石毛傳云治玉曰琢石曰磨聽其規諫以自
 脩如玉石之見琢磨郭云玉石之被雕磨猶人自脩飾云瑟兮僖兮者詩文也
 恂慄也者釋之也謂嚴恂戰慄也故郭云恒戰竦毛傳云瑟矜莊貌僖寬大也
 是外貌莊嚴內心寬裕也云赫兮烜兮者詩文也威儀也者釋之也言赫烜者
 容儀發揚之言故言威儀也毛傳云赫有明德赫赫然咍威儀容止宣著也故
 郭云貌光宣云有斐君子終不可諼兮者詩文也云道盛德至善民之不能忘
 也者釋之也毛傳云斐文章貌諼忘也此道有斐然文章之君子盛德至善如
 此故民稱之常思詠終不能忘也案詩稱君子謂武公 既微至為煇 釋曰
 云既微且煇者小雅巧言文也云骭瘍為微腫足為煇者釋之也孫炎曰皆水
 溼之疾也郭云骭脚脛也瘍創也然則膝脛之下有瘡腫是涉水所為故鄭箋
 亦云此人居下溼之地故生微煇之疾詩云居河之麋是居下溼也 是刈是
 漘漘煮之也 釋曰云是刈是漘者周南葛覃文也云漘煮之也者釋之也舍

人曰是刈刈取之是漉煮治之郭云煮葛為絺綌以煮之於漉故曰漉煮非
訓漉為煮以彼下云為絺為綌故知煮葛為絺綌也毛傳云精曰絺麤曰綌
履帝武敏武迹也敏拇也釋曰云履帝武敏者大雅生民文也云武迹也敏
拇也者釋之也郭云拇迹大指處鄭箋詩云祀郊禘之時時則有大神之迹姜
嫄履之足不能滿履其拇指之處於是遂有身而生后稷是其事也張仲至
為友釋曰云張仲孝友者小雅六月文也云善父母為孝善兄弟為友者釋
之也李巡云張姓仲字其人孝故稱孝友毛傳云張仲賢臣也鄭箋云張仲吉
甫之友其性孝友以詩序云六月宣王北伐也故郭云周宣王時賢臣有客
至四宿也釋曰云有客宿宿有客信信者周頌有客文也云言再宿也言四
宿也者釋之也毛傳云一宿曰宿再宿曰信各重言之故知再宿及四宿也
美女為媛釋曰詩邶風君子偕老云展如之人兮邦之媛也故此釋之郭云
所以結好媛孫炎曰君子之援助然則由有美可以援助君子故云美女為媛
美士為彥釋曰鄭風羔裘云彼其之子邦之彥兮故此釋之也毛傳云彥士
之美稱郭云人所彥詠舍人曰國有美士為人所言道其虛其徐威儀容止
也釋曰云其虛其徐邶風北風文也威儀容止也者釋之也郭云雍容都雅

之貌孫炎云虛徐威儀謙退也然則虛徐者謙虛閑徐之義故鄭箋云威儀
虛徐寬仁者也詩作其邪此作其徐字雖異音實同故鄭箋云邪讀如徐
猗嗟名兮目上為名釋曰云猗嗟名兮者齊風猗嗟文也云目上為名者釋
之也孫炎云上平博郭云眉眼之間式微至者也釋曰云式微式微者抑
風式微文也云微乎微者也釋之也郭云言至微鄭箋云式發聲也案詩序云
式微黎侯寓于衛其臣勸以歸也然則以君被逐既微又見卑賤是至微也不
取式為義故鄭云發聲也之子者是子也釋曰詩言之子者多矣故此釋
之李巡云之子者論五方人言是子也然則之為語助人言之子者猶云是此
子也桃夭傳云之子彼說嫁事為嫁者之子漢廣之子則貞絜者之子東山之
子言其妻白華之子斥幽王各隨其事而名之故郭云斥所詠徒御不驚輦
者也釋曰云徒御不驚者小雅車攻文也云輦者也者釋之也此止解徒字
也諸徒皆為徒行此獨為輦是以辨之地官鄉師云大軍旅會同治其輦注云
輦人輓行所以載任器也立以為蕃營司馬法輦有一斧一斤一鑿一梃周輦
加二板二築夏后氏二十人而輦殷十八人而輦周十三人而輦是會同田獵
人輓輦以徒行也故郭云步挽輦車禮禘至搏也釋曰鄭風大叔于田云

禮褻暴虎故此釋之毛傳云禮褻肉袒也李巡曰禮褻脫衣見體曰肉袒孫炎曰袒去褻衣郭云脫衣而見體毛傳又云暴虎空手以禱之舍人口無兵空手搏之然則徒空也故郭云空手執也馮河徒涉也釋曰小雅小旻云不敢馮河故此釋之也李巡曰無舟而渡水曰徒涉郭云無舟楊毛傳云馮陵也然則空涉水陵波而渡故訓馮為陵也籛籛至面柔也釋曰邶風新臺云籛籛不鮮又曰得此戚施故此釋之也毛傳云籛籛不能俯者戚施不能仰者李巡曰籛籛巧言好辭以口饒人是謂口柔戚施和顏悅色以誘人是謂面柔但籛籛戚施本人疾之名故晉語云籛籛不可使俯戚施不可使仰是也人口柔者必仰面觀人之顏色而為辭似籛籛不俯之人因名口柔者為籛籛面柔者必低首下人媚以容色似戚施之人因名面柔者為戚施故郭云籛籛之疾不能俯口柔之人視人顏色常亦不伏因以名云夸毗體柔也釋曰大雅板篇云無為夸毗故此釋之也毛傳云夸毗以體柔人也李巡曰屈已卑身求得於人曰體柔然則夸毗者便僻其足前却為恭以形體順從於人故郭云屈已下身以柔順人也婆娑舞也釋曰陳風東門之枌云婆娑其下故此釋之李巡曰婆娑盤辟舞也郭云舞者之容孫炎曰舞者之容娑娑然則婆娑舞者之

狀貌也擗拊心也釋曰邶風柏舟云寤擗有擗擗謂拊心也郭云謂椎骨也矜憐撫掩之也釋曰撫掩猶撫拍謂慰恤也小雅鴻鴈云爰及矜人絨羔裘之縫也釋曰召南羔裘云羔裘之革素絲五絨故此解之也孫炎曰絨之為界絨然則縫合羔羊皮為裘縫即皮之界絨因名裘縫為絨故郭云縫飾羔皮之名殿屎呻也釋曰大雅板云民之方殿屎毛傳云殿屎呻吟也是用此為說郭云呻吟之聲孫炎云人愁苦呻吟之聲也幬謂之帳釋曰帳一名幬召南小星云抱衾與稠鄭箋云幬牀帳也郭云今江東亦謂帳為幬幬與稠音義同俯張誑也釋曰陳風防有鵲巢云誰侑予美毛傳云侑張誑也鄭箋云女衆讒人誰侑張誑欺我所美之人乎郭云書曰無或侑張為幻者周書無逸篇文也引之者以證侑張謂幻惑欺誑人者誰昔昔也釋曰陳風墓門云誰昔然矣毛傳云昔久也郭云誰發語辭與毛同也不辰不時也釋曰辰亦時也不辰者言不得其時也大雅桑柔云我生不辰逢天憊怒是也凡曲者為留釋曰曲簿也凡以簿取魚為留郭云毛詩傳曰留曲梁也者小雅魚麗篇傳文也云凡以簿為魚笱者名為留者即釋器云笱婦之笱謂之留也鬼之為言歸也釋曰人死為鬼小雅何人斯云為鬼為蜮周禮曰享大鬼謂

之鬼者鬼猶歸也若歸去然故尸子曰古者謂死人為歸人

釋親第四

釋曰案禮記大傳云聖人南面而聽天下所且先者五民不與焉一曰治親蒼頡曰親愛也近也然則親者恩愛狎近不疏遠之稱也書曰克明俊德以親九族喪服小記曰親親以三為五以五為九上殺下殺旁殺而親畢矣以九族之親其名謂非一此篇釋之故曰釋親 父為至宗族 釋曰此別同宗親族白虎通曰父矩也以度教子也又為考考成也言有成德廣雅云母牧也言有養子也又為妣妣媼也媼匹於父廣雅又云兄況也況於父又謂之舅弟悌也言順於兄子孜也以孝事父常孜孜也孫順也順於祖男任也任家事也女如也白虎通曰言如人也徐鍇曰女子從父之教從夫之命故曰如姑故也言尊如故也又謂之威徐鍇曰土盛於戌土陰之土也故字從戌漢律曰婦告威姑是也姊咨也以其先生言可咨問說文云妹女弟也又謂之媢媢接也鄭注禮記云聞彼有禮走而往焉以得接見於君子也庶母者父之妾也此皆同宗之族也白虎通云宗者何謂也宗者尊也為先祖主也宗人之所尊也禮記曰宗人將有事族人皆侍侍所以必有宗何也所以長和睦也族者何也族者湊也聚

也謂恩愛相流湊也生相親愛死相哀痛有會聚之道故謂之族也 注禮記至例也 釋曰云禮記曰生日父母妻死曰考妣嬪者曲禮下篇文也云今

世學者從之者謂從禮記以父母妻為生之稱以考妣嬪為死之稱彼乃記者一家之說爾學者膠柱遂為生死定稱非也故郭氏引諸文以證之云尚書

曰大傷厥考心康誥文也云事厥考厥長聰聽祖考之彝訓者皆酒誥文也云如喪考妣者舜典文也此皆生稱考妣也云公羊傳曰惠公者何隱之考也仲子者何桓之母也者隱元年傳文也此即死稱母也云蒼頡篇曰考妣延

年者此亦生稱考妣也云書曰嬪于虞者堯典文也云詩曰曰嬪于京大雅大明篇文也云周禮有九嬪之官者屬天官掌婦學之法者也此皆生稱嬪者也云明此非死生之異稱矣者所以破先儒之說也云其義猶今謂兄為舅妹為媢即此例也者舉類以曉人也 注從祖而別世統異故 釋曰解所以稱從

之理也從祖而別繼世分宗其統各異故曰從祖 注世有為嫡者嗣世統故也 釋曰解所以稱世之義也繼世以嫡長先生於父則繼世者也故曰世父說

文叔作未許慎曰從上小言尊行之小也 注同姓之親無服屬 釋曰禮記大傳云親者屬也鄭注云有親者服各以其屬親疏此經言親同姓者謂五世

之外比諸同姓猶親但無服屬爾 注孫猶後也 釋曰言繼後嗣也廣雅云
孫順也許慎云從子從系系續也言順續也言順續先祖之後也 注立者言
親屬微昧也 釋曰立者緦繼之間色色之微昧者也親屬微昧故曰立孫也
注昴後也汲冢竹書曰不窋之昴孫 釋曰昴後也釋言文束哲傳曰太康元
年汲郡民盜發魏安釐王塚得竹書漆字科斗之文科斗文者周時古文也其
字頭麤尾細似科斗之蟲故俗名之焉不窋后稷之子也昴孫謂毀榆 母之
至母黨 釋曰此一節別母之族黨也黨是鄉之細也此外族屬母若黨之屬
鄉故云母黨云舅者孫炎云舅之言舊尊長之稱詩秦風云我送舅氏曰至渭
陽是也 妻之至妻黨 釋曰此一節別妻之親黨也內則云聘則為妻白虎
通云妻者齊也與夫齊體自天子下至庶人其義一也 注孟子曰帝館生于二
室 釋曰孟子云舜尚見帝帝館甥于貳室亦饗舜迭為賓主是天子而友匹
夫也彼注云尚上也舜在畎畝之時堯友禮之舜上見堯舍之於貳室貳室副
宮也堯亦就饗舜之所設更迭為賓主禮記妻父曰外舅謂我舅者吾謂之甥
堯以女妻舜故謂堯甥卒與之天位是天子之友匹夫也 注四人至依次
釋曰四人謂姑之子舅之子妻之昴弟姊妹之夫也此四人尊卑體敵更相為

甥云甥猶生也者取相親之意也 注詩曰邢侯之姨譚公維私 釋曰皆衛
風碩人篇文也孫炎曰私無正親之言然則謂吾姨者我謂之私邢侯譚公皆
莊姜姊妹之夫互言之耳春秋譚子奔莒則譚是子爵言公者蓋依臣子稱便
文耳 注公羊傳曰蓋舅出 釋曰案春秋襄五年夏叔孫豹鄆世子巫如晉
公羊傳曰外相如不書此何以書為叔孫豹率而與之俱也叔孫豹則曷為率
而與之俱蓋舅出也何休云巫者鄆前夫人襄公母姊夫之子也俱莒外孫
故曰舅出是也 注左傳曰姪其從姑 釋曰案僖十五年傳云初晉獻公筮
嫁伯姬於秦遇歸妹之睽史蘇占之曰不吉其繇曰姪其從姑杜注云震為
木離為火火從木生離為震妹於火為姑謂我姪者我謂之姑謂子圉質
秦是也 注公羊至弟也 釋曰春秋莊十九年秋公子結媵陳人之婦于鄆
遂及齊侯宋公盟公羊傳曰媵者何諸侯娶一國則二國往媵之以姪從姪
者何兄之子也弟者何弟也諸侯壹聘九女諸侯不再娶何休云必以姪從
之者欲使一人有子二人喜也所以防嫉妬令重繼嗣也因以備尊尊親親也
九者極陽數也不再娶者所以節人情開媵路 注猶今言新婦是也 釋曰
儀禮喪服傳云夫人昆弟何以無服也其夫屬乎父道者妻皆母道也其夫屬

乎子道者妻皆婦道也謂弟之妻婦者是嫂亦可謂之母乎故名者人治之
大者也可無慎乎鄭注云道猶行也言婦人棄姓無常秩嫁於父行則爲母行
嫁於子行則爲婦行謂弟之妻爲婦者卑遠之故謂之婦嫂者尊嚴之稱是
嫂亦可謂之母乎嫂猶叟也叟老人稱也是爲序男女之別爾若已以母婦之
服服兄弟之妻兄弟之妻以舅子之服服已則是亂昭穆之序也治猶理也父
母兄弟夫婦之理入倫之大者可不慎乎大傳曰同姓從宗合族屬異姓主名
治際會名著而男女有別是別嫂婦之名也郭云猶今言新婦者以時驗而知
也至今猶然注今相呼先後或云妯娌釋曰廣雅云娣妯妯娌娣妯先後
也世人多疑娣妯之名皆以爲兄妻呼弟妻爲娣弟妻呼兄妻爲妯因卽惑
於斯文不知何以爲說今謂母婦之號隨夫尊卑娣妯之名從身長幼以其俱
來夫族其夫班秩既同尊卑無以相加遂從身之少長喪服小功章曰娣妯婦
報傳曰娣妯婦者弟長也以弟長解娣妯言娣是弟妯是長也公羊傳亦云娣
者何弟也是其以弟解娣自然以長解妯長謂身之年長非夫之年長也此云
長婦謂稚婦爲娣婦婦謂長婦爲妯婦者止言婦之長稚不言夫之大小
左傳成十一年穆姜謂聲伯之母爲妯昭二十八年傳叔向之嫂謂叔向之妻

爲妯二者皆呼夫弟之妻爲妯豈計夫之長幼乎上云女子同出謂先生爲妯
後生爲娣郭云同出謂俱嫁事一夫也事一夫者以已生先後爲娣妯則知娣
妯以已之年非夫之年也故賈逵鄭玄及杜預皆云兄弟之妻相謂爲妯言兩
人相謂謂長者爲妯知娣妯之名不計夫之長幼也婦稱至婚姻釋曰此
別夫婦婚姻之名也說文云婦服也從女持帚灑埽也白虎通云夫婦者何謂
也夫者扶也以道扶接婦者服也以禮屈服謂之舅姑者何舅者舊也姑者故
也舊故老人稱也夫之父母謂舅姑何尊如父而非父者舅也親如母而非母
者姑也鄭注喪服傳云女子子者子女也別於男子也說文云壻女之夫也從
士從胥聞一知十爲士胥者有才知之稱故謂女之夫爲壻廣雅云壻謂之倩
方言云東齊之間壻謂之倩白虎通云婚姻者何謂昏時行禮故曰婚婦人因
夫而成故曰姻注國語曰吾聞之先姑釋曰魯語季康子問於公父文伯
之母曰主亦有以語肥也對曰吾能老而已何以語子康子曰雖然肥願有聞於主對
曰吾聞諸先姑曰君子能勞後世有繼子夏聞之曰善哉商聞之曰古之嫁者
不及舅姑謂之不幸夫婦學於舅姑者也是矣注詩曰瑣瑣姻亞釋曰小
雅節南山文也劉熙釋名云兩壻相謂爲亞者言每一人取姊一人取妹相亞

次也又並來女氏則姊夫在前妹夫在後亦相亞也 注古者皆謂婚姻為兄弟 釋曰禮記曾子問曰昏禮既納幣有吉日女之父母死則如之何孔子曰壻使人弔如壻之父母死則女之家亦使人弔鄭注云必使人弔者未成兄弟又云父喪稱父母喪稱母父母不在則稱伯父世母壻已葬壻之伯父致命女氏曰某之子有父母之喪不得嗣為兄弟使某致命女氏許諾而弗敢嫁禮也是古者謂昏姻為兄弟以夫婦有兄弟之義或據壻於妻之父母有總服故得謂之兄弟也 注書曰嬪于虞 釋曰案堯典羣臣共舉舜於帝帝曰我其試哉女于時觀厥刑于二女釐降二女子媯汭嬪于虞孔安國注云降下嬪婦也舜為匹夫能以義理下帝女之心於所居媯水之汭使行婦道於虞氏是也

爾雅疏卷第四

光緒四年歲在著雍攝提格吳興陸氏十萬卷樓重雕

陸心源校

爾雅疏卷第五

翰林侍講學士朝請大夫守國子祭酒上柱國賜紫金魚袋臣邢 昺 等奉 勅校定

釋宮第五

釋器第六

釋樂第七

釋宮第五

釋曰易繫辭云上古穴居而野處後世聖人易之以宮室上棟下宇以待風雨蓋取諸大壯此其始也白虎通云黃帝作宮室世本曰禹作宮室其臺榭樓閣之異門墉行步之名皆自於宮故以釋宮惣之也 宮謂之室室謂之宮 釋曰別二名也郭云皆所以通古今之異語明同實而兩名釋名云宮穹也言屋見於垣上穹崇然也室實也言人物實滿於其中也是所從言之異耳詩言作于楚宮又曰八此室處是也古者貴賤所居皆得稱宮故禮記曰由命士以上父子皆異宮又喪服傳繼父為其妻前夫之子築宮廟是士庶人皆有宮稱也至秦漢以來乃定為至尊所居之稱 牖戶至之家 釋曰牖者戶西窻也此牖東戶西為牖戶之間其處名展云其內者其展內也自此展內即謂之家說

文云家居也禮記云已受命君言不宿於家郭云今人稱家義出於此言其稱
家之義本出於此也 注禮云至名之 釋曰云禮云斧展者案觀禮云天子
設斧依於戶牖之間左右几鄭注云依如今綈素屏風也有繡斧文所以示威
也斧謂之繡是也云以其所在處名之者言本牖戶之間名展觀禮天子設屏
風之狀於牖戶之間因名此屏風為展是以其在展處即名之曰展也 東西
牆謂之序 釋曰此謂室前堂上東廂西廂之牆也所以次序分別內外親疏
故謂之序也尚書顧命云西序東嚮敷重底席東序西嚮敷重豐席及禮經
每云東序西序者皆謂此也 西南至之變 釋曰此別室中四隅之異名也
云奧者孫炎云室中隱奧之處也古者為室戶不當中而近東則西南隅最為
深隱故謂之奧而祭祀及尊者常處焉曲禮云凡為人子者居不主奧是也西
北隅名屋漏東北隅名宦東南隅名突突亦隱闇之義也與奧相類故郭云亦
也 注詩曰至未詳 釋曰云詩曰尚不媿於屋漏者大雅抑篇文也鄭箋云
尚無肅敬之心不慙媿於屋漏有神見人之為也屋小帳也漏隱也禮祭於奧
既畢改設饌於西北隅而扉隱之處此祭之末也孫炎云屋漏者當室之白日
光所漏入郭云其義未詳者以孫鄭之說皆無所據故不取也注宮見禮亦

未詳 釋曰李巡云東北者陽始起育養萬物故曰宦宦養也說文亦云郭云
亦未詳者以頤養之字作頤又室中四隅無取陰陽之義與屋漏意同故云亦
未詳也 注禮曰埽室聚爨 釋曰案既夕記云朔月童子執帚卻之左手奉
之從徹者而入比奠舉席埽室聚諸爨布席如初卒奠埽者執帚垂末內鬣
從執燭者而東是其事也 柎謂至之危 釋曰此別門戶上下及兩旁之木
名也柎者孫炎云門限也經傳諸注皆以闕為門限謂門下橫木為內外之
限也俗謂之地柎一名闕曲禮云不履闕是也柎者門兩旁長木一名楔李巡
曰柎謂柎土兩旁木禮記玉藻云君入門士介拂柎鄭注云柎門楔也楣即梁
也呂伯雍云門樞之橫梁也郭云門戶上橫梁鄉射記云堂則物當楣是也樞
者門扉開闔之所由也一名樞易曰樞機之發是也其持樞之十或達北樞以
為牢固者名落時樞即棟也落時又名危是持樞一木有此二名也 堦謂至
之堦 釋曰此別宮室垣墉及脩飾之名也堦者堂角也一名堦牆者室之防
也一名墉李巡曰謂垣牆也郊持牲曰君南鄉於北墉下注云社內北牆是也
亦為城王制注云小城曰附庸大雅皇矣云以伐崇墉義得兩通也鏝者泥鏝
也一名枋塗土之作具也論語曰糞土之牆不可朽是也樁者斫木所用以藉

者之木名也一名榱孫炎云斲木質也詩商頌云方斲是虔是也又名檜穀梁
傳曰裘纒檜以為臬是也以黑飾地謂之黝以白飾牆謂之聖周禮守祧職云
其祧則守祧黝聖之是也 注在堂隅玷端也 釋曰玷名見於經傳者有三
案禮記明堂位云反玷出尊崇玷元圭及論語邦君為兩君之好有反玷此二
者在兩楹之間以土為之非此經所謂也案既夕記云設楹于東堂下南順齊
于玷士冠禮云爵弁皮弁緇布冠各一簠執以待于西玷南則此經所謂也鄭
注云玷在堂角然則堂之東南角為東玷西南角為西玷故郭云在堂隅玷端
也端則端也言玷是堂角端也 注書曰既勤垣墉 釋曰此周書梓材篇文
也案彼云若作室家既勤垣墉惟其塗墍茨孔傳云如人為室家已勤立垣墉
惟其當塗墍茨蓋之此喻教化也 檝謂至之閣 釋曰此別杖所在長短之
名也杖即檝也一名檝置杖在牆者名檝在地及門中者名臬王藻云公事自
闌西私事自闌東是也大者名拱長者名閣也 注禮記曰不敢縣於夫之檝
檝 釋曰此內則文也鄭注云竿謂之檝檝杖也 閣謂至之榭 釋曰別臺
榭之制也積土四方而高者名臺即下云四方而高者也一名閣李巡云積土
為之所以觀望詩云出其闔閭彼以閣為城臺於此臺上有木起屋者名榭月

令仲夏云可以處臺榭謂此也 雞棲至為峙 釋曰李巡曰別雞所棲之名
也弋檠也鑿牆為雞作棲曰峙 注今寒至見詩 釋曰云今寒鄉穿牆棲雞
者謂苦寒之鄉也避寒故穿牆以棲雞云皆見詩者案王風君子于役云雞棲
于峙又曰雞棲于桀是也 植謂之傳傳謂之突 釋曰植謂戶之維持鑱者
也植木為之因名云又名傳又名突也文見埤蒼 宋窟至之檣 釋曰此別
梁柱棟榱之名也梁即屋大梁也一名宋窟檣柱也其梁上短柱名椽禮器云
藻椽者謂畫梁上柱為藻文也一名侏儒柱以其短小故也開者柱上木名也
又謂之椽又名檣亦名枅字林云枅柱上方木是也又曰楮是一物五名也枅
一名棗即櫨也皆謂斗拱也禮器云管仲出節者謂刻柱頭為斗拱形如山
也棟屋櫨也一名榱今屋脊也易曰棟隆吉是也桷屋椽也一名榱呂沈云齊
魯名桷周人名榱易曰鴻漸于木或得其桷左傳子產曰棟折榱崩僑將壓
焉是也屋椽長直而遂達五架屋際者名闕郭云謂五架屋際椽正相當若其
椽直不上於檐者名交言相交於櫨上也郭云謂五架屋際椽不直上檐交於
櫨上屋檐一名櫨一名屋栢又名字皆屋之四垂也故士喪禮曰為銘置于
宇西階上鄭注云宇栢是也 容謂之防 釋曰容者射禮唱獲者蔽身之

物也一名防言所以容身防矢也一名乏鄉射禮云乏三侯道居侯黨之一西
五步鄭注云容謂之乏所以爲獲者御矢也謂之乏者言矢至此力乏也郭云
形如今牀頭小曲屏風唱射者所以自防隱見周禮者案夏官射人職云以
射灋治射儀王以六耦射三侯三獲三容鄭司農云容者乏也待獲者所蔽也
是矣連謂之篠釋曰篠樓閣邊相連小屋名也郭云堂樓閣邊小屋今
呼之篠厨連觀也屋上薄謂之筮釋曰屋上薄一名筮今謂之屋筮也
兩階開至屏謂之樹釋曰此別君臣之位處也人君南面鄉明而治其位在
兩階開因名鄉也云中庭之左右謂之位者左右猶東西也位羣臣之列位也
案明堂位云三公中階之前北面東上諸侯之位阼階之東西面北上諸伯之
國西階之西東面北上諸子之國門東北面東上諸男之國門西北面東上是
也云門屏之間謂之宁者謂路門之外屏樹之內人君視朝宁立之處因名爲
宁李巡云正門內兩塾間曰宁曲禮曰天子當宁而立諸公東面諸侯西面曰
朝是也云屏謂之樹者屏蔽也樹立也立牆當門以自蔽也李巡曰垣當門自
蔽名曰樹郭云小牆當門中禮禘云天子外屏諸侯內屏郊特牲云旅樹鄭注
云旅道也屏謂之樹樹所以蔽行道以此推之則諸侯內屏在路門之內天子

外屏在路門之外而近應門者矣闕謂至謂之闕釋曰此別門闕之異名
也李巡曰闕廟門名其路門之外受朝正門一名應門應門之外門曰雉門雉
門之旁名觀又名闕宮中相通小門名闔闔之小者名閨闔之小者名閭街頭
之門名閨門側之堂夾門東西者名塾門中之櫺名闔一名闔闔門扇也一名
扉於門辟旁樹長櫺所以止扉者名闕注詩曰祝祭於祊釋曰小雅楚茨
篇文也案祊本廟門之名設祭於廟門因名其祭亦名祊凡祊有二種是正祭
之時既設於廟又求神於廟門之內郊特牲云索祭祝于祊及詩云祝祭于祊
注云祊平生門內之愛待賓客之處與祭同日也二是明日釋祭之時設饌於
廟門外西室亦謂之祊卽郊特牲注云祊之禮宜於廟門外之西室及禮器云
爲祊乎外是也然則廟門內外皆有祊稱注朝門釋曰案詩大雅云迺立
臯門臯門有伉迺立應門應門將將鄭箋云諸侯之宮外門曰臯門朝門曰應
門內有路門天子之宮加以庫雉案鄭玄注周禮秋官朝士職王五門臯庫雉
應路也又曰天子諸侯皆有三朝外朝一內朝二其天子外朝一者在臯門之
內庫門之外大詢衆庶之朝也朝士掌之內朝二者正朝在路門外司士掌之
燕朝在路門內大僕掌之諸侯之外朝一者在臯門內應門外內朝二者亦

在路寢門之外內以正朝在應門內故謂應門爲朝門也 注宮門雙闕 釋曰周禮大宰正月之吉縣治象之法于象魏使萬民觀治象鄭衆云象魏闕也劉熙釋名云闕在門兩旁中央闕然爲道也白虎通云闕是闕疑義亦相兼然則其上縣法象其狀魏魏然高大謂之象魏使人觀之謂之觀也是觀與象魏闕一物而三名也以門之兩旁相對爲雙故名雙闕 注左傳曰盟諸僖閔釋曰襄十一年傳文也案彼云季武子將作三軍叔孫穆子曰然則盟諸乃盟諸僖閔杜注云僖公之門是也 注公羊傳曰齒著于門闔 釋曰莊十二年傳文也案彼云宋萬搏閔公絕其脰仇牧聞君弑趨而至遇之于門手劍而叱之萬辟撥仇牧碎其首齒著乎門闔何休云闔扇也是矣 注左傳曰高其閔閔 釋曰襄三十一年傳云子產相鄭伯以如晉晉侯以我喪故未之見也子產使盡壞其館之垣而納車馬焉士文伯讓之曰敝邑以政刑之不脩寇盜充斥無若諸侯之屬辱在寡君者何是以令吏人完客所館高其閔閔是也案說文云閔門也汝南平輿里門曰閔閔旣爲門故郭氏以閔爲長杙卽門槩也杜預云閔門也非郭義也 瓠瓠謂之甃 釋曰瓠瓠一名甃郭云甃甃也今江東呼瓠甃詩陳風云中唐有甃是也 宮中至之達 釋曰此別街道

之異名也宮中街閭間道名壺孫炎曰巷舍間道也王肅曰今後宮稱永巷是宮內道名也廟中之路名唐堂下至門徑名陳路旅皆途之別名也途卽道也路場猷行四者復是道之異名也一達長道謂之道路歧分二達者謂之歧旁言岐道旁出也岐分三達者謂之劇旁孫炎云旁出岐多故曰劇交道四旁謂之衢交道四出復有一旁達謂之康孫炎云康樂也交會樂道也交道六出謂之莊孫炎云莊盛也道煩盛三道交出復有岐出者謂之劇驂四道交出謂之崇期四道交復有一岐出者謂之達 注詩曰中唐有甃 釋曰此詩陳風防有鵲巢篇文也 注史記所謂康莊之衢 釋曰案史記列傳云騶奭者齊諸騶子亦頗采騶衍之術以紀文於是齊王嘉之自如淳于髡以下皆命曰別大夫爲開第康莊之衢是也 注左傳曰得慶氏之木百車於莊 釋曰案襄二十八年齊慶封謀殺子雅子尾陳文子謂桓子曰禍將作矣吾其何得對曰得慶氏之木百車於莊杜注云慶封時有此木積於六軌之道是也 注四道交出復有旁通 釋曰詩周南云施于中逵毛傳云逵九達之道是也案左傳隱十一年云及大逵桓十四年焚渠門八及大逵莊二十八年衆車入自純門及達市宣十二年入自皇門至于達路杜預皆以爲道並九軌案周禮經涂九

軌不名曰達杜意蓋以鄭之城內不應有九出之道故以為並九軌於此則不合也 室中至之奔 釋曰此皆人行步趨走之處因以名云室中名時時然後動堂上曰行謂平行也堂下曰步白虎通云人踐三尺法天地人再舉足曰步備陰陽也門外曰趨鄭玄云行而張拱曰趨中庭曰走走疾趨也大路曰奔奔大走也書曰駿奔走案此經所釋謂祭祀之禮知者以召誥云王朝步自周則至于豐注云告文王廟告文王則告武王可知出廟入廟不以遠為文是也若迎賓則樂師云行以肆夏趨以采薺行謂大寢之庭至路門趨謂路門至應門 隄謂至之衙 釋曰此別衙之名也隄一名梁郭氏兩解一云即橋也以木為之一云以石絕水石杠一名衙郭氏亦兩解一云聚石水中以為步渡衙也廣雅云衙步橋也一云或曰今之石橋 注或曰石絕水者為梁見詩傳 釋曰案衛風云有狐綏綏在彼淇梁傳云石絕水曰梁是也 注孟子曰歲十月徒杠成 釋曰案孟子云子產聽鄭國之政以其乘輿濟人於溱洧孟子曰惠而不知為政歲十一月徒杠成十二月輿梁成民未病涉也趙岐注云以為子產有惠民之心不知為政當以時脩橋梁民何由病苦涉水平是也引之以證石杠為步橋也此注作十月誤脫或所見本異 室有至曰樓 釋曰

此明寢廟樓臺之制也凡太室有東西廂夾室及前堂有序牆者曰廟但有大室者曰寢月令仲春云寢廟畢備鄭注云前曰廟後曰寢以廟是接神之處其處尊故在前寢衣冠所藏之處對廟為卑故在後無室者名榭春秋宣十六年夏成周宣榭火杜預云宣榭講武屋引此文無室曰榭謂屋歇前然則榭有二義一者臺上構木曰榭上云有木曰榭及月令云可以處臺榭是也二屋歇前無辟者名榭其制如今廳事也春秋云成周宣榭公羊以為宣宮之榭及鄉射禮云榭則鉤楹內是也郭云榭即今堂堦者堂堦即今殿也殿亦無室故云即今堂堦四方而高者名臺即上閣也脩長也凡臺上有屋狹長而屈曲者曰樓

釋器第六

釋曰案說文云器皿也從犬犬所以守之以此篇釋諸器之名故曰釋器 木豆謂之豆注豆禮器也 釋曰案周禮旅人為豆實三而成穀崇尺鄭注云崇高也豆實四升又祭統云夫人薦豆執校執醴授之執鐙鄭注云校豆中央直者也鐙豆下跗也又禮圖云口圓徑尺黑漆飾 中大夫以上畫以雲氣諸侯以象天子以玉皆謂飾其豆口也然則豆者以木為之高一尺口圓徑一尺其足名鐙中央直豎者名校校徑二寸搃而言之名豆豆實四升用薦菹醢周禮

湘水為賦以弔屈原其詞曰幹棄周鼎寶康瓠今是也 斫斲謂之定 釋曰斫斲一名定郭云鋤屬李巡曰鋤別名也廣雅云定謂之耨世本云垂作耨呂氏春秋云耨柄尺此其度也其耨六寸所以閒稼也高誘注云耨芸苗也六寸所以入苗閒詩頌臣工云序乃錢鎛毛傳云鎛耨也鎛耨及定當是一器但先儒或即云鋤或云鋤屬古器變易未能識之所謂之鎛 釋曰斫一名鎛郭云鑿也說文云鑿大鋤也 斛謂之鑿 釋曰郭云皆古鋤鋪字方言云燕之東北朝鮮洌水之間謂之斛宋魏之間謂之鏹或謂之鏹 江淮南楚之間謂之雷趙魏之間謂之臬 是皆謂今鋤也 纒罟至覆車也 釋曰此別羅網之異名也罟罔也纒罟一名九罟即魚罔也嫠婦之笱取魚器也一名雷罟一名汕罩捕魚籠一名筐積柴水中取魚名糝又名泮鳥罔名羅免罔名置糜罔名罟罟冒也言冒覆其頭也彘猪也其罔名羅羅幕也言幕絡其身也魚之大罔名罟翻車小罔捕鳥者名縻也置也罟也學也皆謂覆車也 注今之至為纒 釋曰云今之百囊罟是亦謂之罟今江東呼為纒者以時驗而言也孫炎云九罟謂魚之所入有九囊也詩豳風云九罟之魚鱗魴是也 注毛詩至魚笱 釋曰云毛詩傳曰雷曲梁也者小雅云魚麗于雷傳云雷曲梁也是矣

云謂以簿為魚笱者孫炎云雷曲梁其功易故謂之寡婦之笱然則曲簿也嫠寡也以簿為魚笱其功易號之寡婦之笱耳非寡婦所作也 注今之撩罟 釋曰李巡云汕以簿汕魚也案詩小雅云南有嘉魚烝然汕汕傳云櫟也箋云櫟今之撩罟也皆以今曉古 注捕魚籠也 釋曰李巡云筐編細竹以為罩捕魚也孫炎云今楚筐也然則罩以竹為之無竹則以荊故謂之楚筐皆謂捕魚籠也詩小雅云南有嘉魚烝然罩罩是也 注今之至取之 釋曰李巡曰今以木投水中養魚曰泮孫炎曰積柴養魚曰糝郭云今之作糝者聚積柴木於水中魚得寒入其裏藏隱因以簿圍捕取之小爾雅曰魚之所息謂之潛潛糝也積柴水中魚舍也詩周頌云潛有多魚是也糝霖潛泮古今字 注謂羅絡之 釋曰李巡云鳥飛張網以羅之然則張網以羅絡飛鳥詩王風云雉離于羅是也 注置猶遮也見詩 釋曰詩周南云肅肅兔置是也李巡云兔自作徑路張置捕之也然則張罔遮兔因名曰置 注最大罟也今江東云濊 釋曰李巡曰魚罟捕魚具也然則捕魚之具最大者名罟詩衛風云施罟濊濊是也 注今之至異語 釋曰孫炎曰覆車網可以掩兔者也一物五名方言異也郭云今之翻車也有兩轅中施罟以捕鳥展轉相解廣異語廣雅云

胥也案詩王風云雉離于學又曰雉離于量然則捕鳥之具也孫氏云掩兔非也 絢謂之救 釋曰郭氏兩解一云救絲以爲絢絢履頭飾也士冠禮曰玄端黑履青絢鄭注云絢之言拘也以爲行戒狀如刀衣鼻在履頭是也或曰絢履屬小爾雅曰鳥而今絢也一云亦胥名者言此經絢亦胥之別名也義疑故兩存焉律謂之分 釋曰律一名分鄭注月令云律候氣之管也以銅爲之律歷志云黃帝使伶倫氏自大夏之西崑崙之陰取竹之解谷斷兩節閒而吹之以爲黃鍾之宮制十二箛以聽鳳皇之鳴其雄鳴則爲六律雌鳴則爲六呂陽管爲律律法也言陽氣與陰氣爲法鄭云律述也述氣之管陰管爲呂律歷志云呂助也言助陽宣氣又云呂拒也言與陽相承更迭而至又陰律稱同言與陽同也揔而言之陰陽皆稱律故月令十二月皆云律中是也以其分候十二月氣故又名分郭云律管可以分氣是也 大版至縮之 釋曰此解詩云縮版以載也大版名業以繩束版謂之縮 注築牆版也 釋曰孫炎曰業所以飾柶刻版捷業如鋸齒也毛詩傳云業大版也所以飾柶爲縣也捷業如鋸齒或曰畫之然則業者是樂縣之飾郭必以爲築牆版者以此文與縮之相連詩云縮版以載作者以類相從縮既築牆所用之繩則業是築牆之版

明矣散而言之則業亦樂縣之飾故詩大雅云虞業維樅周頌云設業設虞而毛鄭皆以爲大版所以飾柶爲縣也 注縮者至以載 釋曰孫炎云繩束築版謂之縮然則縮者束物之名用繩束版故謂之縮復言縮之明用繩束之也故云縮者約束之云詩曰縮版以載者大雅縣篇文也 彝卣至之坎 釋曰別酒尊大小之異名也彝其揔名彝者法也與諸尊爲法司尊彝云雞彝鳥彝斝彝黃彝虎彝雉彝是也卣者下云卣中尊也孫炎云尊彝爲上疊爲下卣居中郭云不大不小者是在疊彝之間卣周禮犧象壺著大山等六尊是也疊者尊之大者也卣周禮司尊彝云皆有疊諸臣之所酢是也案禮圖云六彝爲上受三斗六尊爲中受五斗六疊爲下受一斛故異義疊制韓詩說金疊大夫器也天子以玉諸侯大夫皆以金士以梓毛詩說金疊酒器也諸臣之所酢人君以黃金飾尊大一碩金飾龜目蓋刻爲雲雷之象謹案韓詩說天子以玉經無明文謂之疊者取象雲雷博施如人君下及諸臣又司尊彝云皆有疊諸臣之所酢注云疊亦刻而畫之爲山雲之形言刻畫則用木矣故禮圖依制度云刻木爲之韓說言士以梓士無飾言其木體則以上同用梓而加飾耳毛說言大一碩禮圖亦云大一斛則大小之制尊卑同也雖尊卑飾異皆得畫雲雷

之形以其云疊取於雲雷故也是彝占疊三者皆為盛酒器也其疊之小者別名坎 衣梳至謂之縹 釋曰此別衣服之異名也云衣者目之也梳一名祝刺繡黼文於衣領名褱衣之緣飾名純禮記深衣云衣純以績衣純以青之類是也祝衣開孔也名褱說文云鬼衣也衣背名褱謂交領也方言云衿謂之交是也褱一名裾即衣後裾也衿衣小帶也一名衿士昏禮曰施衿結帨是也佩下之帶名褱衽裳際也手執持其衽名袷袷於帶名縹詩周南云薄言袷之薄言縹之是也衣之蔽前者名褱婦人之香縹名褱又謂之縹縹縹也縹猶繫也取繫屬之義衣下曰裳削殺也裳削殺其幅者名褱謂深衣之裳也 注衣縹至之飾 釋曰此郭氏兩解一云衣縹也本或作縹音方云縹謂之衽又謂之衽切子侯 彼注云即衣衿也云齊人謂之縹者以目驗而言也一云或曰衽衣之飾者釋名曰婦人上服曰袷廣雅云袷長襦也言飾者蓋以縹為緣飾耳 繡刺黼文以縹領 釋曰詩唐風云素衣朱褱毛傳云褱領也諸侯繡黼丹朱中衣毛言繡黼者謂於縹之上繡刺以為黼非訓繡為黼郭氏取毛為說也 注今蔽膝也 釋曰方言云蔽膝江淮南楚之間謂之褱或謂之褱音魏宋南楚之間謂之大巾白關東西謂之蔽膝齊魯之郊謂之褱昌詹 褱又名鞞禮記

玉藻云鞞君朱大夫素士爵韋圍殺直天子直公侯前後方大夫前方後挫角士前後正鞞下廣二尺上廣一尺長三尺其頸五寸肩革帶博二寸是也 注即今至繫也 釋曰孫炎云褱帨巾也郭云即今之香縹也褱交絡帶繫於體因名為褱縹繫也此女子既嫁之所著示繫屬於人義見禮記曲禮云女子許嫁纓及內則云衿纓是也詩云親結其縢謂母送女重結其所繫著以申戒之孫炎以褱為帨巾失之也 注削殺其幅深衣之裳 釋曰案深衣目錄云稱深衣者以餘服則上衣下裳不相連此深衣衣裳相連被體深邃故謂之深衣案深衣篇云制十有二幅以應土有二月鄭注云裳六幅幅分之以為上下之殺故云削殺其幅深衣之裳也其深衣製度禮記具焉 輿革至之革 釋曰此辨車馬之飾名也云輿革前謂之鞞者李巡曰輿革前謂輿前以革為車飾曰鞞郭云以韋鞞車鞞鞞謂鞞也鞞車上橫木毛詩傳云諸侯之路車有朱革之質而羽飾謂以皮革為本質其上又以翟羽為之飾詩齊風云簞第朱鞞是也後謂之第者李巡曰第車後戶名也郭云以韋鞞後戶云竹前謂之禦者李巡曰竹前謂編竹當車前以擁蔽名之曰禦禦止也孫炎曰禦以簞為車飾也郭云以簞衣軾詩傳云簞方文席也云後謂之蔽者郭云以簞衣後戶即詩所謂簞

第也云環謂之捐謂著車眾環名捐云鑣謂之鑣者鑣馬勒旁鐵一名鑣云載
轡謂之轡者轡者御馬之具也古者乘車駕駟馬凡八轡轅端之木名衡衡即
軛軛上著環以貫轡此即載轡之環名轡故郭云車軛上環轡所貫也云轡首
謂之革者轡首名革也詩大雅云儻革金厄是也郭云轡軛勒見詩字林云軛
轡革也 餒謂至之餒 釋曰此別物臭惡之異名也李巡云餒餒皆穢臭也
食飯也餒飯臭也一名餒飯搏相著者名餒李巡云餒飯淖糜相著也飯中有
腥米者名餒李巡曰米飯半腥半熟名餒即論語云失飪不食肉臭壞曰敗魚
內爛曰餒即論語云魚餒而肉敗不食是也 注飯餒臭見論語 釋曰說文
云餒飯傷熱蒼頡篇云食臭敗也云見論語者鄉黨篇云食餒而餒孔曰餒餒
臭味變是也 注內爛 釋曰案春秋僖十九年云梁亡公羊傳曰此未有伐
者其言梁亡何自亡也其自亡奈何魚爛而亡也何休云梁君隆刑峻法百姓
一旦相率俱去狀若魚爛魚爛從內發故云爾然則魚之敗壞先自內始故云
內爛是郭用公羊為說今本內作肉恐誤 肉曰脫之魚曰斲之 釋曰此論
治擇魚肉之名也肉剥去其皮因名脫之李巡云肉去其骨曰脫皇侃云治肉
除其筋膜取好者郭氏以與魚曰斲之文連斲謂斲削其鱗則脫是脫剥其皮

也嫌羊豕有不剥其皮者故又云今江東呼麋鹿之屬通為肉案禮記內則及
李巡爾雅本皆云魚曰作之皇侃云作謂搖動也凡取魚搖動之視其鮮餒餒
者不食李巡云作之魚骨小無所去今本作斲郭云謂削鱗也 冰脂也 釋
曰脂膏也一名冰 注莊子至膏也 釋曰云莊子云肌膚若冰雪者此內篇
逍遙之言也案彼云藐姑射之山有神人居焉肌膚若冰雪綽約若處子引之
者證冰為脂也云脂膏也者孫炎曰膏疑曰脂則似脂與膏異而云脂膏者以
脂有疑有釋對例即內則注云脂肥疑者釋者曰膏散文則脂膏皆惣名也
肉謂之羹至之羹 釋曰此辨魚肉所作食味之名也肉之所作臠名羹魚所
作鮓名鮓以肉作醬名醢有骨相雜者名醢 注肉臠至左傳 釋曰云肉
臠也者儀禮所謂臠臠臠是也云廣雅曰渚者則彼云羹謂之渚是也云見左
傳者案隱元年鄭伯寘其母姜氏于城潁而誓之曰不及黃泉無相見也既而
悔之潁考叔為潁谷封人聞之有獻於公公賜之食食舍肉公問之對曰小人有
母皆嘗小人之食矣未嘗君之羹請以遺之是謂肉為羹也 注鮓鮓至夫禮
釋曰案公食大夫禮云牛炙南醢以西牛截醢牛鮓鄭注云內則謂鮓為膾然
則膾用鮓是也 注雜骨醬見周禮 釋曰案醢人職云掌四豆之實朝事之

豆其實非菹醢醢昌本麋蕪鄭注云作醢及蕪者必先膊乾其肉乃後莖之
雜以梁麴及鹽漬以美酒塗置甌中百日則成矣是也 康謂之蠱澱謂之泥
釋曰康米皮也一名蠱左傳曰穀之飛亦名蠱是也澱滓泥也一名泥郭云今
江東呼泥 鼎絕至之鬲 釋曰此別鼎名也鼎最大者名鼎體圓斂上而小
口者名鬲詩周頌云鬲鼎及薰附耳在鼎表者名欵鬲也謂鼎足相去踈闊
者名鬲 鬲謂之鬲鬲鈔也 釋曰鬲一名鬲涼州名鈔方言云甌自關而東
或謂之甌或謂之鬲或謂之酢甌是也 注詩曰漑之釜鬲 釋曰詩檜風匪
風篇文也 璫瑞也玉十謂之區 釋曰璫者瑞玉名也玉十名區 注詩曰
至玉瑞 釋曰云詩曰韜韜佩璫者小雅大東篇文也毛傳云韜韜玉貌璫瑞
也鄭箋云佩璫者以瑞玉爲佩佩之韜韜然也 注雙玉曰穀五穀爲區 釋
曰襄十八年左傳云晉侯伐齊將濟河獻子以朱絲係玉二穀杜注云雙玉曰
穀是先儒相傳爲然也五穀則十玉也 羽本至之緝 釋曰此別羽數多少
之名也本根也鳥羽根名翮一羽名箴十羽名縛百羽名緝案周禮地官羽
人職云掌以時徵羽翮之政于山澤之農以當邦賦之政令凡受羽十羽爲審
百羽爲搏十搏爲縛鄭注云審搏縛羽數束名也爾雅云一羽謂之箴十羽謂

之縛百羽謂之緝其名音相近也一羽則有名蓋失之矣鄭意以爲箴與審縛
與搏緝與縛名數聲音皆相近也一羽不合有名爾雅一羽則有名疑一羽當
爲十羽也郭意以爲凡物無不從一爲始以爾雅不失周官未爲得也 木謂
之虞 釋曰郭云縣鐘磬之木植者名虞考工記云梓人爲筍虞鄭注云樂器
所縣橫曰筍植曰虞然則縣鐘磬者兩端有植木其上有橫木謂直立者爲虞
謂橫牽者爲枸枸上加版爲之飾名業詩大雅云虞業維樅 旄謂之龍
釋曰郭云旄牛尾一名龍舞者所執也 菜謂之藪 釋曰菜茹名藪郭云藪
者菜茹之摠名見詩者案大雅韓奕云其藪維何維筍及蒲毛傳云藪菜穀
也是矣 白蓋謂之苦 釋曰孫炎云白蓋茅苦也郭云白茅苦也今江東呼
爲蓋然則蓋卽苦也以白茅爲之故曰白蓋襄十四年左傳晉將執戎子駒支
范宣子親數諸朝曰乃祖吾離被苦蓋杜注云蓋苦之別名是也 黃金至之
釧 釋曰此別金錫之異名也黃金一名盪其精美者名鏐白金名銀其精美
者名鏐郭云此皆道金銀之別名及精者鏐卽紫磨金詩傳云天子玉琫而珧
珧諸侯盪琫而鏐珧大夫鏐琫而鏐珧士珧琫而珧珧鏐金名銀錫今白鏐也
一名釧周禮職方氏云揚州其利金錫是也 注周禮至是也 釋曰云周禮

曰祭五帝卽供金版者案秋官司金職云旅于上帝則共其金版此云祭五帝者旅則祭也上帝則五帝也郭氏以義言之故文異爾彼注云銚金謂之版此版所施未聞象謂至之雕釋曰郭云五者皆治樸之名謂治其樸俱未成器有此五名也注左傳曰山有木工則劇之釋曰隱十一年傳文也金謂至之磨釋曰郭云六者皆治器之名也則此謂治器加功而成之名也故論語注云切磋琢磨以成寶器是也璆琳玉也釋曰郭云璆琳美玉名禹貢梁州云厥貢璆鐵銀鏤又雍州云球琳琅玕是也簡謂之畢釋曰簡竹簡也古未有紙載文於簡謂之簡札一名畢禮記學記云呻其佔畢謂但吟誦所視簡之文是謂簡爲畢也不律謂之筆釋曰筆一名不律許慎云楚謂之聿吳人謂之不律燕謂之弗秦謂之筆郭云蜀人呼筆爲不律也語之變轉滅謂之點釋曰郭云以筆滅字爲點今猶然絕澤謂之銑釋曰金之最有光澤者名銑注國語曰玦之以金銑釋曰案晉語獻公使太子申生伐東山佩之金玦狐突歎曰以玦衣純而玦之以金者銑寒甚矣說國語者以銑下屬與郭異也金鏃至之珪釋曰辨弓箭之名也鏃箭頭也剪齊也以金爲鏃齊羽者名鏃孫炎曰金鏃斷羽使前重也郭云今鉀箭是也以骨爲

鏃不齊其羽者名志郭云今之骨髀是也此二者郭氏皆以今曉古案方言云箭自關而東謂之矢江淮之間謂之鏃關西曰箭鏃胡合羸者四鏃曰拘腸三鏃者謂之羊頭其廣長而薄鏃謂之鉀或謂之鉀音龍其小而長中穿二孔者謂之鉀音盧亦謂鉀箭也弓者說文云以近窮遠象形古者倅作弓周禮六弓王弓弧弓以射甲革楛質夾弓庾弓以射豸侯鳥獸唐弓大弓以授學射者此弓之類有緣者名弓無緣者名弣李巡曰骨飾兩頭曰弓不以骨飾兩頭曰弣孫炎曰緣謂繳束而漆之弣謂不以繳束骨飾兩頭者也郭云緣者繳纏之卽今宛轉也弣今之角弓也然則郭意與孫同也當時謂繳束爲宛轉若飾弓兩頭以金者名銑以蜃者名珧以玉者名珪也注左傳曰左執鞭弣釋曰此僖二十三年傳文也案彼晉公子重耳及楚楚子饗之曰公子若反晉國何以報我對曰其左執鞭弣右屬櫜鞬以與君周旋是也注用金至小蚌釋曰云用金蚌飾弓兩頭者以與上弣連文故知然也蚌卽蜃也月令孟冬雉入大水爲蜃是也銑卽金絕澤者珧卽蜃小者珪卽玉成器者以此名弓故云因取其類以爲名也云珧小蚌者卽釋魚云蜃小者珧是也珪大至之環釋曰此別珪璧之屬也圭者玉器執以爲瑞者也大長也珪長尺二寸者名玠璋半

珪也大八寸者名琬辟亦玉器子男所執者也大六寸者名宣因說辟之制肉邊也好孔也邊大倍於孔者名璧孔大而邊小者名瑗邊孔適等若一者名環左傳昭十六年宣子有環其一在鄭商是也 注詩曰錫爾玼珪 釋曰此大雅崧高篇文也 注璋半珪也 釋曰知者以典瑞云四圭有邸以祀天兩圭有邸以祀地圭辟以祀日月璋邸射以祀山川自上而下降殺以半故知璋半珪也 注漢書所云瑄玉是也 釋曰郊祀志云公卿言皇帝始郊見泰一雲陽有司奉瑄玉嘉牲薦饗是也 綖綬也 釋曰所佩之玉名璲繫玉之組名綬以其連繫璲玉因名其綬曰綖故郭云卽佩玉組所以連繫璲玉者因通謂之綖也 一洙至之黼 釋曰別眾色之名也一洙謂之縹者此述洙絳法也一洙一入色名縹今之紅也說文云帛黃赤色喪服記云公子爲其母練冠麻衣縹緣是也再洙名縹卽淺赤也三洙名縹李巡云三洙其色已成爲絳縹絳一名也考工記云三入爲縹鄭玄云洙縹者三入而成禹貢云厥篚玄纁是也淺青一名葱玉藻云三命赤韍葱衡是也黑色名黝以白黑二色畫之爲斧形名黼考工記云白與黑謂之黼書云黼黻絺繡是也 注周禮曰陰祀用黝牲 釋曰此地官牧人職文也鄭注云陰祀祭地北郊及社稷也 邸

謂之柢 釋曰根柢名邸邸本也郭云根柢皆物之邸邸卽底通語也言凡物之柢必在底下因名云也卽周禮典瑞云四圭有邸以祀天兩圭有邸以祀地皆謂邸爲本柢也 雕謂之琢 釋曰案上文治玉璞名雕治玉器名琢彼對例耳散文則雕琢通謂治玉名不分璞與器也 蓐謂之茲 釋曰蓐一名茲郭云茲者蓐席也言草蓐之席也宣十二年左傳軍行右轅左追蓐 注公羊傳曰屬負茲 釋曰此桓十六年傳文也案彼衛侯朔出奔齊傳云何以名絕曷爲絕之得罪于天子也其得罪于天子奈何見使守衛朔而不能使衛小眾越在岱陰齊屬負茲舍不卽罪爾何休云屬託也天子有疾稱不豫諸侯稱負茲大夫稱犬馬士稱負薪舍止也託疾止不就罪是也引之以證茲爲蓐也竿謂之箴 釋曰凡以竿爲衣架者名箴曲禮曰男女不同櫛柳謂此也 簣謂之第 釋曰簣牀版也一名第檀弓曰華而晚大夫之簣與左傳曰牀第之言不踰闕方言云齊魯之間謂之簣陳楚之間或謂之第是也 革中至之鞶 釋曰皮去毛曰革此別分斷之名也中斷之名辨復中分其辨名鞶也 鏤 鏤也 釋曰別二名也郭云刻鏤物爲鏤詩云鉤膺鏤錫 卣中尊也釋在上 釋樂第七

釋曰案樂記云樂者樂也君子樂得其道小人樂得其欲也說文云樂五聲八音之惣名象鼓鞀之形木處也白謂也又象鍾磬也五聲者商角宮徵羽也律歷志云商之爲言章也物成熟可章度角觸也物觸地而出戴芒角也宮中也居中央暢四方唱始施生爲四聲綱也徵祉也物盛大而繁祉也羽宇也物聚藏宇覆之也又云八音土曰埴匏曰笙皮曰鼓竹曰管絲曰絃石曰磬金曰鍾木曰祝此篇惣釋五聲之名及八音之器故名釋樂也 宮謂至之柳釋曰案此文則宮一名重商一名敏角一名經徵一名迭羽一名柳但未見義所出也 注皆五至未詳 釋曰云皆五音者案鄭玄注樂記云雜比曰音謂宮商角徵羽清濁相雜和比謂之音單出曰聲謂五聲之內唯單有一聲更無餘聲相雜也然則初發口單出者謂之聲衆聲和合成章謂之音金石干戚羽旄謂之樂則聲爲初音爲中樂爲末此云五音者舉中而言也云之別名者謂重敏經迭柳是宮商角徵羽之別名也云其義未詳者以爾雅之作以釋六藝今經典之中無此五名或在亡逸中不可得知其義故云未詳案孫叔然云宮濁而遲故曰重也孫氏雖有此說更無經據故不取也 大瑟謂之灑注長八尺一寸廣一尺八寸二十七絃 釋曰瑟者登歌所用之樂器也故先釋之世

本曰庖犧作五十絃黃帝使素女鼓瑟哀不自勝乃破爲二十五絃具二均聲禮圖舊云雅瑟長八尺一寸廣一尺八寸二十三絃其常用者十九絃其餘四絃謂之番番贏也頌瑟長七尺二寸廣尺八寸二十五絃盡用之熊氏云瑟兩頭有孔其在底下者名越鄉飲酒禮云二人皆左何瑟後首揜越注云越瑟底孔也燕禮云小臣左何瑟面鼓執越注云越瑟下孔也若用之祭祀則練其絃跡其越樂記云清廟之瑟朱絃而跡越鄭注云朱弦練朱弦練則聲濁越瑟底孔也畫跡之使聲遲也以其不練則體勁而聲清練則絲孰而聲濁也跡通也使兩頭孔相連而通也孔小則聲急孔大則聲遲故也其大者別名灑孫叔然云音多變布如灑出也郭云二十七絃未見所出 大琴謂之離注或曰至五絃 釋曰琴操曰伏犧作琴世本云神農作琴白虎通曰琴者禁也禁止於邪以正人心也琴之大者別名離也孫叔然云音多變聲流離也云或曰琴大者二十七絃未詳長短者或人言琴有二十七絃是琴之大者也但未詳其長短耳云廣雅曰琴長三尺六寸六分五絃者此常用之琴也象三百六十六日五絃象五行大絃爲君小絃爲臣文王武王加二絃以合君臣之恩也又五絃第一絃爲宮其次商角徵羽文武二絃爲少宮少商又琴操曰廣六寸象六合也

文上曰池言其平下曰濱言其服前廣後狹象尊卑上圓下方法天地然琴
為樂器通見詩書故此釋之也 大鼓謂之譟小者謂之應釋曰別鼓大小之名也鼓之
大者名譟周禮鼓人職曰以譟鼓軍事是也其小者名應言聲應於大鼓
也李巡云小者音聲相承故曰應也孫炎云和應大鼓也 注譟長八尺 釋
曰知者案考工記譟為鼓長八尺鼓四尺中圍加三之一謂之譟後鄭注云中
圍加三之一者加於面之圍以三分之一也面四尺其圍十二尺加以三分之一四尺
則中圍十六尺徑五尺三寸三分寸之一也今亦合二十版則版六寸三分寸
之二耳大鼓謂之譟以譟鼓軍事鄭司農云鼓四尺謂革所蒙者廣四尺
注詩曰至鼓側 釋曰應棘縣鼓周頌有磬篇文也鄭箋云棘小鼓在大鼓
旁應磬之屬也案棘引也謂擊小鼓引樂聲 大磬謂之磬 釋曰磬樂器
名也以玉石為之世本曰無句作磬釋名云磬磬也聲堅磬磬然考工記曰
磬氏為磬倨句一矩有半其博為一股為二鼓為三參分其股博去一以為鼓
博參分其鼓博以其一為之厚已上則磨其旁已下則磨其端是其制也大者
名磬孫炎云磬喬也喬高也謂其聲高也李巡云大磬聲清燥也故曰磬
磬操也 注磬形至為之 釋曰字林云鎗田器也自江而南呼犁刃為鎗此

磬形似犁鎗但大爾云以玉石為之者左傳云玉磬紀甌又八音謂磬為石故
知以玉石為之也 大笙至之和 釋曰世本云隨作笙禮記曰女媧之笙簧
釋名曰笙生也象物貫地而生說文云笙正月之音物生故謂之笙有十三簧
象鳳之身其大者名巢巢高也言其聲高小者名和和音出和
也孫炎云應和於笙 注列管至九簧 釋曰瓠匏也以匏為底故八音謂笙
為匏簧者笙管之中金薄鑠也笙管必有簧故或謂笙為簧詩王風云左
執簧是也大者十九簧以時驗而言也 注十三至成聲 釋曰云十三簧者
鄭司農注周禮亦云十三簧相傳為然云鄉射記曰三笙一和而成聲者彼鄭
注云三人吹笙一人吹和是也 大箎謂之沂 釋曰李巡曰大箎其聲非一
也孫炎曰箎聲悲沂悲也釋名曰箎啼也聲如嬰兒啼郭云箎以竹為之長尺
四寸圍三寸一孔上出寸三分名翹橫吹之小者尺二寸廣雅云八孔鄭司農
注周禮云箎七空蓋不數其上出者故七也 大埴謂之跽 釋曰說文云埴
樂器名從土重聲埴埴古今字釋名云埴埴也聲濁埴埴然大埴名跽孫炎曰
音大如叫呼聲郭云埴埴土為之大如鵝子銳上平底形如稱鍾六孔小者如
雞子周禮小師注云埴埴土為之大如鴈卵鄭司農亦云六孔是相傳為然也

世本云暴辛公作塤蘇成公作箎譙周古史云古有塤箎尚矣周幽王時暴辛
公善塤蘇成公善箎記者因以為作謬矣世本之謬信如周言其云蘇公暴
公所善亦未知所出蓋以詩小雅云伯氏吹塤仲氏吹箎蘇公刺暴公也故致
斯謬 大鐘至之棧 釋曰此別鐘大小之名也說文云鐘樂器也世本云垂
作鐘考工記鳧氏為鐘釋名曰鐘空也內空受氣多其大者名鏞李巡曰大鐘
音聲大鏞大也孫炎曰鏞深長之聲又名鏞大射禮云樂人宿縣于阼階東笙
磬西面其南笙鐘其南鏞鄭云鏞如鐘而大是也其不大不小者名剽
孫炎曰剽者聲輕疾也李巡云其中微小故曰剽剽小也其小者名棧李巡云
棧淺也東晉興元年會稽剡縣人家井中得一鐘長三寸口徑四寸上有銘古
文云棧鐘之小者既長三寸自然淺也 注書曰笙鏞以間 釋曰尚書益稷
篇文也 大簫至之筊 釋曰此別簫大小之名也風俗通云舜作簫其形參
差以象鳳翼十管長二尺博雅曰簫大者二十三管無底小者十六管有底其
大者名言李巡曰大簫聲大者言言也郭云編二十三管長尺四寸其小者名
筊李巡曰小者聲揚而小故言筊筊小也郭云十六管長尺二寸簫一名籟又
通卦驗云簫長尺四寸其言管數長短雖異要是編小竹管為之耳 大管至

之篴 釋曰別管小大之名也大管名箐李巡云聲高大故曰箐箐高也郭云
管長尺圍寸併漆之有底賈氏以為如箎六孔小師注云管如笛形小併兩管
而吹之今天子樂官有之是也其中不大不小者名篴小者名篴 大箐至之
箎 釋曰箎樂器名其大者名產其中者名仲小者名箎郭云箎如笛三孔而
短小廣雅云七孔周禮笙師掌教吹箎鄭注云箎如篴三空詩邶風云左手執
箎毛傳云箎六孔所見異也 徒鼓瑟至之箎 釋曰凡八音備作曰樂一音
獨作不得樂名故此辨其異名也徒空也鄭注周禮小師云出音曰鼓空作一
器以出其音者謂之徒鼓故郭云獨作之也 注詩云我歌且謠 釋曰此魏
風園有桃篇文也毛傳云曲合樂曰歌徒歌曰謠孫炎曰聲消搖也 注或
歌或号 釋曰大雅行葦篇文也毛傳云歌者比於琴瑟也徒擊鼓曰号孫炎
云聲驚号也 所以鼓祝至之箎 釋曰此別祝故之名也周禮小師掌教鼓
鼗祝故祝故皆以木為之故大師注云木祝故也禮記謂之控楬所以鼓動其
祝以出其音者名止所以鼓動其故以出其音者名箎郭云祝如漆桶方二尺
四寸深一尺八寸中有椎柄連底桐之令左右擊止者其椎名故如伏虎背上
有二十七鉏鐻刻以木長尺櫟之箎者其名臯陶謨云合止祝故鄭注云祝狀

如漆桶中有椎谷之者投椎於其中而撞之致狀如伏虎背上刻之所以鼓之
以止樂此等形狀蓋依漢之大予樂而知之 大鼓謂之麻小者謂之料 釋
曰詩頌云鼗磬祝故鄭注小師職云鼗如鼓而小持其柄搖之旁耳還自擊一
名麻其小者名料麻者音概而長也料者聲清而不亂 和樂謂之節 釋
曰八音克諧無相奪論謂之和樂樂和則應節樂記云治世之音安以樂其政
和是也樂記又云大樂與天地同和夫禮與天地同節此對文爾愬而言之則
禮樂相將故此和樂亦謂之節一云節樂器名謂相也樂記云治亂以相鄭注
云相即拊也亦以節樂拊者以韋為表裝之以糠糠一名相因以名焉言治理
奏樂之時擊拊以輔相於樂而為節也既以祝作樂以致止樂故以節為和樂
義亦通也

爾雅疏卷第五


光緒四年歲在著雍攝提格吳興



萬



陸心源校



70034530

